




## **CAPTAIN WILLIAMSON A. SANGMA**

**A'chikrangni gisepo skanggipa Captain, Garo Hills District  
Councilni Chief Executive Member, Meghalaya A'dokni  
skanggipa Chief Minister aro Governor ong'chenggipa.**

**Salrang re'anga, kattarang dongkama.  
Uni kamrang gisik ra'beani ong'a.**

**MEGHALAYA A'DOK ONG'BACHENGA.**











**CAPTAIN WILLIAMSON  
A. SANGMA**

(A'chikrangni gisepo skanggipa Captain,  
Chief Executive Member,  
Chief Minister aro Governor)



# **CAPTAIN WILLIAMSON A. SANGMA**

**(A'chikrangni gisepo skanggipa Captain,  
Chief Executive Member,  
Chief Minister aro Governor)**

*by*

**MIHIR N. SANGMA**



*Published by*

**Mrs. VERONICA CH. MOMIN**  
**HAWAKHANA, TURA, MEGHALAYA**

**First Published : 1992**

**© All Rights Reserved**

*Published by :*  
**Mrs. Veronica Ch. Momin**  
Hawakhana, Tura,  
MEGHALAYA.

*Laser Composed by :*  
**Enen Grafiks**  
CB-178, Ring Road, Naraina,  
New Delhi-110028.

*Printed at :*  
**Efficient Offset Printers**  
**215, Shahzada Bagh Indl. Complex,**  
**Phase-II, Phone : 533736, 533762**  
**Delhi - 110035**

# The heart belongs to God

## AGANSOANI

---

---

A'chikni katta-me'apa "Maran ja'sku tangchaa gita Te'sok noksurio wegaa gita" kakket ong'bebea. Mandeni janggi tanganio chu'sokgipa ong'na skanggipa gun tikkelaniko nanga. Unon cholrang nabaa aro uarangko tik somoio name jakkalania dalroro-silrорona dakchaka. Iani bebe ong'aniko Captain W.A. Sangmani janggi tanganio rongtalen mesoka.

An'tangni segipa ki'tap "Captain Williamson A. Sangma" -ko pringsao ra'bae, uko poraie, agansoaniko see onpachina Pa. Mihir N. Sangma (Munepa) angko molomon anga jajrenga gngang kurachakrikaha maina ia dal'gipa mandeni gimin angni u'iani namen komiachim.

Ki'tapko poraie nion anga Captain Sangmani bi'samitingo duk chake janggi tanganiko aro uni chonmitingo neng'nikanirangko chakchike, uarangko badee amaniko nikon, uarang angko gisik nangatbeaha. Bang'a A'chikrangan anggita Captain Sangmani bi'samitingo janggi tangani gimin u'ipajaenggen ine anga chanchia. Uni janggi tangani A'chik bi'sarangna nambegipa skie ra'ani aro an'tangtangko mikkangchi namgipa songdonggiparang ong'na aro mandesal dilgipa ong'na didiatani ong'gen ine anga ka'donga

Ki'tapko poraigiparang iano Captain Sangmani janggi tanganiko aro uni chu'sokanikosan nikaijawa indiba ua maikai jatna ka'saaha aro a'brini a'dokni sorkariko man'na rakbee tikeldilaha aro gisik gngangbee kamko ka'dilaha uko nikrikna man'a. Bebeko aganode, ia ki'tap Indiani salgrosalaramni a'brini a'dokrangko a'brini jatrangni an'tangtangni nangnikani gita bewalrangko rakkina aro namdapatrorona are a'dokrangni silroro-namroro gnina an'tangtangni sorkariko songe sason ka'anina tikel'anirangko aro mongsongde, dao Meghalayao donggipa a'brini jatrangni ka'nilanirangko name sandirikkite segimin ong'a. Ia ki'tapan A'chik ku'sikode indake sandirikkite segiminrangoni skanggipa ong'a ine anga chanchia.

Captain Sangamani mongsongbatgipa ~~ch~~'sokani aro rasong chaani a'sel gnang-maina ua gipin gipin Indiani salgrosalaramni a'dokrango daka gita Indiani Ma'dot Sorkarini kosako bobil dake chakatdiligija aro an'chi-pari naatgija batesa tom'tomao jinmako dabiatangko tikkeldile Meghalayako man'dile on'aha. Ian uni gisik gnanganiko, namgipa dilgipa ong'aniko aro jatko re'dilanio chu'sokaniko bilake mesoka. Indiani dal'dalgipa a'songni dilgiparangba iani a'selan uko mandera'a aro uni kattarangko rongrime ra'a. Captain Sangma Meghalayaosanmangmang dilgipa ong'aia indiba Indiani salgrosalaramni a'dokrango aro India a'song gimikoba mongsonggipa dilgiparangoni saksa ine chanako man'pagipa ong'a.

Ia ki'tapo Indiani jakgitelko manani jamano Indiani salgrosalaram a'dokrango maidakgipa obostarang ong'angaha aro maikai dingtang dingtangdolang maidakgipa ka'nilanirangko dakangaha uko nikna man'an baksa Captain Sangmani jak indakgipa ka'nilani kamrango baditana kingking dongachim uko poraina man'gen.

Ia ki'tapko segipa Pa. Mihir N. Sangma (Munepa) neng'bee sandirikkite uarangko chimongaha aro ki'tapni bimango ong'ate A'chik manderangna Meghalayani ong'baani gimin rongtalbee mesoke on'aha aro iana anga uko mittela.

Ia ki'tap A'chikrangna aro gipin jatrangnaba nambe gipa aro bang'a ma'sidapanirangko ra'bagen ine anga bebera'a.

Dated Tura,  
The 24th August, 1991.

Sd/ K.M.Momin,  
24.8.91  
Addl. D.P.I. Tura and  
Secretary, MBOSE, Tura.

## JANAPCHENGANIRANG

---

---

A'chikrangni dakbewal ka'bewalrangni bidingo chanchibewalani tom'bimonganiko Shillongo donggipa A'chikrangni, "Literature are Cultural Society" ba dol, 1984 bilsini April jani 13 aro 14 tarikrango Shillong songjinmao ong'ataha. Ua tom'aniona bakrangko ra'pae tom'a matchotkujanakingking anga Shillongong dongaha.

Tom'agimik anga Pa. William Cecil R. Marakni dongchakgipa noko uamang baksaan dongpaaha. Ua somoio Pa. William Cecil R. Marak, Meghalaya A'dok Sorkarini Civil Supply, Weaving aro Sericulture Departmentni State Minister ong'engachim. Garo Literature aro Cultural Societyni ua tom'aniona re'baenggipa manderangna sokachaksona tarigimin noko anga dongejaha. Antangni chawari demechik ong'ani gimin Pa. William Cecil R. Marakni dongchakenggipa nokon anga ma'chakna namnikbataha. Namgipa sokachakanirangna anga uamangni nokdangko mitelpilna gualja.

Ja tom'bimongani, 1984 bilsini April jani 14 gipa tarikon matchotaha. Indake 15 gipa tarikni pringo cha aro cha'anirangko ringman chamane neng'take dongengmitingo, angni chawari, Pa. William Cecil R. Marak angko Meghalaya A'dok Sorkarini Matbol (Chief Minister) Captain Williamson Sangmaona rona mong'kaaha. Anga kusi ong'bee un baksa re'angpa'aha. Anga re'angengmitingon ru'uta salonin angni miksongani aro nangnikani kattarangko Captain Williamson A. Sangmao sing'anirangko dakna man'ode namgenchim ine chanchijololangaha. Uni janggi tangani obostarangko uo sing'e ra'na miksonganian ua somoio angni mongsongbatgipa chanchiani ong'achim. Indiba ia miksonganirang chu'sokgipa ong'gen ba ong'jawa, jajrengani anggo dongachim.

Captain Williamson A. Sangmako angni grongeani somoi, 1984 bilsini April jani 15 gipa tarik, Robibar pring aro uni ma'chakenggipa nokni dringo pringni 11 bajioni 1:10 bajiona, anga an'tangni nangnikanirangko sing'e ra'aha.

Ua somoiosa anga Captain Williamson A. Sangmako grongchenga ong'ja. Bilsa 1948 intalan anga uko nikchengaha. Una agreba uni Garo Hills District Councilni Chief Executive Member ong'engmitingo anga uni ning'o, District Council Office kamko 1955-56 bilsirango ka'aha. Separate Hills State-na uni kam ka'e wenroromitingoba gisep gisep anga un baksa dingtang dingtang biaprangona re'roropaaha. Indiba ua pringo angni grongagita damsan asongrime agangrikanirango anga dakkujachim.

### **Angni grongchengmitingo :**

Anga Captain Williamson A. Sangmako uni dongchakram nokni asongram biapo, saksa uko grongna re'bagipa mande baksa agangrikenganiko nikaaha. Anga aro angni chawarigipa, apan kuturion Captain Sangmako mikkangchake asongeaha. Agangrikmanahaon dongsoenggipa agital mande ua kuturioni re'ongkatangaha. Uni re'angani ja'mano, bak tapan Captain Sangma chingko kuturi ge'gipinona rimangskaaha. Ua somoio chinga sakgittamna agrede uano darangba dongjachim. Uni gimin anga angni nangnikanirango uo sing'e ra'na namen chol ong'beaha.

A'chikrangni aganani bewalo, an'tangna bribatgipa, uibatgipa manderango okamna ba agangrikna jakkalanio, "mama, ada, awang ba pajong" ba ua indake minga de'anian gamchatgipa mande ra'aniko mesokani ong'a ine anga chanchia. Indake anga unbaksa agangrikanirango uko "mama" ine janape an'tangni nanganirango sing'e ra'na a'bachengaha.

Bang'a jrimgipa, ning'tubegipa chanchina nanganirangchi dal'gipa aro ugita dilgipa manderangni gisikrang jakgitele dongrongja aro chanchisimsime tom'tomanirango man'na amja. Indiba ua pringni somoio jedake ka'sina aro tom'tom ong'a, indaken uni gisik aro chanchianirangoba ka'sina aro katchaani donga gita nika. Anga rasong gnange indonga somoiko uano chagrongaha aro nanganirango sing'e ra'na cholrangko man'aha.

Janggi tanganiko seanio anga uko mitelmikna ba namgijanirango am'rikita ine miksongani dongja. Indiba



chong'motko sandie indakgipa manderangni janggi tanganirangko, kam aro ga'anggimin ja'kolrangko sandi-rippinge jaman jawilo dongrikpae chadamberangna gisik ra'ani aro nirik-nikgrikpae A'songtang chigatangna nambatrroe kam ka'na ja'ku de'anio sakantikon didiani kam ongchinas miksongbata.

Ian chu'sokgipa seani ine anga agana man'ja. Gualanirang aro watchanganirang dongnaba donga. Iako namdatatna aro chu'sokbatatna gita skia man'gipa sakantini kam ong'a. Namdatatna aro chu'sokbatatna dakchakgipa sakantikon anga mitelbegen. Jeje manderangoniko anga sandie seanirangko dakaha, uan angni nangnikani gimin sandianiko dakaha ong'ja. Indiba, iarango pangchake sandie seanirangko dakchina gita angna Captain Williamson A. Sangma an'tangan Pa. Debendra Baruah, Rev. Jonnah Ch. Sangma aro Ma. Bisadini Sangma, sakgittam manderangni bimungrangko minge on'aha. Uamangko anga gronge bang'a-kon man'dapaha. Uamangko mitelna anga gualjawa. Ki'tapo on'chapgipa gitcam photorangko angna Captain Sangmani Jikgipa, Ma. Betty Devis Ch. Momin jaksrambeen on'aha. Iana anga namen mitelbea.

Salantio bang'a dakna nangni kamrangko dongale angni segiminrangko che'em che'em poraie niani jamano gamchatbegipa kattarangchi ki'tapo segiminrangna "AGANSOANI"-ko Pa. K.M. Momin (Saljongpa) on'dape gamchatbatataniko dakaha. Angni gisik katong gimikchi anga uko mitelpilna gualja.

Angni sechimonggiminrangko ki'tapni bimang ong'atna gisik sikbeoba angna apnikgijani ong'engon, uko chapa ka'ate matchotatna Captain Sangmani demechik Ma. Veronica Ch. Momin dakchakaniko on'aha, indake da'o k'itapko jinmana nakatatpana gita chol ong'aha. Uni ia dakchakanina anga gro nanggipa ong'a. Angni sinakrip uko mitelangkuken.

— Mihir N. Sangma

# KATTA BICHONGRANG

---



---

Katta bichongrang.	Ki'tapni jak.
I. SING'ANIRANGNA CAPT.WILLIAMSON A.SANGMANI AGANCHAKANIRANG.	1
II. CAPT. WILLIAMSON A. SANGMANI ATCHU-AMBI, MA'A-PA, BA'RIMSKA ARO UNI DEPANTE-DEMECHIKRANG.	8
III. CAPT. WILLIAMSON A.SANGMANI BI'SAMITINGNI OBOSTARANGKO ANGNI SANDIE MAN'GIMINRANG.	9
IV. WILLIAMSON A.SANGMA CALCUTTANI SERAMPORE COLLEGEOR PORAIMITINGO AN'TANGNI CHANCHIA-NIRANGKO SEACHI PARAKA	18
V. CAPT. WILLIAMSON A.SANGMANI SASON-NI BIDINGO JAK ON'E KAM KA'NA SKANG GARO, KHASI ARO JAINTIA A'DOKRANGO ONG'SOENGGIPA OBOSTARANG.	23
VI. CAPT. WILLIAMSON A SANGMANI GARO NATIONAL COUNCILO KAM KA'NA A'BACHENGA.	28
VII. BARDOLOI SUB-COMMITTEE-NI SANDIE SEE ON'A-NIRANG.	32
VIII. CAPT. WILLIAMSON A SANGMA A'CHIK A'SONGO A'CHIK MANDERANGNA AUTONOMY-KO RA'GATCHENGA ARO DISTRICT COUNCIL SORKARIKO RIKCHENGA	34
IX. DISTRICT COUNCILKO CHALAIANI ARO SASON KA'ANI BEWALRANG.	38
X. 1954 BILSIO TURAO A'BRINI DILGIPA MANDERANGNI TOMBIMONGA ARO E.I.T.U. BA EASTERN INDIA TRIBAL UNION ARO A.H.T.U. BA' ASSAM HILL TRIBAL UNION DOLNI A'BACHENGANIRANG.	44

XI. 1955 BILSIO STATE REORGANISATION COMMISSION ASSAMONA REBAE SANDIANIRANGKO DAKA.	46
XII. ASSAMONA MA'MONG SORKARINI HOME MINISTER, PANDIT GOVIND BALLABH PANT-NI REBAA.	48
XIII. CAPT. WILLIAMSON.A.SANGMA ASSAM CABINETONI KAMKO WATA ARO ASSAMO ASSAMESE KU'SIKKO OFFICEO JAKKALNA GITA RA'GATA ARO A.P.H.L.C. NI ONG'BACHENGANIRANG.	49
XIV. ASSAMESE KU'SIKKO ASSAM STATEO OFFICEO JAKKALANI KU'SIK DAKE NIAMKO 1960 BILSINI OCTOBER 24 TARIKO RA'GATA ARO UA SALON A'BRIO DONGGIPA MANDERANG, A'BRINI A'DOKNI SAL INE MANIANIKO DAKA.	52
XV. 1960 BILSINI JULY 6 ARO 7 TARIKRANGO A.P.H.L.C. DOLNI SHILLONGO TOM'E CHANCHIANIRANGKO TIK KA'GIMINRANG.	54
XVI. CAPT. WILLIAMSON SANGMA A'CHIK JATGIMIKNI DILGIPA ONG'E A.P.H.L.C. DOLKO MANGRAKATA ARO A.P.H.L.C. DOLNI KAM KA'ANIO NAMROROANIRANG.	56
XVII. NORTH EASTERN AREAS RE-ORGANISATION ACT 1971.	70
XVIII. CAPT. WILLIAMSON A. SANGMANI MITAM A.P.H.L.C. DOLNI MANDERANG-BAKSA CONGRESS DOLO BAKRIMA ARO 1976 BILSI IN-TAL MEGHALAYA SORKARIKO CHALAIANI BIDINGO ADITA DINGTANGANIRANG ONG'BACHENGA.	71
XIX. MEGHALAYA A'DOKNI CHIEF MINISTER ONG'E CAPT. WILLIAMSON A.SANGMANI A'SONGNI MANDERANGNA PARAKATANI KATTARANG.	74
XX. BON'KAMGIPA SALRANG.	97
XXI. MEGHALAYA.	111
XXII. BON'KAME AGAN-JANAPANI KATTARANG.	123



## SING'ANIRANGNA CAPTAIN WILLIAMSON A. SANGMANI AGANCHAKANIRANG

1984 bilsini April jani 15 gipa tarik, Robibar pringo Shillongo uni dongchakenggipa nokni dringo, pringni 11 bajioni 1 : 10 bajiona angni uko gronge sing'anirangna Captain Williamson A. Sangma-ni aganchakani kattarang.

**Anga :** (Mikkangchakgrike asonge)

Mama, nangni janggi tangani aro kamrangni gimin saoba saoba chimonganirangko dakengahama? na'a antangba see donanirang dongenggenkon.

**Capt. Sangma :** "Baosa, darangba dongkuja. R.T.Rimbaisa gisik nangengakonchim, iarangni gimin ango sing'e ra'ronga. Baditanakingking ong'ahachim, anga uija. Anga antangde mamungko dakan dongja."

**Anga :** Bebegitaba na'a antangde jakchakjawa, mai bilsio atchia, uko gisik rakuengama?

**Capt. Sangma :** "Gisik ra'a, 1919 bilsini, October jani 18 gipa tariko atchia.

**Anga :** Atchiade Baghmaraon atchiakonde mama.

**Capt. Sangma :** "Oe, Baghmaraon atchia. Angni atchichakgipa biapde Baghmara Bazar gitcham, Simsang chibimani rikamon onga." (Ua biap daode dongaha, Simsang chibima a'dram pe'roroe Simsang chikol ongaha.)

**Anga :** Ambi sagini bimungkoara mai mingachimsai?

**Captain Sangma :** "Ama sagikode Nomallini minga. Baba sagikoara Gongsin minga." (Magipa sagini bimungko minga on'na skangde ontisa chanchichengna nangaha. Pagipani chugimik bimungara, Pa. Gongsin Sintang Marak aro Magipani chugimik bimungde Ma. Nomallini Ampang Sangma ongachim.)

**Anga :** Na'an barimaonide chonbatgipamo?

**Capt. Sangma :** “Angni chonbatgipa nogipa dongachimnakon, chonkuengmitingon siaha. Angaba chonkuengani gimin ma’sirikjaha. Angni aro nang mama Minapa (Hekinson A. Sangma) sagini chonkuengmitingon babara siaha. Baba sagini ja’mano ang adatang dal’batgipaan Baba sagini badinganikoba nosto ka’e bon’ataha. Nang mama Minapa aro angade ramram mandegitasa dal’bapa’aiaha Chinga adasa Baghmara Bazaro cha dokan dakeba palbapa’aha. Angni adatang dal’batgipakoara, Rameswar A. Sangma minga, Alter aro Lalitmangni pagipa sagi. Bian baba sagini done sianggipa tangka paisarangkoba bon’atokaha aro uni ja’manode mamungan dongsrangjaha.”

**W.C. Marak :** “Badia Lalit, Turani Puranpagipama?”

**Anga :** Oe, Turani Puranpagipa Lalitanba.

**W.C. Marak :** “Oh, Lalitmangni pagipaan nang’ni adatang dal’batgipamo, indakesan bisongara mikkang bimangrang na’simang baksa apšana.”

**Anga :** Oe, ba’rimarangni gisepode mandeba chanangbata aro an’gilba nambata ine ukon manderang janaptoka. Primary Schoolkode songon matchotama aro M.E. Schoolkode Turaosa poraiakonmo mama?

**Capt. Sangma :** “Oe, Primaryko songon, Baghmaraon matchotba’a.

**Anga :** Rev. Jonah-an nang’ni Primary teacher onga ine manderangni aganako anga knaa, bebemasai?

**Capt. Sangma :** “Oe, Rev. Jonah-an angni Primary teacher ong’a. Head Masterde Binaram Sangma aro Prafulla K. Sangmaba angni Primary teacher onga. Rev. Jonah-de tangpakuenga. Sakgnide siangtokaha.

**Anga :** Uni kride Rev. Jonah-de rakpakuenga.

**W.C. Marak :** “Oh, da’o Turao dongenggipa Rev. Jonah-anma?”

**Capt. Sangma :** “Oe, ukonba aganenga, uanba angni Primary teacher onga.”

**Anga :** Indakenba mama na’ara maikaesa M.E. ko Turao poraiani ong’aha aro maikae Turaona sokbaaha? Awang

*Captain Williamson A. Sangma*

Winniepamangara (Emarson Ch. Momin) Baghmaraon dongachimkonke.

**Capt. Sangma :** "Bao ong'ja, abiko bia ka'namangmangsan gumede Baghmaraona re'angaiaba. Biara Turaon, Teachers, Training Schoolni Superintendent dake kam ka'enga. Indake uasa angko Turao poraiatna rimbaaha. Anga 1929 bilsio dal'gipa banggria ong'na bilsisa skangan Turaona re'bachengaha. 1930 bilsio dal'gipa banggriakon anga gisik ra'kuenga. M.E.Schoolo poraimitingo angara Sonatchipagipa (Late Eveline R. Marak) sagi baksa damsan class. Indiba bian angna batede namen lekka man'bata."

"Pangnan biade classo skanggipa ong'rongaia. Angade gnigipa dakesa ong'paia. Chinga class IV-o poraimitingonin Sonatchipa sagi baksa phai kana (ripeng daka) ine English-chi chiti segrika. Unonin phaiba kaa."

**Uni jamano Capt. Williamson A. Sangma indake aganangkuaha :**

"Turao class V-ko matchotman'o angni gumetanggipa angko Nishangram M.E. Schoolona poraiatnagita rimbaskaaha. Unomiting angni gumetang, Winniepagipara Goalpara High Schoolo Garo Vernacularko skiengachim. Indake Nishangram M.E. Schoolo class VI ko matchote poraiaha. Ua somoio anga Middle Scholarshipko man'paa. Nishangramo donge poraimiting somoirango anga Kokapa (Kosan G. Momin) aro Ronggepa (Dejing Mistri) mangni nokchi rorongpa'aha."

"Nishangramo angni poraimitingo angni Head Masterde Pa. Debendra Baruahon ong'achim. Ua da'onaba tangpakuenga. Uni ja'mano anga 1934 oni 37 bilsirango Goalpara High Schoolo poraie 1938 bilsio Matric porikako pass ka'aha. 1939-40 bilsio Dacca-o poraie I.A. (Intermediate of Arts) porikako pass ka'aha. Uni ja'manosa 1941-42 bilsirango Calcuttani Srirampore Collegeo B.A. ko poraiaha. 1942 bilsio anga B.A. finalko porika seenba Turaona pil'bapilaha."

**Captain Wiliamson A. Sangma indake aganangkuaha.**

"1942 bilsini August jao gnigipa dakgrikanio anga napange N.C.O. trainingko Daccao ra'aha. Trainingoni joljolan anga 1942 bilsini December jao Comissioned Rank-o Lieutenant dake kamko man'aha. Angni bilsu unomiting bilsu 25-san ong'kuaiengani gimin, bilsu chu'ongkuja ine Major Rank-ko angna on'pajaha. 1946 bilsini February jao anga dakgrikani kamoni Turaona pil'bapilaha." (Ua dakgrikao kam kae Captain-ni Rank-onade sokdona man'aha.)

"Dakgrikaoni re'bapile anga 1947 bilsio Turaon Multipurpose Cooperative Society-ni Secretary dake kamkoba ka'aha. Uni ja'manosa 1948 bilsio anga Deputy Commissionerni ning'o Rural Development Officer dake kam ka'skaaha."

**Anga :** Mama na'ara mai bilsimango bia ka'achim?

**Capt. Sangma :** "1948 bilsio, indiba sal aro tarikrangkode tik ong'e uijaengaha." (unon ua on'tisa ka'dingsmita gnan, bia ka'ani Certificate-ni gimin janapjolenba, sandina nanggen ine aganaha.)

**Anga :** Basakonisa na'ara jatna kam ka'na a'bachengaha?

**Capt. Sangma :** "Angni Politics-o jak on'chengade 1946-47 bilsirangonin ong'baaha. 1946 bilsio Garo National Conference-ni Pa. Modi K. Marak-an President ong'a aro Pa. Emonsing M. Sangmara General Secretary dake ong'engachim. Unomitingo doltangtangni gisepon adita meligrikigjanirang ong'kataha. Indake angko Pa. Modi K. Markak-ni pal Garo National Conference-ni President dakatskaaha."

**Captain Williamson A. Sangma indake aganangkuaha.**

"Angni chonmiting salrangni gimin talbate aro rongtalbate ma'sina sikode angni abitang Loreth-magipao (Ma. Bisadini A. Sangma) sing'bo. Haida, una agreba saobarangba uiengkunaba dongakon. Angni politics-o kam ka'baanirangni giminde angaba che'em che'em dakede talpiljajok. Gitcam see rakianirangko (Records) nipiltaiosa uina manpiltainok."



*Captain Williamson A. Sangma*

“(Indakmiting somoion angni chawari, Pa. William Cecil R. Marak, angni sakgni demechikrang Chandigarh-o poraienggipa, Sane aro Sume-mangni koboranko Delhi Meghalaya Houseona phone ka’e sin’gatengachim. Maina uamangara chuti ong’e Turaona re’baani ong’engachim aroba ua somoirango Punjab-ni mitam biaprango golmalrangha ong’engachim. Namekae rongtalbrejaengani gimin Captain Williamson Sangma an’tangan phoneko bakan jaktango ra’skae angni demechik sakgniko bakbak Plane ticket ra’e Turaona watatani cholrangko dakatchina Meghalaya Houseo kam kagipa mandena uiataniko dakaha. Indake ua somoio, Captain Sangma aro angni chawari Pa. William Cecil Marak angna dal’bea dakchakaniko on’aha. Ia kamrangna anga uamangko angni janggi tanga dipet mitelna gualjawa.)

Captain Williamson A. Sangma jaktangoniko phoneko done re’bae asongengmitingo anga mingsa sing’aniko sing’kuaha.

**Anga :** Atcha mama, A’chik A’songo A’chikrangni A’dok chigaranko rakiani bilrangko gimaate Nokma aro maharirangni jakoniko bon’atode mai ong’skagenchim? A’chik A’songni bang’a biaprangon namroro silrroatna kam ka’ani bidingo iani a’selba neng’nikanirang donga me saoba saoba janaprongaha aro uaba ong’ade ong’hebea

**Capt. Sangma :** “Saoba chanchigija iako bon’atode, ua an’tangko so’ote nisigipa mandeoni mamungba dingtangani gri. Bon’atna chanchienggipa mandeba an’tangkon so’ote bon’atna chanchienggipa mandesa onngen.”

**Anga :** Mepring cha’ani somoiba ong’aha. Basakoba man’oara re’bataie sandianirangko daktaiaiginok. Mitelbejok mama. (Indake chinga kuturioni re’ongkatbaaha.)

**Capt. Sangma :** “Im.” (Indake tong’saona re’ongkatbae cha’ram biapchina napjolangaha.)

*Captain Williamson A. Sangma*



**A'gilsakgimikní gnigipa dakgrikani a'bakuo, 1942  
bilsio Captain ong'e kam ka'miting somoi aro uni  
bilsa 23 san ong'kuaiengmiting.**

**Captain Williamson A. Sangma-na dukni obostarang**

Captain Williamson A. Sangma-ni jikgipa un baksa bilsil chidokmang janggi tangrimani ja'mano an'tangni ka'saa segipa aro dedrangko wate jringjrotna neng'takna gita re'angsoaha. Uni jikgipani bimungko, Ma. Glaydish Ch. Momin ine minga aro ua 1927 bilsini November jani 14 gipa tariko Tura Upper Chandmario atchiaha. Uni A'gilsako wate re'angani bilsil aro somoiara, 1964 bilsini May jani 27 gipa tariko ong'achim. Jiktangko gisik ra'ani gita Captain Sangma jiktangni bimungo, "Glaydish Memorial" Shield ba trophy- ko Tura Sports Association na on'aha. Bilsiantin Turao ia Trophy- na Foot-ball kal'susaataniko dakrongenga.

A'chikrangni dakbewalogita Captain Sangmana uni jikchatchi- warirang jikgipa sagini ba'rimaonikon, Betty Devis Ch. Mominko bia ka'e on'taiaha.

**This book ne'ong to Govt**

## II

### **CAPTAIN WILLIAMSON A. SANGMANI ATCHUTANG AMBITANG, MA'A-PA ARO UNI BARIMSKARANG**

*Pagipani doloni*

- 1 Atchutang — Saleng Sangma
- 2 Ambitang— Garai Murak
- 1 Pagpa Gongsin S Murak

*Magipani doloni*

- 1 Atchutang Majeng Marak
- 2 Ambitang Ranche Sangma
- 1 Magipa Nomallini Sangma

**Barimskarang :**

- 1 Rameswar A Sangma (Adatang jakia )
- 2 Sorojini A Sangma (Abitang jakia )
- 3 Pongkojini A Sangma (Abitang )
- 4 Sonamoni A Sangma (Abitang )
- 5 Bisadini A Sangma (Abitang )
- 6 Madison A Sangma (Adatang )
- 7 Heckinson A Sangma (Adatang )
- 8 Williamson A Sangma
- 9 Ihimtim ba Thimbing (Nochon )

**Captain Williamson A. Sangmani Depante  
demechikrang :**

**Jikskangni dedrang :**

- 1 Truman Ch Momin (Depante dejakta)
- 2 Veronica Ch Momin (Demechik)
- 3 Carwen Ch Momin (Depante)
- 4 Fersen Ch Momin (Depante)
- 5 Anthony Ch Momin (Depante)
- 6 John Kenedy Ch Momin (Depante)

**Jikgitalni dedrang :**

- 7 Aldrin Ch Momin (Depante)
- 8 Monica Ch Momin (Demechik)
- 9 Allan Ch Momin (Depante)
- 10 Gary Mark Ch Momin (Depante)
- 11 Rebecca Ch Momin (Demechik)

### III

## **CAPTAIN WILLIAMSON A. SANGMANI BI'SAMITINGNI OBOSTARANGKO ANGNI SANDIE MANGIMINRANG**

**Pa. Debendra Baruah-ko angni gronge singanina aganchaka :**

(Byrnhato Conservation Training Institute-o, Pa. Debendra Baruah-ni chawarigipa, Pa. Holliram Borah ang baksaan damsan kam ka'enga. Uamangni noko anga Pa. Debendra Baruah-ko 1984 bilsini May jani 9 gipa tarik, Budbar attam, 2 bajio grongaha. A'chikkuko ua man'beani gimin anga unbaksa A'chikkuchin agangrikaha.)

**Sing'a aro aganchaka :**

**Anga :** Namengama Baba? angko uikuengama.

**D.Baruah :** "Namenga aro uia."

**Anga :** Na'ade jaktangchiba namen kam ka'gipa mande onгани gimin daonaba bilake aro be'en an'senge dongpakuenga.

**D.Baruah :** "Oe, ian Isolni ka'sabeani gimin."

**Anga :** Dao nang'ni badita bilsimang ong'aha?

**D.Baruah :** "Angni bilsidao bilsidao 85 mang gapaha."

**Anga :** Mai bilsimango na'a Nishangramo Teacher-ni kamko ka'chengaha?

**D. Baruah :** "Skangde Middle English Schoolsa ongchengachim, aro uan 1929 bilsimango onga. Ua bilsionin anga Nishangramo teacher ka'chengaha. Anga aro Pa. Mackenson Sangma 1948 bilsio High Schoolni class-rangko abachengataha. Anga ua Schoolnaan antangko on'kange kamko ka'aha. Mongsongbate A'chikrangna ine aganoba gualani dongjawa.

**A'chikrangan angni maharirang onga aro daoba anga A'chikrang baksaan donge angni salrangko reatenga."**

**Anga :** Baba, Captain Williamson Sangmaba nangni chatro onga ine manderang agana aro Capt. Sangma antangba angna agana, uara mai bilsirango ongachimsai?

**D. Baruah :** "Oe, Captain Sangmani gumetanggipa, Pa. Emerson Momin (Winnie- pa) Goalpara High Schoolo Garo vernacularni teacher ong'e rebaahaon angona Capt. Sangma aro Heckinson Sangma adasako rimbaaha. Angni simsakanion Nishangram Middle schoolo poraichina donangaha. Uamang ang baksaan donga. Uamangko Hostelo donachim. Uan 1933 bilsimango. Indiba ua class VI-kosan bilsisa angni Schoolode poraianaiaha. Ua apsan bilsion Middle English Schoolkoba matchotaha. Captain Sangma Middle Scholarshipkoba man'a."

**Anga :** Middle Scholarship-ara uororo baditamang onga?

**D. Baruah :** "Japrako gongbongagita ongakon. Dao anga name gisik rajaengaha."

**Anga indake Pa. Debendra Baruah-o singanguaha :**

**Anga :** Nang'ni Schoolo poraimitingo na'a Capt.Sangmani gimin maiko gisik ra'a aro mai daggipa bi'sa ongachim?

**D. Baruah :** "Captain Sangma unomiting chatro hisape namen namgipa aro bimchippipa onga. Poraina simsaka aro katta ra'bea. Indiba unomitingde ku'sik bange agangipa bi'sa ongja. Indiba bi'sa intalan dakdrae niani gisik donga gita nika. Gisikni ningao maiba tikelani donggipa bi'sagita daka. Kadongani gisikde ba'kapaonin donga. Bang'a bilsina angni Schoolo dongangjahani gimin iarangna agrede anga taljaha. Uni jamanode uni janggi tangani salrangni giminde anga uijaha. Maina ua Nishangramo dongkamjaha. Indiba anga rasong chabea, dao ua dal'gipa mande, Meghalaya A'dokni Chief Minister ongenga. Salsao ua angni chatro ongpaachim. Nokgipa indaken A'chikrangko chuatangchina ine anga pangnan Isoloba bironga. Maina A'chikrang angni maharirang onga."

*Captain Williamson A. Sangma*

**Anga :** Mitelbea baba, anga dao class dongani gimin class ra'na reangaiengiok.

**D. Baruah :** "De, mitelbea, basakoba grongtainaba donga."  
(Indake anga uko wate class ra'na reangaiaha.)

**Pa.(Rev.) Jonah Ch. Sangma-ko angni gronge sandianiko daka:**

(1984 bilsini June jani 4 gipa tarik, Sombal attamchibara 2 bajio anga Turao uni noko Pa. (Rev) Jonah Ch. Sangmako antangni nangnikani-rangko sing'e ra'na gita grongeaha.)

**Angni sing'a aro un, aganchakanirang :**

(Anga uni nokona sokangon angna asongchina on'gipa chokio, Rev. Jonah Sangmani sambiko asongeaha. Indake anga adita sokangchengani kattarangko aganmanani jamano angni nangnikanirangko sing'na a'bachengaha).

**Anga :** Mama, da'o nangni bilsil baditamang ongaha?

**Rev. J. Sangma :** "Ruutjok, da'o bilsil 84 mang gapaha."

**Anga :** Mai bilsimango atchiachim aro Baghmaraon atchiama?

**Rev. J. Sangma :** "Anga Baghmaraon atchia, indiba sal tarikrangko tik ong'e uijaha. Bilsil 1900 on ongani gimin antangni bilsiko gisik ra'nade altubea.

**Anga :** Mai bilsimango na'ara Baghmarao Primary Schoolni skigipani kamko ka'chengaha?

**Rev. J. Sangma :** "Bilsisana, Binaram Sangmani chuti ramitingo uni pal teacher dake 1923 bilsio ka'chengaha. Unomiting anga bilsisanasan ka'aia."

**Anga :** Nangni Schoolon Capt. Sangmaha Primary Schoolo poraia ine ua antangan agana. Uara mai bilsimangosa ongachim?

**Rev. J. Sangma :** "1923 bilsio angni sakgipini pal teacher dake ka'mitingode uade Schoolchi rekujachim. Capt. Sangma unomiting bilsil 4 mang ongkuaienga. Indiba anga kamko ka'na abachengtaiaha. Indake angni

*Captain Williamson A. Sangma*

kataimitingosa anga Capt. Sangmako angni classo man'chengaha. 1928 bilsio ua class II-o poraiachim. Anga uko bilsisamangsan angni Schoolo manaiaha. Maina anga 1929 bilsio Teacher Trainingona, Turaona rebaaha. Uaba 1929 bilsini bonangachin Primary Schoolko matchotaha. Anga Turao Trainingosa dongengani gimin uni jamanogipa salrangni giminde mamungkon masijaha."

"Nirok-sandigipa dongahani gimin aro uko poraiatna miksonge uni gumetang Winnie-pa (Emerson Momin) Baghmaraoniko Turaona rimbaaha. Unomiting Winnie-paan Turao Teacher Trainingni Superintendent ongengachim. Indake anga Capt. Sangmani dambemiting somoirangni gimin banggijasan masiaiaha. Indiba uni maa-pani nokdangni obostarangni giminde aditan uirikpaa."

**Anga :** Uororo somoirangode ua a'pakjolode uni maapa aro mama-atchu Bong Lasker-mangkon mingsing minggamtoka. Bading-chiwale man'gipa tangkarangkon matchu garirangosa Jariajanjaloniko Baghmaraona salpilachimnakon. Umangni Baghmarao songdongmitingode Baghmara songan Song mongsonggipa gittim kimkogipa ongachim ine Baghmara songni obostani gimin skango mama Salsengpagipani (Mackenson Rongmuthu) giticham A'chik ku'rango seanrangko nikna man'a

**Rev. J. Sangma :** "Aiao anggri, ua kattarang bebean ongchongmota. Capt. Sangmani pagipade mahajon inchagnangan, maha maha dake janggi tanganggipa mandean onga. Uasanba ongja, songna nokna, madrang maharina tangdik soka salo a'sel ong'apni somoio nirok-sandigipa dakchak- kingchakgipa manderangde uamangsanchim. Umangni dongramko repak- dopaknan jaja-jiji, pamanja pamanja dakmanpilaia. A'asakoa gureosa, chisakaoa ringbolmaosa songre-songgabataiachim. A'chikrangni gisepode daororoba aro skang salrangoba bisonggitta man'e cha'a rike donga dongkuja aro mikkangchiba indake man'e chagipa, bil gnanggipa manderangde atchitaijawaha ine chanchimana."



*Captain Williamson A. Sangma*

"Indiba 1920 bilsimango Capt. Sangmani pagipa siangantalan, unbaktapan balmundurini manpakangagita, chibiman sarokangagita uamangni nokdangni namgipa obostarang gimaangaiaha."

"Uni dedrangrang namekae ning'tue chanchina ba mal-matarangni gimin simsak-nirokna gisikrang sokkuja aro darangba madrang maharioniba simsakrikgipa dongjaha. Adatang jakra, ua adita brikalahaoba simsakgija dakenba batesa rusie bonat-chonatoksrangaha."

**Anga :** Angna Capt. Sangmani agane on'anigitade' biara 1919 bilsiosa atchiaha. Indide pagipani siani somoiode Capt. Sangmade bilsisamangsankua. Indake dalbahaon Capt. Sangma aro Minapa (Hickinson Sangma) adasade ramram kangalni bisaranggitasa janggi tangbapaaiaha ine Capt. Sangma antangan angna aganaha. Uarangni giminde na'a mamungkoba uijahakonmo mama?

**Rev. J. Sangma :** "Uko aganode anga antangan Capt. Sangmani bisamitingo onga obostarangko chanchiate duk manchakpila. Maina uamangde inditan namgipa nokdangni bisarangan ongpaa-chim. Pagipa sagni jamanoara danang, namen duk-mikchi brinesa janggi tangna nangao gaakaha. Mongsongbate dedrangni giseponi Willie aro Heckin adasaan namjabata obostao dalbapagiparang ongaha. Schoolo, classoba Willie-an chonbata, maiko agangen ua somoiode ram'aming simaming, koteksisi dake, ku'siksa ku'daldal dakaia. Uni giminan, uni magipara uko sal sal "Ku'dal, ku'dal" ine okamjringaia. Unonisa bi'saode bikoara Ku'dal ine mingachim. Ganna-china dongpaja. Gankappipabebe, uaban ki'seprao bangrikkipana agrede, chotchri chotchra dake gin'reraakosa gane Schoolchi repaa. Leka ki'taprangba chu'ongja. Namen dukde chakbebejok."

"Uororo somoio sawa uko Captain onngen, jatni dilgipa aroba Meghalaya A'dokko man'dile aro ua A'dokni Chief Minister onngen ine chanchisamsona man'gen? Angni nikanigitade, bi'sa antangba janggi tangao namen ka'nilbeaha. Minggipinara uni gumegipa una ramako o'kree janggi tangani cholko on'chengaha, jechin ua biap

*Captain Williamson A. Sangma*

gipinrango dongroroe bang'a nika-nianirangchi gisikni tikelanirangko manbataha. Pilsara dakgrikani a'bao kam ka'eba kadonganirangko skie ra'na chol onghagitaba chanchimana. Jeba ongbo ia gunrang bakapaonin dongachim ine nikna man'gen. Uarangko bimchipe jakkalna ua pangnan joton ka'aha. Uni duk chaka, bebe ong'ani aro bimchipa una chuongaha aro dao uni a'sel Isol una ia gadangrangko patienga. Jeo ska, unon chol. Mande sikani baksa joton ka'ani dongchongmotna nanga. A'chikrangni agananioba donga. Chonmitingo do'chokna dol'a, kirosiko bolgrona sol'a."

**Rev. J. Sangma indake aganangkuaha :**

"Uni pagipa sagiko man'e cha'a aro songni nokni manderangna dakchak-nirokani bidingo aroba dingtang dingtang kamrango mingsing-minggamana baten dao uni depanteko jatna aro a'pakgimikna antangko on'kange kam ka'anina a'gimikchin mingsingani jangang-tengangskaaha. Pagipa sagian haida antangni depanteni bimungko, Garo Hillsko Britishni somoio district ongatchenge districtni skanggipa sason kagipa Deputy commissioner, Captain Williamson-ni bimungchin mingrikahakon. Bimungna krakra ua Captainba ong'aha. Batkalesa Deputy Commissioner-ni gadangna chubatkale dao Capt. Sangma A'dokni Chief Minister ong'aha. Matsamngipiga uni gisikko ua maram cha'atjaha aro iako jatgimikba masie uko wil'e jakkalaha."

**Anga :** Atcha mama, uni bisamitingni bewalrangko na'a maidake nika. Poraimitingoara mai rokom ?

**Rev. J. Sangma :** "Bi'sade namen mikasrak gingasrak dakgipaan. Indiba darangni simsakpaanirangko manjahani gimin bi'samitingo ua gisikrangko namao jakkalpana man'jaha. Poraianirango nirokatgipa dongja. Indiba man'gijasranggipade ongtaija. Nirokatgipa aroba gipinranggita chol ongkalgenode bi'sade namgipaan onga. Uo namgipa gun dongachim. Antangna dalbatgipana bamma aro skigiparangnade namen bamsranga. Angnade namen kensranga."

**Anga :** Captain Sangmara bano aro mai bilsio napolachimsai?

**Rev. J. Sangma :** "Angaba uani giminde masijaha. Indiba uororo somoirangode Primary Schoolko matchotarin darangkong napolatronga aro indakesa Middle Schoolchina poraina watatronga. Haida Captain Sangmaba 1929 bilsimangon napolenggenkon. Angaba name masijajok."

**Anga :** De, mitelbea mama, anga nokchi reskagnok. Bangen masina nangrangko manbeaha. Basakoba rebataiaignok.

**Rev. J. Sangma :** "Oe, gisepo jokarangode rebapabo."

(Indake anga noktangona rebaiaha.)

**Ma. Bisadini A. Sangmako (Capt. Sangmani abitang)** angni uamangni nokchi reange grongao sing'anirangna aganchaka :

(1984 bilsini july jani 14 tariko anga Ma. Bisadini A. Sangmako Turao, uni dongram nokona reange grongeaha. Ua angko grongchengon Atong ku'sikchi, "Bisangna baba." ine singaha. Uni orto A'chikuo, "Bachina baba" ine onga. Angaba ku'sade una Atong ku'sikchin, "Ni'wa na'a ade, angdo nang'o sung ra'waisa grongna rai'ai donga." A'chikuode, Ongja na'a ade, angade nangko gisik ra'esa grongna ine rebaenga.)

**Anga una angni miksonge reangani kattarang ko agane onaha.** Indake anga uo sing'na a'bachengaha.

**Anga :** Atcha ade, atchuni siani jamanode nasimang dedrang sakantian bilding bildanggita ongtokaha ine saoba saobarang angna aganaha. Indiba na'ade barimajokona mama Truemanpani chonmitingni obostarangkode talenggenkon. Uni kam aro bewalrangkode masienggenkon. Jeko gisik ra'a, uarangko angna kasapae agane on'pabo. Maina anga uni janggi tangani obostarangko see sandianirangko dakengachim.

**Ma. Bisadini :** "Maina tolaenggen ajong, angade namede gisik ra'atpilnan manpiljaengjok. Biade angnade bilsibrimanggita chonbata. Angade bini bakgitchakmitingon Calcuttachi poraina reangaha. Angaba unomitingde chonade chonkuenga. Indiba baba sagi angna kasaani gimin angkode jechi baba re'a, uchin angkoba rimbitrongaia. Haida angan dedrangni gisepo baba sagini ka'saaniko manbatgipa onggenkon. Unikode

*Captain Williamson A. Sangma*

nang mama Willie-de bilsisamang ongaiengkuon babara siangaha. Uni jamanode nangni aganagitan chinga dedrang sakantian bilding bildang ongagita dakbebeaiaha. Baba sagini siani jamanode angaba ai baksaan noko dongaiaha. Baba sagini siani bilsisagipaon angni nogipa, nang mama Willie-ni kurioni chonbatgipaba siangaha. Ukoara, Thimbing ine mingkalakachim aroba Thimtim ine okamronga. Indaken amaba pagligita gisikrangan tik ongpiljaha. Dukni kosako duksa onгна a'bachengroroaha Baba sagini jamanode, bang'a manderangan sikuchina ingipagita mikbue donggiparang rokom rokom duk on'a abachengaha. Baba sagini badingani kamrango rokom rokom pasikanirangko dake amani kosako mokordomarangko abachengataha. Agor badingani kamrangna mikboke rasekna joton ka'aha. Uororo somoio amara chinga bi'sarangko noko done Turaona mokordomana re'ruraa. Indiba angade uarangkoba name uipajaha, maini a'selanchim, chingni mi jamgimikko Sorkarian tala dalgipako tekenba atok ka'srangaha. Uni jamanode chingo cha'nagita mibebaba dongjasrangaha. Noksulrangni on'gile suale dakchakaonikosa gisepode cha'pajok. Mamungba chol ong'chongmotjae ama chingko rimbite Baghmara Bolsalgre biaponiko a'a o'dilako anga gisik ra'a. Angade salna chakna amjae buringgrimrango a'a gamitingoba nape nape chaka. Indaken chinga abisa nang mama Heckin baksa a'baona reronge amako a'a gamna dakchakronga. Nang mama Willie-de chonkuenga. Indiba alamala noko dongsoe bian medik-samdik aro tala-lotarangko name rongtale nate donsoronga. Amaiamjae chirangkoba kosorongpaa. Basakobade bian je dongako song'e donsorongpara. Nang mama Willie-o indakgipa mingsa bewal donga. Bi'sa intalan namen rongtala aro namen mitchiraksranga. Babamangara Nepali mechik bi'sa saksako aldua aro ukoara, Apali minga. Anga gisepode un baksa matchu bathan-ko nina reangako gisik ra'enga."

"Angni adatang dalbatgipara (Rameswar A. Sangma) Calcuttao poraimitingon bochi Mondakiniko bia ka'aha, aro Turaosa dongeaha. Jamano ua Baghmaraona reangenba angko Turao poraichina rimbaaha. Badita ruute dongachim,

angaba gualpiljok. Unoniba anga Baghmaraonan reangpilaha. Gume sagi (Emerson Momin) abi sagiko bia ka'ani jamanosa angko Turaona rimbataiaha. Unonide Turaon anga dongjololaiaha. Unomitingde ama baksa angni jongdrang, Heckin aro Willie adasa songon dengengachim. Gisepo School chuti ongarango anga nokchina reangronga.

"Anga Scholarship man'paa aro uoni banggijachin gisepo chutio nokchi reangode jongdrangna on'tiprak cha'anirangko ra'angparongachim. Indaken angni jongdrang sakgni, Heckin aro Willie angna ka'sabea. Angni Turaona rebamitingode, hambino rebataibone ine angna aganatrangachim."

"Changsao anggo tangka dongpajae, je ontisa dongpaachin chonbatani kri angara Willie-na chola genji kingsa Turaoniko chutini somoio nokchi reango ra'angpaa. Sakgnina brepanara tangkan dongpaja. Unoara, angnade kasaja, cholakoba angnade rabapaja ine adatang Heckin-sa grapbeaha. Angaba suk ongjae damsanan grapsrangaiaha. Ua somoirangode Heckin aro Willie adasaba dalbatokaha. Pangnan adagipa Heckinde milsi pie amana na'tokko on'ronga aro jonggipa Willie-ara pangnan babilini kamrangko amana dakchakrongskaa. On'timiti amako dakchakna manengarok ine Baghmara Bazarro Heckin aro Willie adasa cha dokanba dakpaa. Indake gisep gisep nanganirangko uamang adasa amako nirokbatgiparang ongaha."

"Jamano angni gumetanggipasa Baghmaraoniko Heckin aro Willie adasako Turaona poraiatna rimbaaha. Gumeni (Emarson Momin) Goalpara Schoolo Garo Vernacular teacher ongmitingosa uamang adasakon Nishangram Schoolo poraiatskana ine rimangtaiaha.

Untalan chingni janggi tanganio dintang dingtang ongangtokaha. Name aro sulsulde angaba agana manjajok ajong. Gisikba namede ra'atpiljaha. Haida saoba saoba talbatkalkunaba donga. Na'a sandie nibo."

**Anga :** De, ade nangko mitelbejok, anga reskanajok.

**Ma. Bisadini :** "Ma, che danang, angan name gisik ra'jaha aro rongtaleba agane on'a manjaha. Cha gitchakmangmangkosan na'ade ringangmanaiengjok."

**Anga :** Mamungba ongja ade, basakoba somoi jokode anga rebataigenba. Reangengaha.

## IV

### **WILLIAMSON A. SANGMA CALCUTTANI SERAMPORE COLLEGE PORAIMITINGO ANTANGNI CHANCHIANIRANGKO SEACHI PARAKA**

(1941-42 bilsirango Capt. Williamson A. Sangma Calcuttani Serampore Collegeo poraiengachim. Gipin jatni bijangchio donge jatangna ka'pakani aro A'songtangna kasaaniko ua bang'bate ma'siaha. Gipin jatni chuani aro a'songni namroro-anirangko nike ua jatang a'songtangkoba chuatpana aroba nambata gadangrangona sokatpana manode ine gisikni ningo indakgipa chanchianirangko A'chik sakantinan masiatna sikaha. Uasan ongja, indiba A'chik sakantini ia miksonganiko jaku de'e remikkanganina kumonganiko janape 1941 bilsini March jani A'chikuchi segipa, "A'CHIK KU'RANG" Magazine-o ua "AMA A'SONG" ine katta bichongko ra'e seachi parakataha) Uano indake seaha :-

#### **AMA A'SONG**

Da'alo angni ku'rang nasimangona maiba nambegipa ku'patianiko ra'angenga ba su'ubegipa seaniko see ku'rangko mikkim chaatnakenga ine agana man'ja. Nambegipa ku'patianiko on'pana ba knatogipa seaniko sepana anga man'jaoba, angni kurangko iano naatpaanichi, nasimang baksa angni ku'mongpana ba bakrimpana sikaniko mesokatpaenga.

Da'alo angni ku'rang bangbango gam'e bon'aijawa, indiba ka'sara ripengrangni ka'tongrangni rong'kuchakrango gam'chakgen ine bebera'a. Ua rong'kuchakrango tarime gamchakgrike A'chik songgimikonaba ia ku'rang gipsokanggen aro uandakenba maiba nama biteko jatna kamchiba mesokna chol ongpagen ine ka'donga. Sak-o nitobee

tengenggipa salni kokimao donggipa a'gilsakni darang manderangan Ama-a'songtangna ka'sabata. Ian kakket ong'aba ong'a ine chanchina anga kusi ong'a.

Anga A'chik pante saksa ong'pae A'chik a'songna ka'sabata aro uni gimin anga on'tisa an'tangni chanchipaaniko da'alo parakpana mangsonga.

Ma'tangna mande jekae ka'sabata uagita chachaan mande a'songtangna ka'sabata. Angni ba nang'ni ma'a jegitaba skia man'gijagipa, daknanggijagipa ba rasong grigipa ma'a ong'ja maina, angaba na'aba ma'tangnan ka'sabataigen. Uaindakeba a'songtang jegitaba chongipa, buiring bolgrimarigipa, ba skia man'gijagipa ba ga'nanggijagipa a'song ong'ja maina, mande a'songtangnan ka'sabataigen. Mandeni ma'tangna ka'sabatani a'selrangko sandina neng'ani gri; sandigenchimode bang'en nikna man'gen. Ia a'selrangko darangan uitoka. Uni gimin anga a'selrangko janapchae seaniko bakroatjava. A'songtangna ka'sabatani a'selrangba uagitan apsan bang'bea, aro iani giminba darangan uitoka. A'selrangko janapna nangnikja.

Ama a'songna ka'saa ine aganon an'ching maiko ma'sia? An'chingni ma'a-pa ba atchu ambirangni songdong a'chachakgipa biaprangkosan, chong'motan, nitogipa a'bri-a'kawé, chiring-chibima ba uandake rona an'senggipa biaprangkosan mangsongama? Songdong-a' chachakram biaprangkosan mangsongja ine namekae sandiode nikgen. Shillong ba Darjeeling A'chik a'songna bate ka'sinbata, nitobatgipa ba rona nambatgipa songrang ong'-naba donga, indiba ia biaprangna A'chik songna jekae anga ka'-paka ba uko gisik ra'a, indake anga ka'pakama ba gisik ra'ama? Ithing, anga kapakja aro gisik ra'ja. Indide A'chik A'songna angko ka'pakatgipa ba gisik ra'atgipara maisa? Maina uano angni ka'sagipa ma'a-pa, bak-dil ba angni jat donga; pangnan uamangko gisik ra'a. A'songtangna ka'saa ine aganon indide rona namgipa biaprangna ka'pakakosan ba uarangko gisik ra'a-kosan mangsongja; indiba mongsongbate jatangna ka'saakosan mangsonga.

Ma'a-pani noko pangnan dongkamaiode ma'a-pana ba an'tang ba'rimana, jong-ada no-abirangna baditana kingking

ka'saa mande namekae ma'sija. Indiba ma'a-pani nok-ko wate gipin chel'a a'songo gipin jatrang baksa dongbrineosa mande an'tangni ma'a-pana ba ba'rima bakskarangna ka'saani ningtuako uibaa. Iagitan apsan a,songtango pangnan jattang baksa dongkamaiode, mande jatangna badita ka'saachim, uko name ma'sija. Indiba jensalo a'song gipino jatgipin baksa saksan dongegen unsalosa jatangna ka'saaniko name ma'sia. Badita na'a jatangoni chel'ao jatgipin baksa gipin a'songo donggen, inditan na'a jatangna ka'saaniko ma'sibatgen.

Mesokaninagita anga jatgipin baksa dongrime jatangna ka'saaniko maikae ma'sipaaha, on'tisa janapna ska. Atchiram song Baghmarako wate Turao dongmitingo anga Baghmarana ka'paka. Baghmaraoni Turaona re'bagipa mande sakantikon an'tang ba'rima bakskarang gita chanchiman'a aro ka'saa. Saoba Baghmara songni manderangko chonike aganode ba matnangode anga gisik sasoa aro unon ka'onangchaka. Anga dingtangmancha songtangni manderangna simsakna ska. Turako wate Goalparao dongmitingo A'chik jat ingipakode je songoniba ong'ja maina, grongna ska aro ba'rima bakska gita chanchiman'a. Assameserangni gisepo saoba badiaba A'chik mandeko chonikgenode, ba manenggenode, an'tangko chonikjaengoba ba manengjaengoba ka'o nangchaka aro warachakna ska. Assam a'songko wate Bengalona re'bae Bengalarang baksa dongrimeon, Assameserangko maibakae dingtangmancha namnikna a'bachenga aro pilak kamon jatsani manderang gita chacha saksa sakgipinko dakchakgrikna skani gisik donga. A'brioni re'bagipa manderang donggengchimode, je bakoniba ong'ja maina, jongadarang gita chanchiman'a. Indiako watange badiaba Europe a'songni biapo donggengchimode, Indiani je mandekoba grongon, ukoba jong-ada gita chanchiman'gen, aro saksa sakgipinna dakchakgrikna sikgen. Indide gipin a'songo A'chikskako nikna ba grongna baditan katchaani ong'gen, aro ma'sanni ba ba'rima bakska gita chanchimangen. Ian jatangna ka'sabatani a'sel ong'a ine an'ching sakantian uia.

A'chikrangni gisepo bang'batan, angonital, an'tangtangko mongsongbate gipin a'songo aro gipin skia man'kalgipa jatrangni bijatchio "Garo" ine mingako



*Captain Williamson A. Sangma*

namnikja. An'tangtangko Garo ine uiatna sikja; man'adipet jatangni bimungko donuna ska. Iani a'selko sandina neng'ani gri ine anga chanchia. "Garo" bimungko A'chikrangna gipin skia man'gipa manderangsa on'aha; aro ia bimungko A'chikrang jensalo on'timitiba skia man'kujachim, aro matburung gita chacha janggi tangengachim, indaka somoiosa on'aha.

Indaka somoiosa on'ani gimin, "Garo" ine aganon, gipin skia man'kalgipa jatrang ba manderang, skia man'gijagipa a'brini mande, makkreni jat inesa uiaia. Indake "Garo" bimungna namgija ortoko on'aha. Iani a'selsa A'chikrang an'tangtangko "Garo" ine mingatna sikja aro "Garo" ine mingarion chonika gita chanchiman'a. Ia "Garo" bimungko A'chikrangna on'manahaoa an'ching uko galna man'kugenma? Man'jawaha. Indiba an'ching ua mikkim grigipa bimungko jatangko skia man'gipa jat dakachi ba chuatachi, mikkim gnanggipa bimung dakatskana man'gen.

Englishrang an'tangtangni jatni bimungo rasong chaa, aro an'tangtangko "English" ine uiatna batesa ska; maina uamang skia man'gipa jat ong'aha. Bengalirangba skia man'kalgipa jat ong'ahani gimin an'tangtangko Bengali ine uiatna ska aro uano rasong man'a. Hai an'chingba jatangko skia man'gipa jat dakpana, jedakode an'chingni jatni bimungba mikkim gnanggipa bimung ong'pagen, aro an'tangko "Garo" ine uiatao batesa rasong chagen.

Je manderangni ja'dilrangon A'chik jatni an'chi jokenga, uamang jatangko jegaljachina; indiba batesa jatangko chuatna jotton ka'giparang ong'china. Salrang re'baaha, hai jatangko skia man'gipa jat dakatpana, jedakode "Garo" ine mingarion gipin jatrang a'brini skia man'gipa jat ma'malsa ine uigen aro una an'chingba rasong man'pagen.

Detangtangko skie ra'na dakchakenggipa ma'a-parang gisik ra'pabo. Na'simang detangtangko poraiatna dakchakanio badita gisik nangenga inditan na'simang jatangni mikkim ba rasongko breenga. Poraigipa A'chik sakantian gisik ra'pabo. Na'a kamtango badita gisik nange, jotton ka'e rake kam ka'enga, inditan na'a jatangni mik-kim ba rasongko breenga. Maiba bostuko antioniko breon badita bang'e damko on'a, inditan ua bostuko man'a altua. Poraiatna

*Captain Williamson A. Sangma*

dakchakgipa ba poraigipa sakantian kamtangtango badita gisik nange rake kam ka'a, inditan jatko chuatna altua.

Sal rebaenga, A'chikrangba ruutgija bilsirangni ja'manon skia man'gipa jat ong'pagen.

Williamson A. Sangma,  
Serampore.

(Kosako Capt. Williamson A. Sangmani seanirangko poraie chanchie niode, uni dambemiting salrangonin A'song aro jatangna ka'sagipa aro kam ka'na tarisamsogipa gita nikna man'a. Mandeni bewalko uni chanchianirangon paraka. Chanchiamatangko pangnan kamrangchi chusokata, Uni jatna kam ka'anirangchi da'o ia chasongrango A'chikrang skia man'giparang ong'rorobaengaha ine agangenoba mamung gualani dongja. Ia chasongrango A'chikrangba indakpile jaman-chakenggipa jat ine agana man'jawaha. Capt. Williamson A. Sangmani jatna kam ka'arangni gimin angni jamangipa seanirangko poraie adita ma'sina man'gen.)

# V

## **CAPTAIN WILLIAMSON A. SANGMA-NI SASON-NI BIDINGO JAK ON'E KAM KA'NA SKANG GARO, KHASI ARO JAINTIA A'DOKRANGO ONG'SOENGGIPA OBOSTARANG :**

(Assam-ni a'dokrango donggipa Garo, Khasi aro Jaintia Hills-ni manderang British Sason-ni somoirang intalan an'tangtangni jatni gamchatani aro A'song-chiga rakie nirok-sandiani kamrango namen chanchi-bewale kam ka'anirang dongachim.)

### **Garo Hills :**

1866 bilsini July jani 12-gipa tarik intal "Garo Hills" ine minge district ma'ate Lt. W.J. Williamson ko Assistant Commissioner dake watatchengaha. 1867 bilsio ua Garo Hills District-ni Deputy Commissioner ong'chengaha. Bilsio 1870 intal, Godwin Austinsa Garo Hills-ko ma'eke district-ni map-ko tarina gita a'simarangko tochengaha. 1871-72 bilsirango Mr. Bellety Garo Hills-ni topographical Survey ba toeniko dakchengaha. Uororo somoio Mr. Allen aro sakgipin un baksa ki'tap segipa manderang Garo Hills-ko A'chik jakgitelgipa manderangni A'dok-chigarang ong'a ine janapaha. British sason kagiparang A'chikrangko rokomari ka'mikenatani kamrangchi aro kimalanirangchi an'tangtangni ning'ona rabaaha. Ka'sine ka'sine an'tangtangni bilni ning'o done rokomari sinjetanirangkoba dakaha. Ua sinjetanirangara :

1. A'chikrangni mitam songrango sak sotbongaprak dake sipaini a'tiprangko done, sipairangchi A'chik manderang rokomanti kalake sinjetanirangko manaha.
2. Bang'a A'chikrangni A'dok-chigarangko watchange Garo Hills-ni map-o chapatjaha aro ua a'dokrango gipin a'kaweni manderangnasa, "Zamindar-ni

a'dokrang" baksa chapatskaaha. Ua a'dokrangara, Salgrochi A'chik manderangni jak-gitele game cha'enggipa bang'a a'arangan ong'achim. Jekae : **Habraghat Perganah, Mechapara, Kalumalupara, Singimari, Putimari, Koraibari aro Rohamari** a'dokrangon ong'achim. Salgipengchi : **Kulmakanda, Nalitabari, Haluaghat, Susung, Durgapur, Sherpur** aro **Sribordi** thanarangni a'dokrangon ong'achim. (Iani gimin E.T.Dalton, an'tangni ki'tap, "Tribal History of Eastern India." 1978- jak 58 gipao rongtale mesokaha, aro una agreba bang'a manderangni seanirangoba iarangni gimin name janapanirang donga.) Sonaram R. Sangmani giticham see rakianirangoba nikna man'a.

3. Pangkingimin A'chik song-nokrangko rikbrange bang'a a'dok-chigarangko British Sorkari a'kange bol-wa'a ripingani biaprang dake bilsianti bariroroataha.
4. Begal sikani (Forced labour) bewalrangko dake A'chik manderangko skatang kamrangna jakkalani aro iarangna mongsongbatgipa A'chikrangni chaktogijani kamrang ong'achim.

Indake British sason kagiparangni A'chikrangko dokchepe sason ka'anirangko chaktonikjae 1899 bilsio Pa. Sonaram R. Sangma pilak A'chik nokma aro dilgiparangko Dolguma biapo okamchimonge ua namgija kamrangko warachakna aro jegalna cholrangko mesoke chanchidilchenganirangko dakaha. Indake ua, 1900 bilsio intal seanirangko dake A'chikrangni kosako namgija dakani kamrangko bon'atchina British Sorkario dabidilchenganirangko dakaha. A'chik kotokgimik nangrime dakahaoba ia dol ba ma'malni dingtangmancha bimungko donjaha. Mitam seanirango iako "Garó Agitation" inesan janapaha. A'chikrangna warachake dakdilgipa dilgipa ine A'chikrang uororo somoio Sonaram Sangmako, Sonaram Raja, aro uni jik gipako, Tokje Rani inesan mingsing minggamaniko dakaha. Sonaram R. Sangmani ka'nile warachakanichi, songantio sipairangni a'tiprangko ra'galaha. Sorkari A'chikrangko kam ka'na gita jakkalode, kamni kri tangka-paisarangko on'china gitaba British Sorkari Seachi hukumko on'aha. A'kingni nokgipa onganio songni nokni

manderang, madrang maharirangni mamung ku'patiani ba namnikpaani gri bol-waa ripingani biaprangko bariatjachinaba Sorkari see parakataha. Pa. Sonaram R. Sangma, Habraghat Perganah a'dok A'chikrangni A'doksa aro uako Garo Hills-ni map-o chapate A'chikrangnan on'pilna nanga ine Bijni Rajani Kosako seanirangko dake British Sorkario Dabianirangko dakanguaha. Pa. Sonaram R. Sangmani dabianirangara kaketan ong'a, indiba da'o somoirang agre ruutaha ine British Sorkari pasikanirangko dakaha. Indiba Habraghat Perganah A'dokni ningogipa, Nazaana Mahal ba A'arangni chugimik kajinani, tangka kaprako anna briko A'chikrangna on'e jringjrotna namgrikaniko dakchina British Sorkari Bijni-ni Rajana seachi uiataniko dakaha. Ia namgrikna dakaniko Pa. Sonaram R. Sangma namnikjaha, batesa ua chu'gimik A'arang A'chikrangnisa ong'a ine bang'bate seanirangko dake British Sorkarini kosako Calcutta High Court-o mokordomako dakdilaha. Indake krenge kam ka'engmitingon Pa. Sonaram R. Sangma 1916 bilsini August jani 27- gipa tariko saaniko man'e siangchangaha aro untal ia krenganirang bon'chongdikna nangaha.

(Sonaram R. Sangmani jatna kam ka'ani bidingo anga rongtalbate angni chapa ka'atna tarigimin, "Unpublished Documents on Garo Affairs" aroba A'chikuchi segimin, "Sonaram aro British Sorkari" ingipa ki'taprango rongtalbate janapaha. Uarangko poraie rongtalbate ma'sina man'gen.)

Pa. Sonaram R. Sangmani siani jamano A'chikrangoni darangba jatna aro A'song-chigana aro namroro-silroroatna kam kagipa mande dongtaijaha. Indake British Sorkarini ning'o bilsini 21 mangna mamung kingchakanirangko dakgijaan jripjrip dongaiaha.

1937 bilsio A'chikrangko, sakgittam manderangko Assam Legislative Assembly-ni memberangna seokaha. Uamangara Pa. Jobang D. Marak, Pa. Janggin Lasker (Sangma) aro Pa. Benjamin Ch. Momin ong'achim. Indiomangba uororo somoirango A'chik A'songo pangkinggipa Sason-ni bidingo jak on'e kam kagipa dol ong'katkujachim. Batanggimin A'gilsakni ngigipa dalgipa dakgrikani somoio, dakgrikani a'bao kamko

ka'na "Garó Porter Corps" dolko bikotaha aro uamangara mongsongbate Burmani a'jarango kam ka'na mangsongbatachim.

A'chik A'songo sason ba Politics-o jak on'e mongsongbatgipa dilgipa manderang sakantian ia dakgrikanio kam kagipa manderangsa ong'bataha. Indake 1946 bilsio gnigipa A'gilsakni dakgrikanio kam ka'e rebapilmano Pa. Emonsing Manda Sangma aro Tura Baptist Mission-o kam kagitcham, Pa. Singdon Koksi Sangma, sakgni A'chik A'songna aro A'chik jatna mamanti-ni bidingo namroro silroroatanina miksonge kamrangko ka'na dingtangmancha dolko nakatatchengaha. Ua dolni bimungko, "GARO NATIONAL CONFERENCE" ine mingchengaha. Ia dolni skanggipa tombimonganiko Tura songjinmao 1946 bilsini November jao ong'atchengaha. Ia dolan A'chik manderangni chong'mot A'chik-ni dakbewal aro kabewalani niam aro unbaksana A'chik jat ong'chongmotaniko mikkangchi ripingangkuna kamrangko kagipa dol ong'aha. Sason-ni bidingo jak on'e kam ka'anirangna ia dol uororo mikpakma on'anirang dongkujachim. Bangbata somoirangon ia dolara songsalni janggi tangani kamrango bakrangko jako ra'e kamrangko dakaha. Ua somoirango ia dolni Padot (President) Pa. Modi K. Marak aro Pa. Emonsing Sangmara General Secretary dake ong'chengaha. A'bachengarango ia dolara A'chik A'songni song-nokrangona gipangkujachim. Mongsongbate Turao songdonggipa manderangsan bak raengkuachim. Me'ama, me'apa, pante me'tra aro bi'sa desa sakantian ia dolo gisik nange dilgiparangko jarikaha. Pilak kamrangon ku'mong nangrime kamrangko ka'tokaha.

India A'song jakgitelko man'genoba, Indiani Salgro salaram a'brirangni A'dokrangko jedake, Garó, Khasi, Jaintia, Mizo, Naga aro uaranggita dingtang dingtang biaprangni manderang an'tangtangni dakbewal-kabewal aro jatantini ripingbaenggipa bewal aro niamrangko ripingangkue namroroatangkuna cholrangko on'gen ba on'jawa, iani a'sel kenchaksoanirang ong'kataha. Uandake Indiani bang'a jamanchakenggipa dol ba ma'malni manderangna jajrengsoani ong'aha. Iarangni bidingo champengsoani kamrangko dakna jatangtangni cholon aro bewalrangko gimatagija namroro-silroroate ripinganirangko dakna

bilrangko man'pana aro iana rake kam ka'na dingtang dingtang dol ba kotokrangko jatantian ong'ataha. Indake Garo Hills A'doko-ba "GARO NATIONAL CONFERENCE" ni dolan sason-ni bidingo nangchape kam ka'gipa dol ong'baskaaha.

1947 bilsini August jani 15 gipa tariko India A'song jagitelko man'aha. Indake ong'engon a'bri a'dokrango dingtang dingtang Sason-ni kamrango chanchie kam ka'na nanganirang nabaaha. Khasirangoni dilgipa saksa, Pa. Macdonald Khongor Turaona re'bae dingtangmancha A'bri A'dokko dabiani bidingo A'chikrangna janape ku'mongnagita re'baaha. Indake Turao tom'e chanchianiko dakdilchengaha. Bang'a Garo National Conference-ni dilgiparang ua tomanio dongpaachim. Indiba iana darangba gisik nangjaha. Jamano Pa. Jenden Ch. Marak iani gimin bang'a manderangnan agananiko dakahaon bang'arangni gisiko chinaptokaha. Pa. Jenden Ch. Marak an'tangan Garo National Conference-ni General Secretary dakeba kamko ka'aha. Ia somoion Garo National Conferenceni pal Garo National Council ine bimung donskaaha.

## VI

### **CAPTAIN WILLIAMSON A. SANGMANI GARO NATIONAL COUNCIL KAM KA'NA A'BACHENGA**

1946 bilsini February jao Captain Williamson A. Sangma gnigipa A'gilsakni dakgrikani a'bao kam ka'aoni Turaona rebapilaha. Ua apsan bilsion Garo Hills Multipurpose Coöperative Society-ni Managing Director ong'e kam ka'aha. Indiba 1946 bilsini bonangachibaraan ua kamko wataha. Uni bak tapan ua Rural Development Officer dake kamko ka'aha. Indiba Capt. Williamson A. Sangma-ni gisiko Politics ba A'songtangna kam ka'na miksonganiko Sorkarini kamrangko ka'anichi champengna man'jaha. Indake ua 1946 bilsion Rural Development Officerni kamkoba wataiaha aro ua apsan bilsion Garo National Councilni President ong'skaaha.

#### **GARO NATIONAL COUNCIL SASON-NI KAMRANGKO JAKO RA'E KA'NA A'BACHENGA :**

Captain Williamson A. Sangmani Garo National Councilni Padot ong'e 1952 bilsio District Council-ni Member-rangna seokani somoirangonisa Garo National Councilni dol sason-ni bidipgo jak on'e kam ka'na a'bachenganirang ong'baaha. Ua somoirango Garo National Council dolonikon District Council aro State Assemblyni memberrang ong'gnina seoke susaanirangko dakchengaha. Garo National Councilni dol susaanirango chegipa ong'gen ba ong'jawa, mamungba chanchisamsona man'anirang gripitichim. Indiba ia susaanio Assam State Assembly Memberang sakbrionide sakgittam manderangan Garo National Council-ni dolonin ong'aha. Ia sakgittam G.N.C. doloni saksade susana nangijaan member ong'na cholko man'aha aro uan Capt. Sangmaan ong'achim.

District Council memberna susaanio G.N.C. dolni chu'gimik damchichet biaprangoniko damchibri biaprangko man'aha aro uarangni ge'bonga biaprangode susaani grian



### *Captain Williamson A. Sangma*

member seokanio man'tokaha. 1952 bilsio memberangko seokanio chusokgipa ong'anian Garo National Council dolni A'chik a'songo bilakbatrorobaaniko mesokna chuonga aro ua Capt. Williamson A. Sangmani nama dilgipa ong'aniosa pangchakaha.

Garo National Councilni dolrangan memberna seokanio bang'batgipa ong'e Garo Hillso District Council sorkariko rikchenggipa dol ong'aha. Capt. Williamson A. Sangma-an Garo Hills District Council Sorkarini Matbol (Chief Executive Member) ong'chengaha.

Ia somoirango dolgipin susaani bakko jako ra'pagipa dolara Pa. Phukan N. Sangmani nakatchenggipa District Congess Committee-an ong'achim. Pa. Phukan N. Sangmani siani jamano Pa. Emonsing M. Sangmaan District Congress Committeeni Padot (President) ong'skaaha aro 1952 bilsini Memberangko seokanio Congress-ni dolko uan dakdilaha.

Pa. Emonsing M. Sangmaan Garo Hillso Garo National Conferenceko ong'atchenggiparangoni saksa ong'a. Ua 1952 bilsio ma'eke Garo National Conferenceni dolni dingtange pilak kamrangan dakdilskaaha. Indiba A'chikrangoniko ua an'tangni dolona salbana bang'e man'jaha aro ia dol gipin ja'napgipa Garo Hillso songdonggipa jatrangni dolgitasa ong'batskaaha.

Pa. Jenden Ch. Marakba somoisao Garo National Councilni General Secretary ong'achim. Indiba ia dolni ma'ekaha. Uni jamano ua A.A.C.K. ba A'chik A'songko Chelchakgipa Kotok ingipa dolko nakatatskaaha. Indiba ua dolko A'chikrang bang'an ra'chakjaha. Indake ua dolba namrorona man'jaha.

A'chik A'songo dingtang dingtang Sason-ni dol ba mamalrang ong'katahaoba Captain Williamson A. Sangmani dilenggipa Garo National Councilni dolan A'chikrangko bang'bate bakrimna man'bataha aro Districto bilakbatgipa dol ong'rorobaaha.

### **Khasi aro Jaintia Hills :**

Khasi aro Jaintia A'dokrange Britishrangni songga gamitingo jattangni jakgitelaniko ripingna U-Tirot Singh-ni

British songgagiparangni kosako jak de'e ka'nilani gisikrango tangkame dongkuaha. Indiba ruuta bilsirangnan mamung krengchakanirang donggijaan Britishni Sasoni ning'o donge salrangko reataha. Ruutbea bilsirangna gisiktangtango tangchipile dongenggipa jakgitel ong'anina krengani gisikrang aro uarangna ka'nilani kamrang Khasi aro Jaintia a'dok-ko chu'gimik jakgitel ong'e sason- ni kamrangko maekaniko dakna miksonganirang ong'kataha. Khasi aro Jaintia A'doko dingtang dingtang ma'atgimin A'khingrangni chu'gimik dam 50 Syiemrang donga. India jakgitel ong'na skangan jat aro A'dokrangko chel'chakani kamrangko dakna aro A'dokko dingtangmancha ma'eksrange Sason-ni bilko jako ra'na kam ka'anirangko dakna pilak Syiemrang nangrime "Khasi National Durbar" ine bimung done dolko bikotaha. Iako 1923 bilsion ong'atchengaha. Indiba ia dolni kam ka'anirang inditana tarake re'anirang ong'jaha ine nikna man'a. Ia dolni mitam chanchiani aro kam ka'anirango Khasi manderangni dilgiparangoni saksa, gisik niksenggipa aro uisamsobegipa, Rev. J.J.M. Nichols Roy "Khasi National Durbar" dolni chanchianirango chu'ongnikjaha aro mitam miksonganirangko ua jegalaha. Indake ua sason-ni a'bakuo apalbate chanchianirangko nakatataha. Rev. J.J.M. Nichols Roy Khasi manderangni gisepo dilgipa ong'e jatni re'mikkangani kamrangko bang'a kamrangko dakdilgipa ong'aha.

1947 bilsio, August jani 15 gipa tarik intal India jakgitel ong'ahaon India apalbegipa A'dok-ko sason ka'ani bidingo niamrangko tarina ning'tubee chanchibewale kamrangko a'bachengatani ong'engachim. Uororo somoio Indiani Salgro Salaram a'brini Assamni A'doko donggipa manderangni gisepo Rev. J.J.M. Nichols Roy saksa dilgipa ong'e Assam Sorkarini Local-Self-ni Minister ong'engachim. Ua a'brio songdonggipa manderangni gimin ning'tubee aro name mikkang ki'sang chanchisamsae kamrangko ka'na a'bachengaha. Maina, ua salrango a'brini jatrangni gisepo adita jajaanirangko ua namen ma'siaha.

Indiani Salgro-Salaram Assamni a'bri a'dokrangko songdongenggipa manderangni gadangrang aro janggi tangani obostarang onbatgiparang ong'anio, chu'gimik obostarangko Indiani Sason-ni niamrangko tarina skangan

*Captain Williamson A. Sangma*

namekae sandichenganiko dakchina ua janapanirangko dakaha. Jedakode ia ja'manchakenggipa jatrangni de'doani kamrangko dakna dingtangmancha cholrangko Sason-ni Niamo ra'gate uagita kam ka'na man'a gita Rev. J.J.M. Nichols Roy Indiani matbolranggo dabianirangko dakaha. Uni ia ku'patianirangko ra'chake A'brio donggipa manderangni janggi tangani gadangrangko name sandichenge nie rongtale uiatanirangko dakchinagita A'brini A'dokrangona, "Bardoloi Sub-Committee" ko tik ka'e watataha. Ia dolni dilgipa mandea Assamni Chief Minister ong'enggipa, Pa Lakhapria Gopinath Bardoloi ongachim. Iarang ong'engon Khasi aro Jaintia A'dokni manderangba bang'an namnikpaaniko mesokaha.

# VII

## BARDOLOI SUB-COMMITTEE-NI SANDIE SEE ON'ANIRANG

1. Indiani Salgro-Salaramo donggipa, Assamni ja'manchakenggipa A'brini manderang an'tangtangan sason-ni bilrangko jakkale, Reserved Forests-na agre, a'dok-chigatangko jakkal-ripingna aro jatni bewal aro manianirangko ripingna ba songsalni niamrango pangchake an'tangtangan namroroani kamrangko dakna, "DISTRICT COUNCIL" Sorkaritangko dake bilrangko pakwatchina seachi ia Sub-Committee mesoke on'aha.
2. Dongimin District Council-ni ning'on (Sianiona sasti on'ani aro bilsibonga ba una bate patoko donatani bilrangna agre) gipin bichal-achal ka'ani bilrangkoba on'jolna nanganirangko agan-janape ku'patianiko dakaha.
3. Primary Schoolrang, Dispensaryrang aro indonga chonchongipa daka-rika, skia-poraiani bidingrangoba bilrangko District Councilna jakkalna aro chu'gimik jaktangchin chalaina pakwatchina ku'patianirangko on'jolaha.
4. District Council ba Regional Councilrangko done mitam a'ani kajinarang aro tangka paisarangko jakkalna bilrangkoba District Council Sorkarian jako ra'china seanirangchi me'soke on'aha. Iarangko dakanichi Indiani Salgro-Salaram a'brini a'dokrang songdonggipa manderangna namroro-silroroani bidingo bang'a namgnirangko rabaani ong'a. Uarangan a'brio songdonggipa manderangni nangnikanirangko chu'sokatgipa kamrang ong'a ine Bardoloi Sub-Committee uiatanirangko dakaha.

Kosako janapgimin namgipa sandie on'anirangko mesoke on'anirangna agreba dingtang dingtang cholrangko Jedake :-

1. State Sorkarioniko mitam tangka-paisarangko jakkalna man'ani aro.

2. State ba Central Sorkarini chimonggimin tang-ka-paisarantoniko mitam bakrangko District Council-ba manpaani bilrangkoba mesokjolaha.

Iarang baksana a'brio songdonggipa manderangni bang'a nengnikanirang aro nangnikanirangkoba seachi rongtale janapjole on'aha.

Bardoloi Sub-Committee-ni ia agan-mesoke onanirango pangchakesa India A'dokko Sason ka'ani niamrangko tarigimin Ki'tap (Indian Constitution) ni bichapo, "SIXTH SCHEDULE" ine done Assamni pilak a'brini a'dokrangko nirokanina "DISTRICT AUTONOMY" ko dakna bilrangko ma'ate mesokaha. Iarangan Rev. J.J.M. Nichols Roy-ni bilsibrina jatni dilgipa ong'na seokako man'miting somoirango jatni namgnina ka'nilani biterang ong'a aro a'brini a'dokrangna jaktangtangni bilchi sason ka'ani bimangko ba "Autonomy" ko ong'atna mesokdilchenggipa dilgipa mande ong'aha.

# VIII

## **CAPTAIN WILLIAMSON A. SANGMA A'CHIK A'SONGO A'CHIK MANDERANGNA AUTONOMY-KO RAGATCHENGA ARO DISTRICT COUNCIL SORKARIKO RIKCHENGA**

1948 bils i intalan Captain Williamson A. Sangma Garo Hills National Council-ni Padot ong'e A'chik dolko re'dilbagipa ong'aha. Ua songsongantiona reroroe bang'a A'song Gore rakipagipa jat ong'a ine me'sokna gita Capt. Sangma, A'khingrangni maprang aro wa'rengrang baksa A'khingni Nokmarangko Gauhationa redilange dabianirangko dakdilaha.

A'chik A'song (Garo Hills) Autonomous districtrangni gisepo dams a ong'paa ine bang'a sakirangko Bardoloi Sub-Committee-na mesoke on'aha.

Jakgitelgipa Indiani sason ka'ani Niam Ki'tapo nanganirangko see tariman'aha aro uko 1950 bilsini January jani 26-gipa saloni gital Sason-ni Niam dake ra'gatchengaha. Ia sason-ni Niam Ki'tapo donsogimin Sixth Schedule'ni niamrango pangchakesa Assam A'dokni A'brini districtrango 1952 bils i intal Autonomous district-ko ong'atchengaha. Autonomous districtantion District Council Sorkari damprak donga aro uan State Sorkarini bewalrangogita pilak kamrangan ongangbata. District Councilo sason ka'ani bewalrangko Assam Autonomous District Constitution of District Rules, 1957-o gita jarike Sorkariko rika. Ia dongimin niamrango pangchake districtni jolantioniko sak 18 memberangko bilsibongaprakna ma'ate jinmachi seokaniko daka aro sak 6 koara Governorchi seokskae District Council Sorkariko chalaia. Indiba Garo Hills, Sixth Scheduleo dongimin Paragraph gni gipani dontai gipa paragraph 7-gipa git a changgipino Governor sakgnikos an seoke, jinmachi sak 22-ko seokaniko dakskae 1957-71 bilsirango district Council sorkariko chalaiskaaha.

1969 bilsio ia niamko namdapataniko daktaiaha. Ia namdapatanio aroba Assam Re-organisation Meghalay a Act-ko daktaiaoni gita District Councilrang memberangko sak 24-oniko sak 30-ona bariataha. Ia memberangoniko sakbrikosan Meghalayani Governor seokna nanga. Indiba da'o sak 27-ko jinmachi seoke, gipin sakgittamkosan Governor seoke watatgen ine Councilni uiatanigita 1972 bilsionin memberrangko seokaniko ong'atskaaha.

Garó Hills District Council atchichengahaon Captain Williamson A. Sangma-an skanggipa Garó Hills Dist. Council Sorkarini Matbol ba Chief Executive Member ong'chengaha. Atchidaldalgipa Garó Hills-ni District Council Sorkariko ua sokkane-dingdinge ja'dil bolchaataha. Ua kamara namen rakbegipa, bal jrimbegipa ong'chongmota. Ja'griko ja'ram reatna, ku'griko ku'skina aro ku'o du'e dalrrooatna altuagipa kamrang ong'ja. Iagita District Council Sorkariko rikchenganioba apsan obostarang ong'a-ha. Sorkarini kamrangko ka'chakna biapan dongchengkujachim. Indake Baptist Mission Bible School nok gitchamosa Office-ni kamrangko ka'chakna a'bachengaha. (Ua nokko daode rugalaha) Ruutgija somoirangni gisepon Captain Sangma bimchipe an'tangko on'kange dontonggija kamrangko ka'beanichi montol dakgipa gita, peleki man'gipagita rikrak rikrak District Council-ni Office, kam ka'giparangni dongchakram aroba District Council Memberangni janengtakram (Hostel) nokrangko buring bolgrimrangko pangsanggilgil rongtalate rikatokaha. Matburunrangni dongram, jajrenggipa biap, me'mangrangna nappijagipa a'damrang basakgalgal sorokrang ta'apdildil, pang'sanggilgil, romano rotainagitik, re'mano re'tainagitik aroba nikmano niktainagitik dakpiltokaiaha.

Bilgrigipa, atchidaldal Garó Hills District Council rang' sanan bilsokbajok aro darangni dakchakani grian ja'tango chadengna mangrakgipa ong'baaha. Indake Captain Williamson A. Sangmani rikdilanichi Assamni pilak a'brini a'dokrangni District Council Sorkarirangni gisepo Garó Hills District Councilan nambatsranggipa District Council Sorkari ong'aha.

District Council an'tangan niamrangko dakgipa aro sason ka'gipa Sorkari ong'jola. District Council-ko a'bachengmitingo



*Captain Williamson A. Sangma*

bang'a niamrangko tarina aro sena nangaha. Ia kamrangko Capt. Sangma an'tangan skotong ong'e walsal nengtak-nengrakgija kamrangko ka'aha. On'timitiba somoiko gimaatgijan an'tangko on'kange kam ka, chongmotaha. Un baksa kamrangko dakchakgiparangba walchip- salchip dake uko chusokatna bakrimpaaha.

Captain Sangma, District Councilni Office aroba dongchakani nokrangko rikmiting somoirango an'tangan pring attam nirokanirangko dake matchotataha. Nanganirangna songre songgabatani somoirangna agre, ua salsalantion Officeona re'e kam ka'na aratjaha. Ua Officeni somoi ong'na skangan Office nokrangko rongtal-an'talatani bidingo nirokrongaha. Gisep gisep Office kuturi damantiona reroroe nirokjringaniko dakaha. Office nokosan ongaija, District Council-ni chugimik biaprangni rongtalani kamrangkoba an'tangan nirokjringaha. Indake uni District Council Sorkarini skotong ong'e dilengmitingni somoirango biaprang dongansenga aro namen mikkim chaa. Uororode Garo Hills District Council Office aro dongchakram a'damrangko re'paknan misil misil mingsingbegipa Rajarangni dongramranggita dakmanpila. Pilak biaprangko pul'angchi nitoata. Council Office dulni bijangchio tarigimin pokrirango pangnajolna jokatenggipa chirang nikegipa sakantikon an'saoata. Biaprang jedake rongtala, indaken Office-ni pilak kamrangan rongtala aro bildik bildak dakanirangdongja. Salantion kamrangko matchote dakronga. Song-nokni manderangni nangnikani kamrangko altuae matchote on'a amgipa Office ong'ani gimin darangni nengnikanirangba ong'ja. An'tangni ning'o kam kagipa sakantinan simsaka aro nengnikanirango nirokronga.

Iarang ong'engon, District Council Sorkarini namroroanirangchi A'chik jatgimikni tangdobaengani obostarango mesokna chu'onga sakirangko on'a man'a. Ia namani aro chusokani kamrangko A'chik sakantisan uiani ong'jaha. Indiba District Council Sorkariko mingsing minggamanina salantion ong'nasipile a'dok gipini manderangba nina rebarongaha. District Council sorkariko rike A'chik a'songna bang'a namroro-silroroani kamrangko on'aha.



*Captain Williamson A. Sangma*

Garó Hills District Council Sorkariko rikanio Capt. Sangma-ni dakna amani, jatna kam ka'anio bang'a gunrang donga ine jatska manderangonisan ong'gija jatgipinrangoniba bang'bate masirorona a'bachengaha.

A'songko namroro silroroatani kamrangna ua bangbata tangka paisarangko State aroba Ma'mong Sorkarioniko dabina cholrangkoba man'aha. Captain Williamson A. Sangmani District Council Sorkariko rike kam ka'anirangko nipilataie nie chanchiode, Uan Garó Hills Dist. Council Sorkarini pangchakani krong ong'chongmota. Jattangni Sorkarini pangkimaniara, jatgimikni rasong aro mikkimko rakia. An'tangko jatni chong'motgipa dilgipa ong'a ine parapea. District Council Sorkarini skotong ong'e ua chusoksrange Sorkariko rikgipa aro chalaigipa ong'aha.

## **IX**

### **DISTRICT COUNCILKO CHALAIANI ARO SASON KA'ANI BEWALRANG**

Janapbagimin gita jakgitel Indiako sason ka'ani niamrangko 1950 bilsini January 26 gipa tarikni intal A'songo ra'gatchengaha. Ia niam Ki'tapo donsogimingita Sixth Schedule-o pangchake Garo Hills Districtoba 1952 bilsini intal Autonomous Districtko ong'atchengaha. District-o District Councilko done mitam mongsonggipa kamrangni bakrangko jako ra'e sason ka'aniko District Council Sorkari a'bachengataha. Indiba British-ni sason kamitingogitan Autonomous districtrango Deputy Commissionerko donangkue mitam kamrangko nirokanirangko dakkuaha. Indake mitam sason ka'ani bilrangara Deputy Commissioner-ni jakon ong'kuaha. Deputy Commissionerni sasonni bak aro dolgipinara District Councilo Chief Executive Memberni ning'o ong'skaa.

#### **Deputy Commissioner-ni sasoni bakrang :**

Deputy Commissionerko dakchakna Extra Assistant Commissioner aro Sub-Deputy Collectorko rakia. Districto niam aro tom'tomani kamrangko nirokna gita Deputy Commissionerni jakon chu'gimik bilrangko pakwata. Deputy Commissionerni ning'o Police-ni dolko niroknagita saksa Police Superintendentko dona. Iarangna agreba Deputy Commissionerni ning'o dingtang dingtang dolrang donga jedake: Gama ge'ani (Agriculture), Daka rikani (Industry), Na'tok na'bat jilani (Fishery), Sorok, nok-jam aro rama jal'anrangko tariani (P.W.D.) Sanna bannani ba samra sampilani (Medical), Agan parakani (Information and Public Relation), Nangrime bosturangko palani aro breani (Cooperative), Sual ra'ronani kam (Civil Supplies), An'seng baljokanina chirangko sualani (Public Health), Songdongna dakchake on'ani (Relief & Rehabilitation), Leka poraianio niroke sandianirang (Inspector of Schools), Jilani

matburung-rangni biatirangko sanna bannani (Veterinary) aroba sualgimin Development Blockrangkoba Deputy Commissioneran nirokanirangko daka. Bichal achal ka'ani aro jrimgipa dosni kri sastirangko on'anirangba Deputy Commissionerni jakon ong'a. A'songo golmal ji'jaanirang aro tomtom ong'a-nirangko rakiani kamrangba Deputy Commissionerni jakon ong'a.

### **District Councilni sason ka'ani bakrang:**

Districto District Council Sorkari mitam bakrangko ra'rone sasonni jako ra'an baksa districtni namrroani kamrangko chalaigipa ong'baskaaha. Districto dingtang dingtang bakrangko suale, biap damantioniko jinmani namnikachi seoke watatgimin member-rang sak 27 donga aro unbaksana Governorchi seokgimin sakgittam memberangko man'chapa. Ia District Councilo tom'aniko dilgipa (Chairman) saksa aro uko sakgipin memberang seokskaa. Uko Legislative-ni Secretary dakchaka.

District Council Sorkarini kamrangko bakgittam dake sualna man'a.

### **1. Executive, 2. Legislative, aro 3. Judiciary.**

District Council Sorkariko chalaianio Chief Executive Memberan skotong ong'e kamko ka'a aro uko dakchakgipa sakgni Executive Memberangdonga. Executive Memberangko Chief Executive Member-ni kupatianio pangchake Governor uamangko kamo donata. Dingtang dingtang mongsong-batgipa kamrangko Executive Memberangna nirokanio ma'eke on'a. Indake District Councilini ning'o man'goppipa kamrangdonga. Uarangara :

1. A'kingni aro a'palni kajinarangko chimongani kamrang.
2. Nokma a'khingrangni ning'o donggipa bol-wa'a aro indake dingtang dingtang jakkalani bosturangko nirokani aroba uarangko jakkalanina on'na nanggni kajinarangko chimonganirang.
3. Sorok-jalangrangko tariani (Civil works).
4. Song songantio leka porako namatani kamrang aro Primary Schoolrangko nirokani.
5. Song ba gittimrangko nirokani aro namrroatanirang.

*Captain Williamson A. Sangma*

6. Songre songgabatani namgipa cholrang (Transport).
7. Nanarokom kajina ra'gilanirang (Taxation Branch).
8. Songdong a'chagitalrangna biaprangko tik ka'e on'ani kamrang (Relief & Rehabilitation).
9. Niamrangko dakani aro bichal ka'ani kamrang.

Bichal ka'ani kamrangko districto bakgni dake sua : Baksagipara Deputy Commissionerni jako aro bakgipinara District Councilni bilo ong'a. Ia sason ba bichal ka'ani bewalrangara Indiani Niam Sason-ni ning'o dongimin-rangosa pangchaka. Mesokanigita : (a) Sixth Schedule, (b) Garo Hills Autonomous District (Administration of Justice) Rules, 1953 aro (c) Rules for the Administration of Justice and Police in Garo Hills District, 1937.

District Council an'tangan niamrangko dakgipa aro sason kagipa dolba ong'a. Kamao mesokgiparangna niamko dakna bil gnang jekae:-

1. A'arangko jakkalani bidingo.
2. State Sorkarini a'kanggimin buiringrangna (Reserve Forests) agrede Districto buiring bolgrimrangko ripingani kam, a'ba o'e cha'anio chiring ba chibimarangko dim'penge chi ra'ruraani kamrangko dakna. ~
3. A'rongga o'e cha'ani palo maiba gipin gipin nambata game cha'ani cholrangko dake on'anirang.
4. Town Committee, village Council aro Courtrangko songna.
5. Rural Police ba gittimrangko sason ka'anio aro jinmani an'seng baljokanirangko nirokani kamrang.
6. A'king ba songni Nokmarangko seoke donna.
7. Nokdangrango man'rikanirangko tik ka'e on'na.
8. Do'si do'dokani ba bia-baru ka'ani bilrangko on'na.
9. Jatni dakbewalrangko sandie tik ka'na aro namdapatna.

District Councilni daggimin niamrangko Governorni namnike soi ka'ani jamano District Council Sorkario niam dake ra'gata. Kosako janaggiminrangna agreba mamong Sorkarini Parliament aro State Sorkario daggimin niamrangkoba District Council Sorkario jakkalani ong'a.

### *Captain Williamson A. Sangma*

Indiba ua niamrangko Governor namnikjaode ragatgija ba dingtangible jakkalskanaba man'a. District Council Sorkari, State Sorkarini je niamkoba chu'ongnikjaode an'tangtangni namnikaniogita namdapate uarangko jakkalnaba man'a.

**District Councilo bichal ka'ani rokom gadanggittam donga :**

1. Village Courtko Lasker sak sotbongabongani Elakarangko man'gope ge'prak dona. Laskeran ua Court-ni President ong'a.
2. Onkalgipa District Councilni Court aro iano Judicial Officer bichal ka'aniko daka.
3. Chukalgipa gadangni District Councilni Court aro ianoara first Class Magistrate bichal ka'aniko dakskaa.

District Councilni tom'anirango serikanirang aro dingtang dingtang kamrangni bidingo seanirangko District-ni Deputy Commissionergitasa Governor-na watatna nangachim. Indiba indonga bang'a niamrangkon dingtangible aro namroroate Governor-ni pakwatani bilna Deputy Commissioner-ni mamungba nangpagijan Councilo rachakgimin bilrangko District Council Sorkari joljol Governorna watatronganiko dakataha. District-ni Deputy Commissionerchi mamungba nangatpagi-jaan District Council Sorkariko chalaienggipa, Chief Executive Member State sorkari baksa agangrikanirangko dakanikoba dakataha. Ia indake Deputy Commissionergita ong'gija District Councilni State baksa joljol agangrikanirangko, Garo Hills District Councilni skanggipa Chief Executive Member ong'chenggipa Captain Williamson A. Sangmaan dakchenggipa ong'aha. Indake Districto District Council Sorkariko rikchenga intalan sason ka'ani bewalrangba dolgni ong'baskaaha.

Garo Hills District Council Sorkariko 1952 bilsio a'bachengataha. 1954 bilsionisa Councilni tomchakram aro Officeko Hawakhanao gital rikgipa nokona jitangskaaha. Ia gital District Council Sorkarini skanggipa matbol ba Chief Executive Memberara Captain Williamson A. Sangmaan ong'a. Uko dakchakgipa, skanggipa Executive memberrangara, Pa. Modi K. Marak aro Pa. Harison W. Momin ong'achim.

*Captain Williamson A. Sangma*

**Garó Hills District Council Sorkarini pangchake  
chalaiani kamrangna ragatgimin niamrang :**

**THE  
GARÓ HILLS AUTONOMOUS  
DISTRICT COUNCIL**

**Acts, Rules and Regulations  
as amended upto  
31st December, 1968.**

**CONTENTS :**

1. The Garó Hills (Abolition of the Garó Hills District Fund Committee) Act, 1952.
2. The Garó Hills Cotton Trade Regulation, 1952.
3. The Garó Hills District (Jhum) Regulation, 1954.
4. The Garó Hills District (Revenue Assessement) Regulation, 1953.
5. Garó Hills District Fund Rules, 1952.
6. The Garó Hills Autonomous District (Administration of Justice) Rules, 1953.
7. Garó Hills Local Rate Regulation, 1953.
8. The Garó Hills Cart, Cycle and Boat (Taxation) Act, 1953.
9. Garó Hills Ferries Act, 1953.
10. Garó Hills Fisheries Act, 1953.
11. The Garó Hills Grazing Regulation, 1953.
12. Notification regarding the discontinuation of the Tura Fund Committee and Constitution of the Provisional Tura Town Committee.
13. The Garó Hills Autonomous District (Land and Revenue) Regulation, 1954.
14. The Garó Hills (Christian Marriage) Act, 1954.
15. The Garó Hills Autonomous District (Prevention of Epidemic Diseases) Act, 1954.
16. The Garó Hills Autonomous (Social Customs and

*Captain Williamson A. Sangma*

- Practices) Act 1954.
17. The Garo Hills District (Transfer of Land) Act, 1955.
  18. The Garo Hills District (Professions, Trades, Callings and Employments Taxation) Regulation, 1956.
  19. The Garo Hills District (Administration of Town Committee) Act, 1956.
  20. The Garo Hills District Professions, Trades, Callings and Employments Taxation Rules, 1957.
  21. The Garo Hills District (Constitution of Town Committees) Rules, 1957.
  22. The Garo Hills District (Trading by Non-Tribals) Regulation, 1957.
  23. The Garo Hills District (Constitution of village Councils) Act, 1958.
  24. The Garo Hills District (Forest) Act, 1958.
  25. The Garo Hills Autonomous District (Social Customs and Usages) Validating Act, 1958.
  26. Garo Hills District (Awil Fees) Act, 1960.
  27. The Garo Hills Carts, Cycles and Boats (Taxation) Rules, 1960.
  28. The Garo Hills District (Residence Toll) Regulation, 1961.
  29. Notification regarding adoption of the Assam Embankment and Drainage Act, 1953 (Act I of 1954) with exceptions and modifications.
  30. The Contributory Provident (Council Services) Fund Rules, 1963.
  31. The Garo Hills Autonomous District (Chairman's and Deputy Chairman's Salaries and Allowances) Act, 1958.
  32. The Garo Hills Autonomous District (Executive Members, Salaries and Allowances) Act, 1958.
  33. The Garo Hills Autonomous District (Members, Salaries and Allowances) Act, 1958.
  34. The Garo Hills Autonomous District Cattle Taxation Regulation, 1966.

# X

## **1954 BILSIO TURAO A'BRINI DILGIPA MANDERANGNI TOMBIMONGA ARO E.I.T.U. BA EASTERN INDIA TRIBAL UNION ARO JAMANO A.H.T.U. BA ASSAM HILL TRIBAL UNION DOLNI A'BACHENGANIRANG**

Garó Hills aro uandake gipin a'brini districtrango District Council Sorkariko a'bachengataoni bilsigittam-ni jamano Khasi Hills, Jaintia Hills aro Garó Hills District Councilrangni sakgni Chief Executive Memberrang Shillongo dingtangmancha gronggrike ning'tugipa agangrikanirangko dakchengaha. Garó Hills District Council-ni Chief Executive Memberara, Captain Williamson A. Sangma aro Khasi aro Jaintia Hills District Councilni Chief Executive Memberara, Pa. B.M. Roy ong'achim.

Assamni a'bri a'dokrangó jakgitel ong'e sason-ni bilrangko dabtani bidingo pilak a'brirangni dilgiparangko Tura songjinmaona okamchimonge chanchianirangko ong'atna gita uamang sakgnini gronggrike agangrikani miksonganirang ong'achim. Indake a'brirangni dilgiparangni tombimonganiko Turao ong'atchengnagita, 1954 bilsini June jani 3 gipa tarikko salmanchie tik ka'aha.

Tik ka'sogimingita Turao ia tombimonganina dambri a'brini a'dokrangoni dilgiparang sokbatokaha. Khasi aro Jaintia, Garó Hills, Mizo Hills aro North Cachar Hills districtrangoni dilgiparang ong'achim. Salbrinakingking tom'e chanchianirangko dakaha. Assamni a'brini a'dokrangna dingtangmancha ma'eke A'bri A'dok ba "SEPERATE HILL STATE" ine minge sason ka'ani bilko dabina ian skanggipa chanchiani ong'chengaha.

"SEPERATE HILL STATE" ni ning'o Garó Hills, Khasi aro Jaintia Hills, Mizo Hills, Naga Hills, Mikir Hills aroba



*Captain Williamson A. Sangma*

North Cachar Hills districtrangko man'chatpatna miksonganirangko dakaha.

**E.I.T.U. aro A.H.T.U. ni ong'bachenganirang:**

Kosako janapbagimingita Assamoniko dingtangmancha A'brini A'dokrangni Sason ka'ani bimangko ong'atna jaku ga'e krengani kamrangko dakanio manderangko re'dilna gita aroba kam ka'ona gita E.I.T.U. ba Eastern Tribal Union ine dolni bimungko donchengaha. Jamano ia dolni bimungko A.H.T.U. ba Assam Hills Tribal Union ine mingskaaha. Ia dolni Captain Williamson A. Sangmara President aro Pa. B.B. Lyngdoh-ara General Secretary ong'achim. Gipin Memberrangara, Pa. Hagjer, Pa. Lalmawaia, Pa. Alley aro Pa. B.M Roy ong'achim.

Ia dolni miksonganiera, Ma'mong sorkarina aro Assam State Sorkarina parake kam ka'anirangchi dingtangmancha A'brini A'dok ong'ate sasonni bilrangko dabina gita miksonganirang ong'achim. Indakgipa miksonganirango bang'a manderangni gisik katongrango ding'doate batroroe bakrimanirangko man'oroaha. A'bri arimjolrango Assam Sorkarioniko ma'ekatchina manderangni a'bokanirang, chrikani ku'rangrang ong'kataha. Iarangko dakanichi Assam Sorkarina bang'a jajaani kamrang aro neng'nikanirang ong'rorobaaha. Indonga obostarang ong'engon a'songni tomtomgijanirang ong'gnirangna kensoanirangba dongaha. A'kawe aro a'brini manderangni gisepe meligrikanirang olgrokroangaha. Garo Hills district-o Captain Williamson A. Sangma an'tangni dilenggipa Garo National Councilni dolni manderangni bakrimpaanirangko aro dakchakanirangko man'oroaha, aro kam ka'an-irango bilakrorobaaha.

Naga Hills, dingtangmancha Naga A'dokko ong'atna ka'nilani bidingo aroba apan Mizoram A'dokni manderangba A'doktangni Sorkariko ong'atna miksonganio ia dolo bakrim-ma'ekaha.

# XI

## 1955 BILSIO STATE REORGANISATION COMMISSION ASSAMONA REBAE SANDIANIRANGKO DAKA

Assamo sason-ni kamrango sosojengieng ongengmiting somoirang ongengon Assamona State Reorganisation Commission Ma'mong Sorkarini watatako man'e 1955 bilsio sandianirangko dakna re'baaha. Ia dol Assamoniko ma'eke Khasi aro Jaintia aro Garo Hills districtrangko man'gope State ba A'dokko dingtangible sasonni bilrangko daktaiani bidingo sandianiko dakna gita Tura aro Shillongonaba rebajolaha. 1955 bilsio re'bae sandie niani kattarangko 1956 bilsio State Reorganisation Commission India Ma'mong Sorkarina see on'aha.

Ia dolni sandiaonigita Assamo A'brini A'dokrangko dingtangible ra'rontaiani Sorkariko ra'gatna krengani kamrangna chanchianiara gitalgipa kamrang ong'ja. 1934 bilsini October jao pilak a'brini dilgiparangni tom'e chanchiaoni gitan A'brini A'dokrangko dingtangible Sorkariko ma'atna miksonganiko nakatataianisan ong'a. Naga National Councilni dolara, Naga Hillsko Assam aro Indiaoniko ma'ekatsrange jakgitel ong'na ka'nilanirang ong'a. Dingtangmancha nangrime Goalpara, Garo Hills, Cooch Behar, Darjeeling aro Jalpaiguri A'dokrang' "KAMATAPUR STATE" ine bimungko donskae sason ka'ani bilna dabianiko dakna miksonganirangba donga. Cacharni samtangtango donggipa a'dokrangko man'gope "PURBACHAL STATE" ine donskae Assamoniko ma'eke. Sasonni bilko daknaba miksonganirang dongachim. Indakgipa dingtang dindgtang jajaani aro jingiengani kamrangko namatna gita Indiani Salgro Salaram a'brio songdonggipa manderangna bang'a namgnirangko ra'bae sasonni kamrangko kimkim ong'atna mongsongbatgipa kam onga, aroba ia kamrangko ma'mong Sorkari ning'tubate chanchianirangko dake tarake jako ra'na nanga. A'brini a'dokrangna dingtangmancha sasonni bakko ra'baanio ning'tue pilak obostarangko sandie nimanaha.

Dintang dintang Assamni bakrangko Assamoniko ma'eke sasoni bilko dabiani kamrangara, India jakgitel ong'naskang jeje dabianirangko nakatataha, uakon apsan daoba a'bachengtaianirang ong'enga ine nikna man'a. Skia-poraiani gadango, cha'a ringani obostao, bading chivalao aro songsalni bewalrango a'brini manderangni jamanchakenga-niara India jakgitel ong'na skang British sasoni manderang Inner Line Regulation-ni niamo pangchake gipin jatrangoniko a'brirangni manderangko ma'eke dintangmancha rakiani a'selsa ong'baaha ine uina man'a. Dintangmancha A'brini Sorkariko uamangni dabina nangnikaniara iaba mingsa pangchakani ja'pang ong'a ine nikna man'a. Ia somoirango man derangni mikselrorobaanio jakgitelgipa Indiani ning'o manderangni apsan gadango janggi tangpana ka'nilanirang ongkataha. Maina ia indakgipa cholrangko a'brio donggipa manderang jakgitel ong'na skangan man'pajaha. Ia indakgipa a'brini a'dokrangni obostao uamangna dintangmancha sasoni bilko rabaanio neng'nikanirang bang'en donga. A'brini manderangna uamangni neng'nikaniranggita ia dintangmancha uamangna sasoni bilko pakwatanio neng'nikanirang ong'angkugen.

Iarang pilak biap-a'damrang, sason, janggi tangani gadang, tangka paisa aro sasonko jako ra'ani kamrangko ragope chanchie nie dabianigita A'brini Sorkariko ma'ate on'aniko ra'bana neng'nikanirang ong'ku ani donga aro an'tang tangari a'doktangni manderangna namgnirangko ra'bana man'jawa. Uni gimin da'odipet pilak a'brini a'dokrangna dintang ma'eke sasonni bilrangko on'gija, Assamni ning'on bak-rengsi ong'angkuna nanga aro niamo mamung dintangatanikoba dakna nanganirang ong'na nangja.

Ia Commission-ni sandie uiatanio pangchake dintangmancha A'brini Sorkariko (SEPARATE HILLS STATE) dabianigita on'a jechakahaon a'brini manderangni gisikrang chingcharorobaaha. A'brini dilgipa manderangni gisepo dintang ong'grikna a'bachengaha. Garo Hills, Khasi aro Jaintia Hills aro North Cachar Hills nangrime A'brini A'dokni Sorkarina dabianirangko dakangkuaaha.

## **XII**

### **ASSAMONA MA'MONG SORKARINI HOME MINISTER, PANDIT GOVIND BALLABH PANT-NI REBAA**

Ua somoirango Assamo ong'enga obostarangara Ma'mong Sorkariko dingtangmancha sandie kam ka'na gita dra'ataha. Ia so'sojengjeng ong'ani a'selara, Assamo donggipa Garo Hills, Khasi aro Jaintia Hills aro North Cachar Hillsko nangrimate dingtangmancha A'brini Sorkariko dabiani a'selan ong'aha.

Iarangni a'selan Assamona Ma'mong Sorkarni Home Minister, Pandit Govind Ballabh Pant re'baaha. Uni dingtangmancha mesoke tarigimin daksoaniko Assamni dilgipa manderang namnike ra'chakaha. Ia tarisogimin kamara Tribal Union-ni President, Captain W.A. Sangmako Assamni Cabineto chapate una Tribal areani dingtangmancha nirokani kamko on'china ku'pakaha. Uororo somoio ia Departmentko Chief Minister an'tangni jako jakepengachim.

## XIII

### **CAPTAIN W.A. SANGMA ASSAM CABINET-ONI KAMKO WATA ARO ASSAMO ASSAMESE KU'SIKKO OFFICEO JAKKALNA GITA RA'GATA ARO A.P.H.L.C. NI ONG'BACHENGANIRANG**

1952 bilsio Assam Assembly-na memberangko seokanio Garo National Councilni chusokgipa ong'anian A'brini A'dokko Assamoniko ma'eke Sorkarini bimangko dingtang dakna kamrangko ka'anio bilakbatatanirang ong'aha. Indiba namgipa pangchakani a'selrangko chu'onga gita me'sokanirango adita neng'anirang ong'engpitichim. Bilsibongana member ong'ani somoirang badeangaha.

1957 bilsio gital memberangko seoktaiani ongahaon Garo National Councilni manderang memberangko seokani susaaniko daktaiaha. Ua somoio Assam Assemblyni Memberrangna seokanio, sakbrini biaprangon G.N.C. dolonin bangbate chegiparang ong'aha. Ua apsan bilsion District Councilni memberangna seokanioba dam kolgriknioni damchisni biaprango G.N.C. dolonin chegiparang ong'aha. Uarangni biap damgniode susaani donggijaan G.N.C. dolonin memberang ong'na cholko man'aha.

Congress dolchi chalaienggipa Assamni Sorkari G.N.C. dolni bilakaniko ma'siaha aro Captain W.A. Sangmako Assam Cabinet-ni Minister dakataha aro una Tribal Areas Departmentni kamko jako on'aha. Indiba Capt. W.A. Sangma bilsigninasan tom'tome kam ka'na man'aiaha. 1960 bilsio Assamese ku'sikko Assam State Officeo jakkalgipa ku'sik dake ra'gatna Assam Language Act, 1960 gipa niamko ragatna tik ka'aha.

Ia niamko ra'gate Assamese ku'sikko Officeo nanganirangna jakkalode Assamese ku'sikko poraigijagipa a'brini manderangna neng'nikanirang aro bang'a kamrangon

*Captain Williamson A. Sangma*

**engtogijanirang ong'gen ine niamko ra'gataniko a'brini manderang champenganiko dakaha.**

**Ian Assamni ning'o a'brini manderangkoba Assamese pil'atna miksongani kamsan ong'a ine a'brini manderangna dintangmancha Sorkariko dabie ra'na ning'tue chanchianirang a'brini manderangni gisepo nakataiaha.**

**Captain W.A. Sangma Assam Cabinetoni ong'kataha aro Assamese ku'sikko Stateo Officeni ku'sik dake jakkalaniara a'brini manderangna baditanakingking neng'nikani aro jamankamo jatni gimagnini gimin manderangna talate on'e ning'tubate a'brini dintangmancha Sorkariko dabaniko dakna ua ja'kudechakataha.**

**A'brini pilak dilgipa manderang 1960 bilsini July jani 6 aro 7 tarikrango Shillongo tom'e Council of Action-ko ong'atchengaha. Ia dolan Assamoniko ma'eke A'dok dintangko dabina mongsonggipa kam ka'gipa dol ong'aha. Ia dolan apalgipa aro wa'sagipa Sasonni bidingo warachakani dol ong'aha. Ia dolkon "ALL PARTY HILLS LEADERS CONFERENCE" (A.P.H.L.C.)ine mingaha. Ia tombimonganiko Congress-ni M.P. Pa. Jayabhadra Hagjer tom'aniko dilaha.**

**A.P.H.L.C. dolo Hills District Congress Committee, Tribal Union, Mizo Union aro A'brio Swatantra aro dintang dintang, jedake Garo National Council, Khasi National Durbar aro uaranggita pilak dolrangni nangrimgimin kotok ong'achim. Ia kotokni Chairmanara, Pa. Thanglura aro General Secretaryara Pa. S.D.D. Nichols Royan ong'achim. Gipin mongsonggipa memberangara, Capt. W.A. Sangma, Pa. Sawapranga, Pa. J.B. Hagjer, Pa. S.Barman, Pa. B.B. Lyngdoh, Pa. T.Cajee aroba Pa.Maham Singh aro sakgipinrang ong'achim.**

**Ia dolni skanggipa kam ka'na re'mikkanganiara bakbakan Assamese ku'sikko State Officeni jakkalgipa ku'sik aro seani dakatani niamko ra'gataniko champengna kam ka'anian ong'aha. Assamese ku'sikko State Sorkarini Officerango aganani aro jakkalna ra'gatani niamko bakbakan champenganirangko dakatchina Prime Minister, J.Nehruo molmolaniko dakaha. Champenganiko dakjaode A'brini**

*Captain Williamson A. Sangma*

A'dokrangko Assamoniko ma'ekate dingtang Sasoni bilko on'china janape dabianiko dakaha. Ia dol namen bilakgipa aro a'brio songdonggipa manderangna bang'a namgnirangko dakgipa dol ong'aha. Dingtang dingtang kam ka'anirangni gimin kamao janapanirangko dakenga.



**Meghalaya-ni padotrang.  
Jakasioni a'bachenge- Pa. B.B.Lyngdoh,  
Pa. E.Bareh, Capt. Williamson A.Sangma aro  
Pa. Stanley Nichols Roy.**

## XIV

**ASSAMESE KU'SIKKO ASSAM STATEO  
OFFICEO JAKKALANI KU'SIK DAKE  
NIAMKO 1960 BILSINI OCTOBER 24  
TARIKO RA'GATA ARO UA SALON A'BRIO  
DONGGIPA MANDERANG, A'BRI  
A'DOKNI SAL INE MANIANIKO DAKA.**

Assamese ku'sikko Assam Stateo jakkalani niamko 1960 bilsini October jani 24 gipa tariko ra'gataha. Ia apsan salon a'brio songdonggipa manderang "A'brini A'dokni Sal" ine dingtangmancha manianiko ong'atskaaha. Shillong songjinmao aro dingtang dingtang a'brini biaprango re'jomenba jinma jinma a'bokani aro Officerango kam ka'anirangko champengani kamrangko dakaha. Assamni Sorkario ia obostarangsa ong'engon a'brini manderang a'brini a'dokko Assamoniko ma'eke gital dingtang Sorkariko A'brio donggipa manderangna bilko pakwatchina Ma'mong Sorkario krenge dabianiko dakana agre mamung gipin cholko apnikjaha. Indake A.P.H.L.C. ni dol 1960 bilsini November jani 23 gipa tariko tom'e chanchianirangko daktaiaha. Ia tom'anio A'brini a'dokrangko Assamoniko dingtangate Sorkariko dabianina tik ka'srangaha aro ua gital Sorkarini bimungko, "Eastern Frontier State" ine mingna tik ka'aha. A.P.H.L.C. dolni seokgimin manderang 1960 bilsini November jaoni a'bachenge 1961 bilsini May jaonakingking changgittam iani bidingo agangrikanirangko dakna Delhiona re'angaha. A'brio songdonggipa manderangni Assam State Assamese ku'sikko Officeo jakkalani ine ra'gataniko jechake an'tangtangni Sorkariko rikna a'brini manderangni dabianiara Assam Sorkariko namnikgijani a'selrangmangmansan ong'aia, indiba a'brini manderangni chong'motgipa nangnikanirangko Prime Minister Nehru an'tangba ma'siaha. A'brio donggipa manderangni dabianiara kaketan ong'a aro gisiktangtango dingtangmancha



neng'nikchongmotgipa a'selrangni giminsa ong'aha. Indiani Sasoni niamogitaba ia dabianiko ra'chakna krachongmota ine nikna man'aha aro maiba chu'ongnikani kamko a'brini manderangna on'a kam ka'ani donga ine Ma'mong Sorkariba chanchie niamrangko nakatataha. A'brini manderangni dabianiko kaketan ong'ani sakirang donga aro Assam Sorkarini kaket ong'gija kam ka'anirangna niamo pangchake dabianirang ra'chakani kamrang ong'chongmota. A'brini manderangni dabianio bang'a duk aro neng'nikanirangko me'soke on'aha. Iarangni gimin niamo pangchake kam ka'e on'anirangko aro dingtangmancha sandie obostarangko rongtalatsrangna aro uarangko sandigipa manderangkoba watatchina a'brini dilgiparangni janapani ong'achim. Jamano mitam bakrimgipa a'brini dolrangara dingtang dingtang miksonganirango pangchake A.P.H.L.C. kotokoni ong'katokaha. Chon'kamaonaking-king A.P.H.L.C. Kotokara Khasi aro Jaintia aro Garo Hills a'dokni manderangni nangrime kam ka'ani dol ba bimangsan ong'aiaha.

# XV

## 1960 BILSINI JULY JANI 6 ARO 7 TARIKRANGO APHLC DOLNI SHILLONGO TOM'E CHANCHIANIRANGO TIK KA'GIMINRANG

1. Assam Stateo Assamese ku'sikko, Officeo jakkalaniko ra'gatanio a'brini a'dokrango songdonggipa manderangna ra'chakani ongode Assamese manderangsan chubata gadangona tang'doatbatani ong'gen. Ja'mankamo a'brini pilak jatrangkon Assamese pil'atani kamona sokbaanina kensoani donga. Indake ong'on, dingtang dingtang a'brini manderangni dakbewal, maniani aro jatni dakbewalrangni gimaanganiba ong'gen. Meligrigijani, jegrikani aro bobil ong'grikani kamrangba ong'naba donga.
2. Assamese ku'sikko ra'gatdraode a'brini manderangna ku'sikko jakkalani bewalo agrepile sinjetdugaanirang ong'gen, jedake; Assamese ku'sik, Hindi, English aroba ku'tang aro indake jakkalna nangdra'ani ong'gen.
3. Assamese ku'sikkosa State-o sena aro agana jakkalo-de Sorkarini kamrango a'brini manderang nama chol aro namroroanirangko dakpana chol ong'jawaha aro bang'a kamrangan gimaanirang ong'skagen.
4. Assam A'dok gimiko Assamese ku'sikko agangipa chu'gimik manderangni adha bak gitasan ong'aiengon Assamese ku'sikko Assamo sena aro agana ra'gatdraanio kragipa ong'jawa.
5. Assamese ku'sikko Assam Stateo Officeo jakkalna ra'gatdraode gipin ku'sikko agangipa jatrang baksa meliani dongjawa, batesa miknenggrikani aro bobil ong'grikani somoirangkosa mikkangchi bariatanirang ong'skagen.
6. Niamchi drae ra'gatdraaniko dakode bang'a golmalrang

*Captain Williamson A. Sangma*

aro tomtomgijanirang State gimiko ong'katgen aro tomtomani dongjawa.

7. Assam State gimiko nigopate node bang'a dintang dintang jat aro ku'sikrangko agangipa manderangni dongramsa ong'a. India gimiko jedake ong'a, indaken Assamoba apsanang ong'a ine nikna man'a. Uni gimin, jenakingking Hindiko ku'siktang dake jakkalna ra'gatkujanakingking Officeo jakkalan ku'sikko dintangatna nangani dongja

**This book belong to Govt**

## XVI

**CAPTAIN W.A. SANGMA A'CHIK  
JATGIMIKNI DILGIPA ONG'E A.P.H.L.C.  
DOLKO MANGRAKATA ARO A.P.H.L.C.  
DOLNI KAM KA'ANIO  
NAMROROBAAANIRANG**

**A.P.H.L.C. dolni gnigipa tom'ani :**

A.P.H.L.C. dolni Shillongo 1960 bilsini August jani 22 aro 23 tarikrango gnigipa tom'e chanchianirango dakaha. Ia dolo mongsonggipa kam kagipa manderang dingtangmancha Council of Action-ni manderango, A'brini A'dokko ong'atanio mai mairango ra'gate sasonni kamrango jakkalani ong'genchim, uarango sulsul tarichina ge'etanirango dakaha. Uarango tariman'ahaon pilak District Council aro dingtang dingtang sasono ma'malni dolrangnaba on'atokchina janapaha. Ia tom'anio, pilak kamrangan A'brio songdongenggipa a'brini mande ong'pagijagiparangnaba chel'chakani kam aro namgnirango dake on'gen ine ku'rachakanirango dakaha.

(K.S.Singh, 1982; 218; Chaube, 1973; 121; Souvenir, 1974:14).

**A.P.H.L.C. dolni gittamgipa tom'ani :**

1966 bilsini November ja, 16 oni 18 tarikrangona gittamgipa tom'aniko A.P.H.L.C. dol North Cachar district-ni Haflongo ong'ataha. Ia tom'anio indake chanchianirango dake tik ka'e donaha :

Assamo Assamese manderangni Assamese ku'sikko Officeo agana ba sena jakkalani niamko ra'gatdraani miksonganian pilak nambata cholrango an'tangtangsang man'gopna miksongani aro a'brini manderango aro gipin songdongpagiparangko sinjetna daksamsoani kamrang ong'a. Ia pilak miksonganiosa Assamese ku'sikko Assamo ra'gatdraanina a'brini manderangni dingtangmancha

Assamoniko ma'eke A'dok aro Sasonko dabianina watgalgija dabiani ong'a, aro maiba dingtang namdapatani kamrangko dakgenoba rachakani ong'jawa. Iani a'sel mikkangchi Assamoniko A'brini A'dokrangko ma'ekate dingtangmancha sasoni bilna dabianiko dakkanguani ong'gen.

(K.S.Singh, 1982 : 218, 219 ; Souvenir, 1947 : 9-10.)

Indakeba ia tom'anio chanchianirangko dakanguaha. Ia dabianiko rachakdraatna gita dingtangmancha seokgimin manderangko Prime Ministerona watatgen aro je dabianian A'brini manderangko naljoke rakiani, chong'mot A'brini manderangni nangnikani aro chuongnikanirangko on'a man'gipa ong'a.

(K.S.Singh, 1982 : 219, Roy Burman, 1961 : 302).

### **Scottish Pattern of Government**

Indakgipa dabianirangko dakani jamano 1960 bilsini November jao Assamni A'bri A'dokrangona Prime Minister, Nehru Scottish Pattern of Government ba sason ka'ani Sorkariko ragatchina ku'patie on'aha.

Ia sason ka'ani bewalo, Assam Sorkarioniko bang'a Departmentrangko ra'ongkate uarangni kosako a'brini sasoni jako bil man'anirang ong'gen. Ian A'dok damsani ning'on A'dokko ma'ekatsranggija indiba A'dok damsagita chacha sason ka'ani bewal ong'achim. A'brirangna regional Committee-ko done Assam Assembly baksaan damsan kam ka'ani bewal ong'gen aro A'bri A'dokrangna dingtang dingtang manianirangko dake chanchiani aro ra'gatani kamrango bilrangko chugimik man'pagiparang ong'a. A'bri A'dokrangni kosako sason ka'ani bewalrangko jako ra'ani Cabinet Minister saksa donggen aro uko State Minister saksa dakchakgipa ong'gen. Mongsonggipa kamrango pangchake saksa ba sakgni, nangnikaniranggita Deputy Minister-rangko dongen.

(K.S.Singh, 1982 : 219, Bareh, 1947 : 162)

### **Scottish Pattern Government-ko A.P.H.L.C. dol rachakja :**

A.P.H.L.C. dol ia ku'watgimin, Scottish Pattern Sason ka'ani bewalko ra'chakjaha. Changgipin tom'e chanchianio chu'gimik A'brini A'dokrangna dingtangmancha Sason ka'ani

bilko on'china gita dabiangkuna tik ka'aha. Indake pilak Autonomous A'brini A'dokrango songdonggipa manderangko Assam Legislature-na member-rangko seoktaianio jak on'jachina parakaniko dakaha. Ia somoirango Garo Hills, North Cachar, Khasi aro Jaintia Hills districtrangni District Congress Committee-rangni dolrang Scottish Pattern Sasoni bewalkon ra'chakaha. Indake A.P.H.L.C. dolni Autonomous Hills district-rango (Non-violent) mamung golmal gri ong'e indiba nangrimgrikgija kam ka'anirangko mesokani (Non-Cooperation Movement) aro pilak Committee-rango aro Boardrango memberrang ong'aoniko Assamoniko ma'ekaniko me'sokna dakani kamrango Congress Committee-ni manderang bakrimpajaha. Iako 1961 bilsini October jani 24 gipa tariko ong'ataha. Ia dingtang miksonganirangni a'selan District Congress Committee-ni dolrang A.P.H.L.C. dolni bakrimaoni ma'ekaha.

(K.S.Singh, 98 2 : 219, Souvinir, 1974 : 14).

Indake A'brini District Congress Committeeni dolrang, Assam Hills Peoples ine minge tom'aniko 1961 bilsini July jani 31 tariko ong'atchengaha. 1961 bilsini November jao Mizo Hillso uamangni skanggipa nangrimani dolko ong'atchengaha.

#### **A.P.H.L.C. dolni dokgipa tom'ani :**

1961 bilsini, September jani 14, 15 aro 16 tarikrango Aizalo A.P.H.L.C. dolni dokgipa tom'anio bang'a chanchianirangko dake dingtanganirangko rabaaha. Ia dol dingtang bewalrango dake remikkanganiko dakna miksongaha aro Council of Action-ni manderangko indonga rokomanti cholrangko sandichina pakwataha.

1962 bilsini, March jani 21 oni 24 tarikrango Shillongo A.P.H.L.C. dol tom'e chanchianirangko daktaiaha. Ia tom'ani miksonganania batanggimin Election-ni somoio memberangko seokani kamo pangchakbataha. Non-Cooperation Movement ba Sorkari baksa nangrimgrikgijani kamrangko me-sokna gita ia tom'anio, Assam Assemblyoni 1962 bilsini, October 24 tariko ong'katna tik ka'aha.

1962 bilsio memberangko seokanio United Mikir aro North Cachar districtrango Congressni dol sakbri

memberangna seokako man'aha. Khasi aro Jaintia, Garo aroba Mizo Hills districtrango A.P.H.L.C. ni dolrang biap damchisnini memberang ong'aha. Ia memberangoni saksni Assam Assembly-oni ong'kataha. Indiba Mizo Hillsni saks, Garo Hillsni sakgni aro Jaintia Hillsni saks, gimik sakbride ong'katjaha. Garo Hillsni sakgni Assam Assembly-oni ong'katgijagipa memberangara, Pa. Nallindra Sangma aro Pa. Emerson Momin ong'achim.

(K.S.Singh, 1982 : 220, Chaube, 1973 : 124).

Dolni namnikanigita dakpajahani gimin pilak ong'katgijagipa memberangko A.P.H.L.C. dolo dongpana gita on'jaha. Ian A.P.H.L.C. dolni 1962 bilsini August jani 23-25 tarikrango chetgipa tom'anio ong'achim. Ia tom'anion A.P.H.L.C. dol Non-Violent Action-ni kamrangko ongatna tik ka'samsoaha aro uano dakgni kamrangko tik kachina Council of Action-ni manderangna pakwataha.

(S.S.Singh, 1982 : 220, Souvenir, 1947 : 15)

#### **A.P.H.L.C. dolni skugipa tom'ani :**

Shillongo A.P.H.L.C. dolni skugipa tom'aniko 1963 bilsini March Jani 4 gipa tariko ong'ataha. Ia tomanio chanchisogimin Non-Cooperation-o dakgnirangko Chinese dakgrikmiting somoirango so'sojengjeng ong'enganina dontongataha.

#### **A.P.H.L.C. dolni chikinggipa tom'ani :**

A.P.H.L.C. ni chikinggipa tom'e chanchianirangko Shillongo 1963 bilsini, June jao 4 oni 6 tarikrango ongatataha. Ia tom'e chanchianio dolni nangnikani somoirang ongkujanakingking Sorkari baksaan nangrime kam ka'angkuna tik ka'aha. Prime Ministerko Dibrugarh ba Gauhatio grongna gita dilgiparangko watataha. Ua somoio Assamni a'bhirango songdonggipa manderangni gimin chanchianio grongna rebaenggipa manderangni miksonganiko parake on'anirang gamchatani ong'gen ine Prime Ministerni uiatanikoba man'soaha.

(K.S.Singh, 1982 : 220, Bareh, 1974 : 164)

**A.P.H.L.C. dolni chi'sagipa tom'ani :**

1963 bilsini October jani 30 tarikoni November jani 1 (sa) tarikona chi'sagipa A.P.H.L.C. dolni tom'e chanchianiko ong'ataha. A'brini manderangna dingtangmancha Prime Minister, neng'nikanirangko naljokatna kamko ka'na ku'rachakanina mitelanirangko dakaha. Uni miksonganiranga, chu'gimik sasoni bilko pakwatani miksonganirang ong'achim.

**Chignigipa A.P.H.L.C. dolni tom'ani :**

1964 bilsini April jani 17 aro 18 tarikango chignigipa tom'e chanchianirangko A.P.H.L.C. Turao ongataha. Ia tom'anio nanganirangko see dabianirangko dakaha. Dabiani kattarang :

1. Prime Ministerni daksoanigita chugimik jakgitel sasonni bimangko aro gipin kurachakanirangko seachi aro kam baksa gisikoba bimang ong'atna nanga.
2. Bangbata kamrangni bidingon A'brini sasonni ning'ona ra'baskana nanga.
3. State Legislature aro Parliamantna member seokanio bang'batatna gita dabianirangko dakna gita tik ka'ani.

Pilak tom'e chanchianirangko ra'gope nie, dingtangmancha A'brini A'dokni sasonko dakanian a'brini manderangni neng'nikanirangko aro obostarango naljokatani nambatgipa aro altubatgipa aro uan bonkamgipa kam aro chol ong'a ine tom'anio tik ka'aha. Daodipat Prime Ministerni ku'atgimin chugimik jakgitelo sasonko chalaiani bilko dakchenge nianio pilak daksamsoani kamrangna aro name sandianirangko dakchina Commission ba sandigipa dolko tik ka'e watatchina gita Prime Ministerko molmolaniko dakaha aro uamangan sasonni kamrango pilak nanganirangko daksamsoanirangko dakgen.

**A.P.H.L.C. dolni chang chigittamgipa tom'ani :**

1965 bilsini April jani 9 aro 10 tarikango Shillongo chang chigittamgipa tom'e chanchianirangko ong'ataha. Ia tom'anion Nehru-ni daksogimin jakgitele sason ka'ani bewalko ra'gatanio nanganirangko dakna gita A'brini A'dokrangna donsogimin Commission ba dolna



nanganirangko mesoke seanirangko dakanio uarangko jinmachi namnike ra'chakanirangko dakaha. Indiba ia pilak kamrangko Nehru an'tangni jaktangchi matchotangna man'jaha.

**Patasker Commission :**

A.P.H.L.C. dolni dabanirango pangchake Indiani Prime Minister, Nehru-ni dingtangmancha Assamni a'brio donggipa manderangna daksogimin ba Nehru Planko ragatanio niam ba sasonni bewalrangko daksoanina kamrangko dakanio Nehru an'tangan jaktangchi matchotatna man'jaha. 1964 bilsini May Jani 27 tariko ua an'tangan siangchangaha. Uni jamano, India Sorkarini Mr. Lal Bahadur Shastri Prime Minister ong'rikskahaon Mr. H.V. Pataskerko skotong dakate Hill Areas of Assam Commissionko 1965 bilsini March jani 16 tariko niam ba Sason-ni bewalrangko tarisoaniko sandie janape on'anirangko dakna gita tik ka'aha. Pataskerni dol Khasi Hills aro Garo Hills-ni mongsongbatgipa biaprangona wenroroe sandiani jamano India Sorkarina 1965 bilsini March jani 31 tariko on'aha.

Ia dolara dingtang dingtang sandianirangko dake A'brini A'dokrangni Sorkariko dingtang dakanio ong'na amgijani ba neng'nikanirangkosa India Sorkarina janape on'aha, indiba Sason ka'ani niam aro Sasonni bewalrangni bidingosan sandie daksamsoe on'ani kamransan ong'batachim. Uni gimin A.P.H.L.C. dol ia sandie on'anirango chu'ongnikjaha aro uko ra'chakjaha. Sorkariko chalaiani bidingo Assam baksaan damsan bakrime bang'bata cholrangko a'brio donggipa manderangna dake on'ani bidingosan Patasker Commission-ni miksonganiara ong'aiachim.

**Chang chibrigipa A.P.H.L.C. dolni tom'ani :**

1966 bilsini May jani 19 oni 21 tarikrangona Turao chang chibrigipa tom'aniko A.P.H.L.C. dol ong'ataha. Hill areas Commission-ni sandie India Sorkarina onanio bang'a chusokgijanirang donga. Uni gimin ia tom'anio sandie ku'patiani kattarangko jegalaniko dakaha aro uan chugimik Sasonko jako ra'anina daksoanio chu'onggipa daksoani ong'ja. Ia sandie kupatiani kattarangko namnikgijaniko mesokna A.P.H.L.C. dolni saksku M.L.A. rang Assam Assembly-oni ong'kataha.

## **Gulzari Lal Nanda Shillongona Rebaa**

Gulzari Lal Nandaan dilgipa ong'e gipin sak bonga Cabinet memberang baksa dingtangmancha A'brini Sorkariko dabiani bidingo sandianiko dakna India Sorkarini watatako man'e 1966 bilsini June jao Shillongona reba'aha. A'brini dilgiparang aro India Sorkarini Cabinet memberang baksa name agangrikani jamano, Assamni ningon dingtang Stateko dake aro sasonni bak aro dingtang Councilni Ministerangko seoke sason ka'ani bidingko A'brio donggipa manderangna dake on'ani katta nakatchengaha.

Ia janapanikoarang sasonni dolrangan namnikjaha. Assamni dilgiparang jechakaha. Assamni ning'on donge State dakate sason ka'aniko a'brini dilgiparang jegalaha. Indake 1967 bilsini Election-o jak on'pagen ba on'pajawa ine chanchianio, bakrimpagija namnikgijaniko kamchi me'sokna gitaba tik ka'aha.

### **A.P.H.L.C. dolni chibongagipa tom'ani :**

1966 bilsini December jani 28 oni 30 tarikrangona A.P.H.L.C. dolni Shillongo chang chibongagipa tom'e chanchianirang : Chugimik a'brini Sorkariko dabianigita India Sorkari chanchi- agangrikanirangko dakjaode bobil ong'ani kamrangchi ong'gija, indiba namnikgijani kamrangko 1967 bilsini January 10 tarikna skangan kamchi mesokanirangko a'bachengatna miksonganiko parakataha.

### **Prime Minister, Mrs. Indira Gandhi Shillongona rebaa:**

India Sorkari, Assamni aro A'brini dilgiparangni ra'chakna amna gita sandianirangko dakna Prime Minister, Ma. Indira Gandhi Shillongona re'bana tik ka'aha.

1966 bilsini December jani 27-tariko Prime Minister, Ma. Indira Gandhi Shillongona re'baaha aro A'brini dilgiparangni nangnikanigitan ong'na nanganirangko jinmao parake on'chengaha. Na'simangni nama miksonganirangna anga kusi ong'a aro ian na'simangni rasong mikkim ong'gen. India Sorkari Assamko krae pe'rarone sason ka'ani kamrangni gimin chanchiman'aha aro uara ruutgija somoirangni jamanon kamchi ong'gnok ine miksongani donga. A'brio songdonggipa manderangni namroraani gimin chanchie jakgitel ong'e sasonni bidingo chalaiania mikkangchi

namroroani ong'anina niksamsae kam ka'ani ong'a. Indiba iarangko chusokatna skang haida changni chang dingtang dingtang dilgiparang aro ang baksa kam karimskarang baksa damsan tom'e chanchianirangko dakchengkuna nanggen, jedakode uan darangnin nama rachakani ong'gen ine Prime Minister, Ma. Indira Gandhi parakataniko dakaha.

Iani bidingo 1967 bilsini 11, 12 aro 13 tarikrango New Delhio Prime Minister, Home Minister aro gipin Union-ni Minister-rang, Assamni Chief Minister aro uni kam karimskarang, Assamni Pradesh Congress Committee-ni President aroba A.P.H.L.C. dolni dilgiparang damsan chanchianirangko dakaha. 1967 bilsini January 13 gipa salo Union Sorkari Assamko pe'rarone sason ka'ani bidingo parakataniko dakaha.

Indiani Prime Minister, Ma Indira Gandhi Shillongona rebae a'brini dilgiparangni dabia gita namnikpaaniko jinmana agane uko chusokatna skanggipa parakchengani gimin 1966 bilsini December jani 27 gipa sal, Meghalaya Stateko man'ani gimin aganania namen gisik ra'beani Sal ong'aha. Uni aganania Assam A'dokni Sorkarioniko ra'rontaie jakgitel ong'ani bimango Sason ka'aniko ku'atchenge on'aha, jedakode A'kawe aro A'brini manderangni gisepo apsan sasoni bewalrangon bilrangko man'pae nanganirangko ra'baani cholrangko dakna chol ong'pagen.

#### **A.P.H.L.C. dolni chang chidokgipa tom'ani :**

1967 bilsini January jani 18 gipa tariko Turao A.P.H.L.C. dol chang chidokgipa tom'aniko dakaha. Ia tom'anio India Sorkari Assam State Sorkarini aro A.P.H.L.C. dolni nangrime chanchigrikanirangna dingtangmancha dolko dake watatna tik kaaha. Ia dol gittam chanchigrikanion pilak kam ka'na daksoanirangko tarisoani tom'anirang ong'achim aro'ua chanchigniranga kamao mesokanirangan ong'a :-

1. Ia daksogimin sason-ni bimang, A'brini A'dokara Assamni A'dokoniko dingtang dingtang ong'atgimin A'dokranggitan apsan gadangrango bil man'pagipa ong'gen.
2. Daksogimin A'brini A'dokrangni sason ka'anina kamrangko pakwatanirango dolgni A'dokrangni damsan namnikgrikanirang ong'na nanga.

### *Captain Williamson A. Sangma*

Prime Minister-ni kadongatani kattarango pangchake A.P.H.L.C. dol 1967 bilsini memberangko seokani somoio susaaniko dakpana tik kasamsoaha. Memberangko seokanio Assemblyna donsogimin biaprango Khasi aro Jaintia Hills districtni sakbonga memberna seokpiltaijaniko man'aha. Garo Hills, Khasi aro Jaintia Hills districtrango Assemblyni chu'gimik biaprangko A.P.H.L.C. dolni manderangan man'goptokaha.

#### **A.P.H.L.C. dolni chang chisnigipa tom'ani :**

1967 bilsini July jani 14 gipa tariko A.P.H.L.C. dolni chisnigipa tom'aniko Shillongo ong'ataha. Jadokna donsogimin somoirangni gisepe Assamoniko ma'ate A'dok dingtang ong'atgijanio pangchake ia tom'anio A.P.H.L.C. dol India Sorkarini dongimin Committee-o jak onpajana gita tik ka'aha.

### **The Asoka Mehta Committee**

Assamni A'brio dongenggipa dilgiparang aro pilakchin manderangni ji'jaanirang ong'enganio aro pilaknin ra'chakani ong'na gita India Sorkari sandianirangko dakchina gita Asoka Mehtako dilgipa dake Committeeeko donaha aro 1967 bilsini July jani 22 gipa tariko rebae sandianirangko dakaha. Uamangni mongsongbatgipa sandina nangni rangara, a'brio donggipa manderangni ji'jaani a'selrangko sandie mai dakgipa cholrangchi chu'ongnikaniona ra'bana man'gen aro ua cholrangara a'bri aro a'kaweni manderangni gisepgriko namnikani ong'gen, uarangan ong'achim. Ia Committeeeko watatani mamung namgni dongjachim. Maina, A.P.H.L.C.-ni dol mamung namgniko nikjani gimin Asoka Mehta Committee-ni sandianio bak ra'pajaha. Committee-ni sandiao dolsasan ong'aianio mamung namgni dongjaha. Jejeko Committee sandie India Sorkarina on'aha, uarangko A.P.H.L.C. dol raken jegalaha. Ia Committee-ni sandianio Shillongo 1966 bilsio December jani 27 gipa tariko Prime Minister-ni jinmana parakaoni aro 1967 bilsini January jani 13 gipa tariko Home Minister-ni parakataonide dingtangsrangchim. Ūni gimin Asoka Mehta Committee-ni sandie nie India Sorkarina on'gimin kattarangko a'dape galnasan kraia ine A.P.H.L.C. dolni manderang jechaksrangaha.

**A.P.H.L.C. dolni chang chichetgipa tom'ani :**

1968 bilsini June jani 26 oni 30 tarikrangona Turao A.P.H.L.C. dolni tom'ani ong'ataha. Parliamento tom'ani ong'taikujanakingking neng'nikenggipa pilak manderangko chakchike sengpakuchina ia tom'anio molmolanirangko dakaha. Ia somoirangni gisepo Assamoniko pe'rarone A'dok dingtang ma'atani kamrangko chusokatna manjaode dolgimik bobil ong'ani kamrangchi ong'gija, ia miksonganiko chusokatna nangrimgijaniko mesokna kam ka'anirangko abachengatna tik ka'aha.

(Souvenir, 1974 : 17)

Ia kamrangko chusokatna me'a aro me'chikrangoniko dingtangmancha dakdilgiparangko (Volunteers) seoktokaha. Sakantikoni niamo pangchake, kaketi aro bebeo kam ka'na aro dakdilna ku'mitchetatanirangko dakaha. Seokgimin manderang somoiantian skie ra'ani kamrangko dakaha.

**H.S.P.D.P. (Hill State People's Democratic Party)  
ni ong'baa :**

1969 bilsini July jao Sorkari baksa nangrimgijaniko mesokna kam ka'anio dakdilgnigipa manderangna on'gimin niam aro bewalrangko jakkalsretahani gimin Hopingstone Lyngdoh-ko A.P.H.L.C. doloniko watgalaha. Hopingstone Lyngdohara gitcam E.I.T.U.-ni mande aro Khasi Hills Districtni (Volunteer Organisation) Sorkari baksa nangrimgijaniko mesokanio kamrangko kadilna seokgimin dolni Secretary ong'achim. A.P.H.L.C. doloniko ra'galani bak tapan ua Hills People's Democratic Party (H.S.P.D.P.) dolko a'bachengatskaaha.

(Chaube, 1973, 131)

**Satyagraha-ko ong'atchenga aro Autonomous  
State Plan :**

1968 bilsini September jani 9 aro 10 tarikrango A.P.H.L.C. dol Shillongni Secretariat Office mikkango golmal jijaa gri Satyagraha-ko a'bachengataha. Apsan bilsini September jani 11 gipa tarikon Garo Hills, Khasi aro Jaintia Hills districtrangna Autonomous State Plan ba A'doktangchi sason ka'ani daksamsoani bilko India Sorkari

### *Captain Williamson A. Sangma*

aganjanapchenge on'aha. District Councilo bagittamoni bakgni manderang namniktoka ong'ode ia daksogimin sason ka'anio napna man'ani cholko Mikir aro North Cachar Hills districtrangna parakataniko dakaha. Indiba ia damgni District Councilrang Assam Sorkarini ning'on dongangkuna tik ka'aha. Ia daksogimin Sason-ni ningo dingtang dingtang golmalrang ong'katengani a'sel Mizo Hills Districtkode chapatjaha.

#### **A.P.H.L.C. dolni chang chiskugipa tom'ani :**

1968 bilsio September jani 17 oni 19 tarikrango Turao A.P.H.L.C. dol chang chiskugipa tom'aniko ong'ataha. Ia tom'anio mongsongbate India Sorkarini ku'atgimin Autonomous Hills State Plan-ni bidingo chanchianirang ong'bataha. Ia Sason-ni bewalrangko pilak songdonggipa A'brini manderangna talatanirangko dakaha aro sakantini chanchianirangona naataha.

#### **A.P.H.L.C. dolni chang kolgrikgipa tom'ani :**

1968 bilsini October jani 14 aro 15 tarikrango chang kolgrikgipa A.P.H.L.C. dolni Turao tom'e chanchianio ia Autonomous Hill State-ni daksogimin Sason-ni bimangko skanggipa dake niani bewalgita ra'chakna ine tik ka'aha. Indiba Assamoniko ma'eke dingtangmancha A'brini Sorkariko man'srangkujanakingking dabianirangchi joton kaangkunaba tik ka'aha.

#### **Meghalaya bimungni a'bachenganirang :**

1969 bilsini May jani bijangchijolo Assam Cabinetni manderang, A.P.H.L.C.-ni dol aro Home Ministry Delhio iani bidingo, niamo ra'gatna daksamsoani seanirangko tarina Home Affairs Assamoniko ra'rone dingtang bak dake sason ka'anina tarisogimin seaniko (Bill) 1969 bilsini December jani 15 gipa tariko India Sorkarina on'aha.

Niamo ra'gatna sesamsoanio (Bill) Assam A'dokni ning'on jakgitel ong'e sason ka'ani bak dake sualtaigipa A'dok ba Autonomous State-ni gimin janapaha aro ua A'dokkon "Meghalaya" ine bimungko donachim. Assamko bak dake raronani niam ba Meghalaya Bill-ko man'chapa Indiani Sasoni Niam Ki'tapo kolgrikgi ngipiga ra'gataiani ine

*Captain Williamson A. Sangma*

me'sokaha aro ua niamko 1969 bilsini December jani 24 gipa tariko Assam A'dokko pe'raronani ba Meghalaya Bill ine gadanggni chanchiram biapरणon ra'chakaha.

Assamni ning'o bak daktaigimin A'dokon Autonomous State aro uko "MEGHALAYA" ine bimung on'aha. Ia bak daktaigipa A'dokni ning'o Khasi aro Jaintia aro Garo Hills districrangko man'gopa.

**A.P.H.L.C. dolni chang kolgriksagipa tom'ani :**

1970 bilsini January jao 28 oni 30 tarikrangona Shillongo tom'e chanchianirangko ong'ataha. Ia tom'anio India Sorkarini ku'atgimin Meghalaya Autonomous State Sasonko ra'chakna gita tik ka'aha. Ia gital Sason-ni ning'o banga namgnirangko A'songna aro manderangna dakna man'gen ine nikaha. 1970 bilsini April jani 2 gipa tariko Prime Minister, Ma. Indira Gandhi oe on'chengaha aro Captain Williamson Sangma ia gital A'dokni Chief Minister ong'chengaha. Ia Autonomous Stateko A.P.H.L.C. ni dilgiparang Meghalaya A'dokko Assamoniko dingtangatsrange chugimik sason-ni bilko jako on'china India Sorkariko dabianirangchi sinjetanguaha.

**A.P.H.L.C. dolni chang kolgrikgnigipa tom'ani :**

A.P.H.L.C. dol Shillongo 1970 bilsini September jani 19 oni 22 tarikrango tom'e chanchianirangko ong'ataha. Autonomous Hill State Plan-ni bimango bang'a sason-ni kamrang aro namroro silroroatanirangko jako ra'e dake nianirango chuonggijanirang bang'en donga ine name ma'siaha. Uni gimin A.P.H.L.C. chu'gimik ma'atgimin A'brini A'dokna sason ka'ani bilrangko on'china dabianirangchi joton kaangkugen. Meghalaya Sorkari bang'a neng'nikani aro chusokna amgijanirangko nikmanahani gimin Autonomous Hill State Planko jako ra'angtaiani ong'jawaha.

Uni gimin, ia tom'e chanchianiogita India Sorkariko bakbakan Meghalayana on'sogimin niamo pangchake kam kachina aro chu'gimik ma'atgimin Meghalaya A'dokni Sorkariko ong'atchina dabianiko dakaha. Bon'kamao India Sorkari nanganirangko ma'siaha aro dabianigita Meghalaya A'dokko Assamoniko ma'ekatsrange sason-ni bilko on'a tik ka'aha.

*Captain Williamson A. Sangma*



**Prime Minister, Ma. Indira Gandhi, 1970 bilsini April jani 2-gipa tariko gital Mehalaya Sorkariko a'bachengate on'a gita Shillongona re'baa.**



**1972 bilsini January jani 21-gipa tariko dingtangmancha Meghalaya A'dokni Sorkariko man'ahanina d'ilgiparangko kusi ong'e rimchaksoaniko daka.**



*Captain Williamson A. Sangma*



**Meghalaya-ko man'manani jamano Jaintiarangni gandingko ganate Jaintiani manderang rimchak-soaniko daka.**

**A.P.H.L.C. dolni chang kolgrikgittamgipa tom'ani :**

1970 bilsini November janı 30 tarikonı December janı 1 (sa) gıpa tarıkrangona A P H L C dol Shıllongo tom'e chauchıanırangko dakaha Dıngtangmancha ma'atgımın A'brını Sorkariko dabıe man'srangahaosa nambatgıpa dabıanırangko dontongatani chol ong'gen, indıba A'brını manderangnı dabıanı an'tangarı bon'chongdıkanı dongjawa A P H L C dol mıkkangchıba apsan ja'ku ga'e manderangnı namgnırangna aro A'songnı sılroro-namroroanı kamrangna mıksonge namao pılakan apsan, mıkkang nıanı grı aro kaket ong'e kam ka'angkugen

## **XVII**

### **NORTH EASTERN AREAS RE-ORGANISATION ACT, 1971**

Chon'kamao, North Eastern Areas Re-organisation Act ba Niam 1971- ko 1971 bilsini December jao 22 gipa tariko Delhini Lok Sobhao ra'gataha. Ia niamo pangchake dambonga A'dokrangko gital ma'ate daktaina kam ka'ani ong'achim. Ia dambonga A'dokrangara :- *Assam, Manipur, Meghalaya, Nagaland* aro damgni, *Mizoram* aro *Arunachal* A'dokrangara Union Territory-ni ning'o ong'a.

1972 bilsini January jani 21 gipa tariko Shillongni Polo Ground biapo Indiani Prime Minister, Ma. Indira Gandhi ia gital ma'atgimin Meghalaya A'dokni Sorkariko abachengatanina do'ga ochenge on'aha. Ian A.P.H.L.C. dolni bilsil chisa mamung golmal ji'jaani aro an'chi pari nikgija ka'nilani bite ong'a aro untalsa India Sorkario dingtangmancha A'brini A'dokni Sorkarina dabiani kamrang matchotaha. A'brini dingtangmancha Meghalaya A'dokko manmanani jamanosa A.P.H.L.C. dolara A'songtangni ning'o Sasono man'chape kam kagipa kotok ong'baskaaha. A.P.H.L.C. dol amadipat Indian National Congress baksa nangrime aro nama ma'sigrikanio kam ka'na joton ka'aha.

#### **A.P.H.L.C. dol chang kolgrikbrigipa tom'e chanchiani :**

1973 bilsini June jao 19 aro 20 tarikrango APHLC dol tom'e chanchianiko Shillongo ong'ataha aro maidake kam ka'na nanga indake tik ka'anirangko dakaha.

Congress baksa bakrime kam kaanganio mikkangchi A'songo Sason-ni bidingo ong'gni obostaranko nisamsoe A.P.H.L.C. dolan jatni nangrimanina aro tom'tom ong'anina mongsongbatgipa kamrangko dakgnigipa kotok ong'angkuna tik ka'aha. Ia tom'anio indakeba tik ka'aha. A.P.H.L.C. dol mikkangchiba Prime Minister aro uni dingtangmancha kotok, Indian National Congress baksa pilak kamrangan nama masigrikanio nangrimgrikaniko rakiangkuna miksonganiko dakaha.

Captain Williamson Sangmani Assamoniko ma'eke A'brini dingtangmancha Sorkariko dabiani chu'gimik bilsil 19 ongangaha. A'brini Sorkarina dabiano uan mongsongbatgipa ong'e dakdilaha.

## **XVIII**

### **CAPTAIN WILLIAMSON A.SANGMANI MITAM APHLC DOL BAKSA CONGRESS DOLO BAKRIMA ARO 1976 BILSI INTAL MEGHALAYA SORKARIKO CHALAIANI BIDINGO ADITA DINGTANGANIRANG ONG'BACHENGA**

APHLC dolo Capt. Williamson A.Sangma-an mongsongbatgipa dilgipa ong'an baksana skanggipa Meghalaya A'dok Sorkarini Matbol (Chief Minister) ong'chengaha. Adita somoirangna Sorkariko chalaianioba mamung golmal grian chalaina man'aha.

1972 bilsintalan APHLC dolara Congress baksa bakrimrangna miksonganirangko talatanirang dongachim. Indiba ia miksonganiko 1976 bilsini November jani 16 gipa tariko Gauhatini Jawaharnagar biapo All India Congress Conferenceko ongatna skangmangmang Mendipather biapo tom'e chanchianiosa ong'bachengaha. Ia chanchianio mitam APHLC doloni melina man'jaha. Captain Williamson A. Sangma aro mitam uni doloni 1976 bilsini November jani 22 gipa tarik intal Congress baksa bakrimaha. Mongsongbate Khasi Hills A'dokni dilgiparang ia bakrimaniko namnikjaha aro dalbea rabiani kam ine chanchie kamko jako ra'na abachengskaaha.

Garó Hillso Pa. Modi K. Marak, APHLC dolan mongsonggipa Meghalaya A'dokni pangchakani dol onga ine dakdilangkuaha. Indiba APHLC dolni a'kangbaenggipa "Bibal" ni noksako 1977 bilsini February jao Election Commission gimaataha. Indiba ua "Bibal" ni noksako APHLC dolni Electionni chin ine 1977 bilsini September jani 11 gipa tarikosa Supreme Court dake onpiltaiaha.

1977 bilsio HSPDP dol, 1971 bilsio Parliamentary Electiono chusokgijaniko todongskaaha. Maina 1977 bilsini Parliamentary Election ongmitingo HSPDP dolan Congress,

*Captain Williamson A. Sangma*

APHLC aro PDIC dolrangni kosako bang'bata manderangni namnikanichi chegipa ongaha.

Meghalaya A'dokni Sason-ni bidingo 1978 bilsi intal bangbate dingtang ong'anirang a'bachengaha. Bilsi 18 na skang APHLC dolan Salgro Salaram Indiani A'brini A'dokrangni dingtangmancha Sorkariko dabianio nangrime kam kagipa dol ong'ahaoba da'o bang'a dingtang dingtang ong'anirang ong'baskaaha. Apsan dolni dilgiparangni gisepo nangrimgijanirang ong'baaha. APHLC dol ia somoirango Saliram Khasi Hills districtni biaprangko gale Salaram Khasi Hills districtni a'paksani mongsongbatgipa dolsan ong'aiaha ine agana man'a. APHLC doloni ma'eke Capt. Sangmani Congress dolo nape, dolni padot ong'e kam kakujanakingking Meghalaya A'dokni songadamrango Congress dolni giproroani mamung pangkingipa pangchakanirang dongkujachim. Khasi Hills districtni aro Garo Hills districtoba Congress mongsongbate songjinmarangosan mangrakbataha.



**Prime Minister, Ma. Indira Gandhi aro Captain Williamson A. Sangma.**

*Captain Williamson A. Sangma*

H.S.P.D.P. dolara mongsongbate Khasi aro Jaintia Hills districtrangni songadamrango giprorobataha. Indiba Garo Hills districtni songrango dongjagitan ong'pila. Banga changrango APHLC dol ma'ekgrikija nangrimgriktaianina chanchianirango dakaha aro unbaksana ma'ekgimin H.S.P.D.P. baksa nangrimaniko daknaba joton ka'aha. PDIC dol baksa nangrimaniko daknaba joton ka'aha. PDIC dol baksa APHLC dol nangrime kam kana abachenganirango nakatatanirang ong'aha. Indiba pilak chanchianirangan chusokgipa ong'jaha.

Captain Williamson A.Sangma 1979-81 bilsirango State Planning Board-ni Chairman ong'ana agre, ua bilsio 15 ba somoi gittam gadangrangna Meghalaya A'dok Sorkarini Chief Minister ong'aha. Ua 1974 bilsio United Nations General Assemblyo bakko rapana watatako man'aha. Ma'mong Congress dolni dalbatgipani nangnikanigita Pa. Purno A. Sangmako Meghalaya State Sorkarini Chief Minister ongatskakujanakingking Capt. Williamson A. Sangma 1987 bilsiona Meghalaya A'dokni Chief Minister ong'e A'songko namroroatanina kam kaanguaha. 1988 bilsini June jani 18 gipa tariko Tura Constituencyoni Parliamentni Memberna seokako man'aha. 1989 bilsini July jani 21 gipa tariko Mizoram A'dokni Governor dake watatako man'aha. Indiba ua be'en-ni an'senggijaniko man'e Mizoram A'dokni Governor ong'aoniko 1990 bilsio an'tangan watbae songtang Turao neng'takaha. Ia nengtakmiting somoioba ua Congress dolni namroroanina kam kaanguaha.

## XIX

### MEGHALAYA A'DOKNI CHIEF MINISTER ONGE CAPT. WILLIAMSON A. SANGMANI A'SONGNI MANDERANGNA PARAKATANI KATTARANG



Je                    ming                    20  
manchisamsoanirangkon  
an'chingni Prime Minister Ma.  
Indira Gandhi (Jean  
siangahachim) bilsı 1982 ni  
January jani 14 gipa tariko  
a'songgimikna aganprakataha,  
uan a'songo pilak  
gadangranganın namroro-  
silroraniko ra'bana  
daksamsoani ong'a. Ua  
daksamsoanio bosturangko  
bikote ba ge'e-game  
bariataniko a'songo jamancha-  
krikenggipa jat ba dolrangna  
nambata cholrangko aro

songsalna nama kamrangko ra'bana miksongsoanirang ngang.

An'chingni State, a'songni indakgipa biapo onga  
manjahanio bosturangko bikotanio komie man'aniko, akal  
karap ong'aniko aro banga kamrangan  
ja'manchakrikanirangko chagrangna nangaha. A'songni  
noksik-ketchio ong'on dingtangdingtangengtogjanirangko aro  
namdapatani a'barango jaksokgijanirangko man'e tikkelanı  
kamrangkoba bilgri ong'ata. Ua ming 20  
manchisamsoanirangko jatni dingtang dingtang kam aro  
bewalrangko ripingan baksana chu'sokatahaon, pilak  
gadangrangan namroro-silrorobaani an'chingni Stateona  
gongrakbate re'bagnok. State Sorkariba ia  
manchisamsoanirangko a'songo chu'sokatna donsogimin  
bang'bea kamrangoni gisepo iakoba mingsa nangchongmotgipa  
ine ra'gen.

Planning Department ming-20 manchisamsogimin kamrangko batanggimin salrango baditana kingking chusokataha aro mik kangchi uko maikae chu'sokatangkugen, indake tarisamsoaniko iano jinmana talate on'a anga kusi ong'a. Ia miksonganiko sakantian gisik on'e chu'sokatgen ine anga ka'dongchaka.

W.A. Sangma,  
Chief Minister, Meghalaya.

## **MING 20 MANCHISAMSOANIKO STATEO CHU'SOKATANIRANG**

### **I. Ge'a-gamani bidingo donggerangko kaani, gital gama-ge'ani cholrangko bikote mesokani, uarangko namdapatani aro a'gako game cha'anina gisiko on'ani :**

Meghalayao game-ge'e cha'anina a'arangko jakkalani 1971-72 bilsirango 6,700 hectare a'arangoni 1983-84 bilsirango 30,510 hectare a'barangna bariaha. Da'odipet Sorkari donggerangko kae on'ani kamrangko mikpakma nie chu'sokatenga, aro uarangna agreba je biaprangon donggerangko kana chol ong'ja indagipa biaprango Lift Irrigation aro Tube-Wellrangko jakkalna gitaba Sorkari kamrangko raken ka'enga. 1984-85 bilsimiting 5,921 hectare a'barangko game cha'anina Sorkari, damgni Spillover, dam 21 Flow Irrigation projectrang, damsa Lift Irrigation Project aro damgni Deep Tube Well Projectrangko chu'sokatna minge donsoenga. Unbaksana 4,000 hectare-rang a'akoba 1984-85 bilsirango jakkaldapgen ine donsoenga. Provisional Estimateo mesokani gitade ua daksamsoaniko chu'sokatna man'aha ine nikna man'gen. 5,140 hectare a'arangko man'goppipa majangchigipa Rongai Valley Irrigation Project, jeon 3,450 hectare a'arango gama-ge'aniko jakkalgenchim, uko a'bachengna gita Sorkari, Central Water Commission-ni aganchakaniko sengenga.

Je kamrangkon a'bachengatahachim uarangko amadipat somoi gitan matchotatna Sorkari raken kamko ka'enga. Uarang baksana gamgiparang maikae Dropper-rangko jakkalanio changgipa saggiparang ong'na man'gen, uamangna skianirangko on'na nanganikoba Sorkari nienga aro dakmesokanirangko bang'en dakatenga, jerangan uamangna dakchakani aro man'dapani ong'genchim.

**II. Nakap aro uagita me'su-samjakrangni  
bitchiloniko bikotgipa torangko bariatna  
dingtangmancha gisik on'e kam ka'ani :**

A'songni Staterangni gisepo gama-ge'ani bidingo jamanchakbatenggipa aro a'bri a'solsolarigipa biap Meghalayao nakap aro uagita me'su-samjakrangko ge'e bariatani kamara sakantinan ra'biani ong'gen.

An'chingni Stateo nakaprangko nangchongmotgipa cha'anirangoni mingsa gitaba jakkalja aro me'su-samjakrangoniko bikotgipa torangkoba komibeesa jakkala. Mongsongbate an'chingo besual, nakap aro karekrangko to bikotna jakkalbata. Indiba donsoa nisanona sokna gitade bilsiantin jotton ka'aniko dakenga.

Nakap aro ugita me'su-samjakrangko ge'e bariataniko mongsongbate, bang'bata a'arangko gena-gamna jakkalachi, rokomari a'salrangko jakkale niachi aro chagimin bipangrangko jo'ong cha'anirangko naljoke rakkina kam ka'achi dake nibatenga. Uarangko namekae dakna man'a gita training aro dakmesokani kamrangko bang'en ong'atenga.

Nakap aro ka'rekrangko 1971-72 bilsirango ton 710 san man'aiahachim, indiba 1980-81 bilsirangode ton 1,443-ko man'ska-aha. 1983-84 bilsirango an'chingni State, 2500 nakap aro ka'rekrangko chimongna donsoahchim, indiba ton 2,200-kosan man'aiaha. 1984-85 bilsirango metric ton 3,000 nakap aro ka'rekrangko chimongna donsoenga. 1985 Februaryni bon'angachibaraona kingkingde metric ton 2,700 kosan man'aiengkua. To bikotna man'gipa me'susamjakrangko ge'e-game man'ani 1971-72 bilsirango ton 3,100-oni 1983-84 bilsirango ton 5,600-ona bariaha. 1984-85 bilsirango hectare 12,910 a'arangko jakkale metric ton 8,100 bitchilrangko man'na minge donsoenga 1985-Februaryni bon'angachibaraona kingkingde metric ton 7,250 bitchilrangkosan man'aiengkua.

**III. Integrated Rural Development aro National  
Rural Employment Programmeko apalbata-  
tani aro nambatatani :**

Meghalayao Integrated Rural Development programmeko 6-gipa bilsibongana daksoanio napataha. Ia programmeko skangipa changna 1979 bilsio a'bachengate,



baditaba dam seokgimin Blockrango chu'sokataha aro 1980 bilsio Octoberni 2 tarikoni intal Stateni pilak Development Blockrango ia programmeko chu'sokataha. Ia programmeko a'bachengatanichi kangalgipa game cha'giparang, suale gamgiparang, sakgipini a'ako gamgiparang gama-ge'ao kam kagiparang aro gegija gamgija gipin kamrangko kagiparang aro songadamni dakgipa rikgiparangba bang'a namgnirangko man'aha. Mikpakma nie kam ka'aniko kangalbatgipa gamgipa-ge'gipa ba gamgijarangnaba dakenga.

6-gipa bilsibongana chamanio IRDP, gimik tangka lak 300/- ko man'aha. Uoniko 1982-83 bilsirangona kingking tangka lak 271/- ko jakkalaha. 1983-84 bilsimitingo tangka lak 96/- ko koros ka'na donsoenga. 1982-83 bilsirango gimik nokdang 4,469 aro 1983-84 bilsirango 1,378 nokdangrang bang'a namgnirangko man'aha.

National Rural Employment Programme : 1981-82 bilsiosa NREP-ko an'chingni Stateo a'bachengataha Ia programmeko chusokatna kam ka'ani korosko 1.4 84 tarik intal Ma'mong Sorkari apsangrik suale gamaha (50:50) 1981-82 bilsio Food for work programme aro 1982- 83 bilsio Rural work programme, NREP baksa chape kam ka'aha. Ia programme-ni miksonganiara :- (a) Songadamni kam gri donggipa manderangko aro kam ka'na bilsio sokkugijagiparangko kraa kamo donna, (b) Songni jakkalani bostu aro man'gimin cha'a-ringanirangko an'tangtangni gisepo jakkale an'tangtangni obostarangko nambatnatna aro sakprako bilsiprako man'dapani gadangko bariatna, (c) Salantio namkala cha'ani ringani bosturangko cha'na ringna, aro song'na channa aro janggi tangani gadangko namdapatna.

NREP-ni kam ka'tona dongimin niamo mesokani gitade, je kamkoba ia programmeni ning'o chu'sokatna taribo, nirokani tangka-paisako man'gope ritichaprako sotbongana batna man'ja.

A'songo mande aro ong'telaigipa jontu ba sam-bolrang baksa pangchakgrike janggi tanganiko rakkianina, ritichaprako 10-kode Social Forestry na minge donronga. NREP-ni ning'o kam kagiparangna basakoba mi aro basakoba tangkako hajira on'ronga. Salprako mande sakprako merong Kg. 1-ko hajirani bak ine on'a aro bangkina tangkako gamskaa.

### *Captain Williamson A. Sangma*

1983-84 bilsini bon'aona kingking gimik tangka lak 62/-ko jakkalaha aro 1984-85 bilsio dingtang dingtang kamrangko ia programmeni ning'o chu'sokatanina, an'chingni Statena tik ka'atgimin bakara gimik tangka lak 41/- ong'a aro Ma'mong Sorkariba apsan bakkon gampagen. 1984-85 bilsirangna mande sakprako salprako kam ka'aniko lak 3.04-ona donsoe nienga, uarangoni 1985 bilsini February jaona kingking lak 1.58-kode sokdoeaha.

Rural Landless Employment Guarantee Programme :- An'chingni Stateo ia programmeko 1983-84 bilsio a'bachengataha. Ia programmeni ning'o chu'sokatgimin kamrangni pilak korosrangkon Ma'mong Sorkari chu'gimik gama. Iako dakani miksongania, a'gri-chigrigipa nokdangrangni mande saksanade bilsio gimiko komibeoba sal 100-na kamko on'ani ong'a. 1984-85 bilsimitingo sakprako salprako kam ka'aniko gimik lak 4.33-na donsoaha.

#### **IV. A'arangko baditana kingking apale ba dal'e ra'na ba kangna man'a uko tik ka'ani, agitchagipa a'arangko kangalrangna suale on'ani aro uarangko sekame pangnajolan rakkiani :**

Meghalayao a'arangko jakkalani ba uarangko toe an'tangtangni bimungo see rakkiani kamrang, a'songni gipin gipin Staterangoni dingtanga. Iani bidingon nokprak ba mande sakprak badita a'arangko rakkina ba jakkalna man'a uarangko tik ka'ani aro agitchagipa a'arangko suale on'ani katta namen chel'bea. Garo Hillsni bang'gija biaprangko watchange, a'arangko toe sekame donani aro a'ani nokgipa ong'na bil amaniko mesokani dongsrangja ine nikgen. Indake see-jote donani lekkarang dongpajaen an'chingni game chagiparang Bankrangoniko tangka srona man'pajaenga aro bang'bea neng'nikanirangko man'enga. Uni gimin pilaknan namgnirangko dake on'na gitade a'arangko toe sekame donani aro uarangko jakkalanina bil donganiko mesoke kamrangko a'bachengataniko nanga.

Land Reform Commissionni ku'patianio pangchake an'chingni State Sorkari Meghalaya Land Survey and Records Preparation Act. 1980-ni ning'o State gimikni a'arangko toe sekame donaniko dakchenge nina chanchiman'aha. Indake 6 aro 7-gipa bilsibongaprapna daksamsoani somoio Land

Recordrango sulsul sandie segataniko matchote tarina jotton ka'enga. Indiba ia kamrangko skanggipa changna dakatengani gimin Land Records-o kam ka'giparangko mongsongbate Mandalrang aro Kanungorangko training on'na nangenga. Ia kamko chu'sokatanio District Councilrangba bak nangpaa.

Indiba iasan, an'chingni Stateo skanggipa changna ia kamko a'bachengatani bidingo, Sorkari bang'bea manderangni dakchakani ba chakpaaniko man'jaenga. Sorkarini donsoani gitade 1982-83 aro 1983-84 bilsirango song dam 350 aro 450 prako matchote tona donsoaha. Indiba kamrangko a'bachengahaon, songadamni mitam manderang jak on'jaha aro uamangna miksonganirangko talate on'on donsoa nisanonade sokna man'jaha. Jeba ong'china 1983-84 bilsigimiko song dam 34-kode matchoten toaha. Uaragoniko mitamko District Council aro mitamko Departmentalgita chu'sokataha. District Councilrangni togimin a'aranga gimik 44,856 hectare a'arang ong'a, uaragoniko 32,457 hectare a'arangko Khasi Hills, 7,362 hectare a'arangko Garo Hills aro 5,046 hectare a'arangko Jaintia Hills District Council toaha.

1984-85 bilsimitingo song dam 14-ni a'arangko tona gita donsoenga. Da'odipet song dam 7-kode matchotaha aro bangki song dam 7-koba donsoa somoion matchotatna ka'dongsoenga.

#### **V. Game cha'giparangko kam ka'nape chagiparangni hajirako nipilani aro uarangko namedake nigrike tik ka'ani.**

State Advisory Boardni ra'baanio pangchake, 1984 bilsini January jao ge'a gamao kam ka'giparangni komibatgipa hajirako nipilaha aro indake tik ka'e ra'chakaha. Kamo changgipa saggiparangna salprako tangka 13/- ka'e aro changijagiparangna sakprako tangka gong 11/- ka'e donaha. Ia komibatgipa hajirako tik ka'ani ning'o man'gopgipa kamranga; mi-misirangko aro ugita gipinrangko ge'ani gamani aro bitchilrangko pue dal'ahao gipin gipin biapo ge'ani, rata-tetani, naka-choani, me'karangko puani aro gritrangko ge'ani kamrangan ong'a.

Districtprakon Deputy Commissionerko Chairman dake, District Implementation Committeeko donaha, jedakode uamang Minimum Wage Act-ko namekae chu'sokatna man'gen. Unbaksana Labour Inspectorrangkoba done kamrangko namekae chu'sokatchina nirokaniko donaha.

**VI. Nokol ita man'gipa kam ka'giparangko naljokate nama kamo donpilani :**

Sandirikite nigipa dolni uiataniko man'soani gitade an'chingni Stateo nokkol ita man'gipa kam ka'giparangba indake apsan jakkalako man'gipa manderang dongja. Indiba nokol ita man'gipa kam ka'giparang an'ching Stateni badiaba Districtrango dongengnaba gngang ingipao, sandigipa Committee ba Vigilance Committeeko donaha. Indiba da'alona kingkingba indakgipa dolni kam ka'giparangko an'chingni Stateo donga ine kobol man'sokuja.

**VII. Scheduled Caste aro Triberangko namdapatna daksogimin programmeko ta'rakbatatna tik ka'ani :**

Meghalayao songdonggiparangni gisepo a'brini jatrang sak 100- prako sak 80 donga. Songadamrangode, sak ritchaprako sak 86-naba bata. Uni gimin namdapatani kamrangko mongsongbate Scheduled Triberangna tariaha. Scheduled Casterangni an'ching Stateo dongania sak ritchaprako sak 0.41-san ong'aia. Indake ia dolgni songdonggiparangna pilak namgnirangko ra'bae on'ani kamko dakrongbaenggipa manchisamsoanio man'gopatata.

**VIII. Ringani chiko man'gijagipa songrangona, uarangko ra'ange on'ani :**

1971 bilsini Censuso gita, Meghalayao gimik song dam 4,583-oni song dam 3,306-de ringani chiko man'na neng'giparang ong'a. 1981- 90 bilsirangko International Drinking Water Supply aro Sanitation Decade (ringani chirangko nangnikenggipa pilak biaprangona sokatange on'ani aro be'enni an'senganiko rakkiani bilsi chikkungrang) ine parakatahani bidingo aro Prime Minister Ma. Indira Gandhi, jean da'o siangaha, a'songo gital ming 20 manchisamsoanirangko parakatahachim, pilak kamrangkon chu'sokatna amadipet sorkari kam ka'enga. Unbaksana ringani chirango mandena saanirangko ra'bagipa jo'ongrangko gimaatnaba kamrangko ka'enga.

Ia proppammeko a'bachengaintal baditaba ming chu'sokatnigipa kamrangko an'chingni Stateo, Minimum Needs Programme aro Ma'mong Sorkarini dakdilenggipa Rural Water Supply Programmeni ning'o jako ra'aha. Ia

programmena 6-gipa bilsibongaprakna tangka chamanio tangka crore 32/- ko donsoaha.

1984 bilsini March jaona kingking an'chingni State song dam 949-rangna ringani chirangko suale on'aha. 1984-85 bilsirango Public Health Department chu'onga gita kam ka'dilani aro nirokanirang dongjahaoba, gimik song dam 116-nade kamrangko matchote on'aha. Un baksana ia bilsimitingo song dam 106-ringani chirangko man'gipa biaprangnaba kam ka'e on'aha. 6-gipa bilsibongaprakna chamani bon'achibarade chi grigipa biaprangna chirangko ra'ange on'nani gimik dam 1,065-ko aro chi gnganggipa songrang dam 196-ko man'gope chu'sokatgen.

**IX. Songadamni manderangna nok dongchakna a'arangko on'ani aro nok rikanio dakchakaniko on'paani :**

An'chingni Stateo an'tangtangna nok dongchakna a'arangko man'anide indakpile neng'ani ong'ja. Maina songadamrango jegitaba nanga gita a'arangko an'tangtangna rakkina ba jakkalna man'aia. Indiba Sorkari songadamni manderangna nokrangko rikanio dingtang dingtang dakchakanirangko on'na gita 1982-83 bilsio Rural Housing Schemeko a'bachengataha. Ia Schemeni ning'o kangalbatgipa nokgri jamgribatgipa songni manderangna, jemangan krong aro pakmarangkode an'tangtangni korosangchi rikahachim, uamangna C.G.I. sheetrangko bundle gittam-prak grant-in-aid dake on'enga.

1981 Censusi gitade Meghalayao kangalrangni gisepo kangalbatgipa nokdangrang gimik 6,695 donga ine mesokaha. Indake 6-gipa bilsibongaprakna tangka paisarangko chame kam ka'anio gimik gimang nokdang 142-ko dakchakna donsoahachim, indiba una badepile gimik nokdang 191-ko dakchakskaaha.

**X. Songjinmao kangalrangni dongram biaprangko namdapatani :**

An'chingna see parakatgiminoniko nikgenchimode Meghalayao kangalrangni dongram biaprango mande jelani gimik sak 66,000-rang gngang. Shillongo sak 50,000, Turao sak 10,000 aro Jowaio sak 6,000. Stateni Town and Country Planning Department skanggipa changna Shillongni

a'segijagipa biaprangko namdapatna ba rongtalatna, Minimum Needs Programmeni ningo 1974-75 bils dipet kamko a'bachengataha aro indake 1980-81 bilsirango apsan kamrangko Tura aro Jowaina ra'angaha. Uamangna dake on'nani kamara, jinmana chirangko jokatange on'ani, chikarerangko kite moilarangko galani, ramarangko taridape on'ani, iarangan ong'a. Mongsongbate Scheduled Castes aro Harijanrangni dongram biaprangko namdapatani kamna iako jakkalbatenga.

An'chingni Stateo, indakgipa biaprangko da'odipet dam 34 man'aha aro uarangko dam 15-kode namdapatna gita kamko jako ra'aha aro dam 3 biaprangkode matchotaha. 6-gipa bilsibongaprakna tangka paisarangko chame kam ka'anio programmegitade ia kamchi gimik mande sak 20,000-ko man'gopatna donsoahachim, indiba unipalo gimik mande sak 23,087-ko man'gopatskaaha. 1983-84 bilsirango mande sak 6,000-ni palo sak 8,635-ko man'gopate chu'sokatskaaha.

1983-84 bilsirango an'ching Stateni kam ka'e chu'sokatania India gimiko state gimikni man'gope kam ka'ani ritchaprako 110.6-na badeaha ine nikgen, maina an'ching State-o sak ritchaprako 143.7- ko man'gopatskaaha. 1984-85 bilsirangoba chu'sokatna donsogimin nisanara, gimik 6,000 manderang ong'achim, indiba uni palo gimik mande sak 7,286 manderangko man'gopate chu'sokataha.

#### **X. A'songni ja'manchakbatenggipa dolrangna nokrangko rike aro uamangna dakchakani :**

Meghalayao a'gri-chigrigipa aro nokgri-jamgrigipa manderang bang'en gnan. Uamangko dakchakna gita Meghalaya Sorkari Land acquisition aro Developmental Schemeko an'chingni Stateo a'bachengataha. Ia Schemeni ning'o uamang badiaba a'ako jako ra'e namdapataniko daka aro nanga gita biaprangko done nokrangko rika aro uarangko ka'sne chotchina gita kangal manderangna ba nokdangrangna on'a. Je nokdangrangan an'tangtangni nokrangko an'tangtangni korosrangchi rikna gita chol ong'pajachim, uamangnaba Sorkari tangka 12,000/- ona kingking sroaniko on'a.

6-gipa daksamsoanio, Shillong, Tura aro Jowaio a'arangko namdapataniko Shillongni Lalchand Bastio 13,614.85 square metre a'arangko namdapatanina Sorkari

tangka 4.13 lakko jakkalaha. Unbaksana mitam a'arangko namdapatna gitaba Sorkari jako ra'aha. Ka'mao mesokgimin a'arangko nokdang ge'dokna suale on'aha.

1984-85 bilsigimiko Shillong, Tura aro Jowaio gimik nok te 42- rangko rike kangalrangna on'aha. 1984-85 bilsirango nok te 25 ko rikna donsoaniko te 22-kode matchotataha aro gipin te 20-koba jako ra'e matchotangengaha.

**XI. Bijolini bilrangko bikote bariatna, Electricity authority-ni kamrangko namdapatna aro songadamrangona bijolirangko ra'angna :**

Da'o dipet an'chingni Stateo 2x30 MW Uniam Umtru Upper Khri Diversion-ni Stage IV Project, iarangonikosan bijolirangko bang'e man'enga. A'bachengode 1985 bilsioni dipetan ua kamko a'bachengna on'soahachim, indiba dingtang dingtang a'selrangni bidingo ua kamko 1988-89-ona dontongna nangaha. Da'o dipet an'chingni Stateo chu'gimik installed capacity 132.62 MW ong'aha. Stateni damgni Hydel Projectrang, Mynthu Leishka H.E.Project aro Umiam Umtru State V.A. 4x30 MW iarangkoba sandie nimanaha aro Garo Hillsni Thermal Projectkoba Planning Commission ra'chakman'aha aro North- Eastern Council Programmeni ning'o ruutgijan chu'sokatgen. Stage IV Projectko matchotatahaode Generation capacity 185 MW ong'gnok.

Songrangona bijolirangko sokatangani : 1981 bilsini Censuso gita Meghalayao gimik dam 4,902 songrang gnan. Songrangona bijolirangko ra'angani kamko bakgni dake sualaha.

(1) Rural Electrification Corporationni srona on'gipa tangkachi kam ka'gipa Normal Electrification aro (2) Minimum Needs Programme 5-gipa bilsibongaparakna tangka paisarangko chame kam ka'ani bon'ao gimik dam 546 songrangna bijolirangko ra'ange on'na man'aha. 6-gipa bilsibongaparakna tangka chame kam ka'anio 1984-85 bilsirango bijolirangko ra'aange on'anina tangka lak 1,054/-ko jakkale gimik song dam 1,428-ko man'gope kam ka'na donsoaha. 1984-85 bilsini bon'ao gimik dam 1,262 songrangko man'gope kam ka'aha.

An'chingni State 1994-95 bilsirango a'songni ming 20-manchisamsogimino pangchake Stateni pilak songrangonan bijolirangko sokatangna man'gen ine ka'dongsoga.

**XII. Bolrangko bang'e ge'e porongronggipa  
biaprangko burung bolgrim pilattaina kam  
ka'aniko aro Farm Forestryko ta'rake  
chu'sokatani :**

State gimikni bolgrimrangni bak ritchaprako bak 10-ko State Sorkari jako ra'a aro uan State Geography areani bak ritchasani bakgittam ong'a. Burung bolgrimrangko ripinge namdapatna gita porongronggipa biaprango bang'e ge'ani, uarangko den'pegija ripingani aro gamchatbregijagipa bolrangko den'e bolsal, segun aro indakgiparangko ge'jitani, uarang namekae dal'na man'na gita Dist. Councilrang tangka paisarangko on'e dakchakani programmekoba bilakbatataha.

Social Forestry Programmeko State Plan aro Ma'mongni dakchakgipa Schemerangni ning'o chu'sokatenga. Ia Schemerangko a'bachengatani a'selde, skanggipao am'bolrangko, jengrangko aro chonchongipa bolrangko ba holdimrangko bariate uarangko songni manderangna jakkalchina on'na gita ong'a. Bol ge'anirango jakkalgimin porongronggipa a'arango, songni a'barango, bakrarango dakatenga. Una agreba chararangko bang'e ge'aniko dintang dintang biaprango a'bachengataha, jerangkon ramarango re'enga, dintang dintang Social institutionrangna on'atenga, jemangan Farm Forestryngi ning'o programmeko dake "Dedrang sakprakna bol pangprak" ingipa mingsinggipa miksonganiko ja'rike kam ka'enga.

6-gipa bilsirangna daksamsoanio, 1984-85 bilsini bon'angachibara tangka lak 104'50 ko Social Forestry-na donsoani palo tangka lak 192'39-ko jakkalskaaha. Ming 20-manchisamsoani ning'o 1982-83 rango gimik pang lak 100-ko ge'na donsoani palo gimik 102-pang bolrangko ge'skaaha. Indiba bolrangni tangani pang ritchaprako 94 ong'e, West Bengalni ja'manogipa biapko man'enga. India gimiko bolni tangani ritchaprako pang 95 ong'a.

**XII. (b) Biogas aro gipin wa'alni bilrangko  
bikotani :**

Biogasko sogimin ki'i ba be'enoni ong'katgipa bibaoniko man'a. Ia bibachi song'na ritna, nokrangko bijoli gita teng'atna aro kolrangko wilwilatna man'a. Indakgipa



cholrangko dake on'anina Ma'mong aro State Sorkari pilak nanga korosrangko apsan suale chilrimenga. Regional Programmeni ning'o North Eastern Councilba Biogas Plantrangko a'bachengatna gita State Sorkarirangna dakchakanirangko on'enga. 1983-84 bilsirango, Planning Commission gimik dam 5 Biogas Plantrangko songna donsoaniko dam 52-ko songskaaha.

Uarangna agreba Sorkari dingtang dingtang wa'alni bilrangko saloniko aro balwaoniko cholrangko dake nienga. Damgni micro Hydel Projectrang baksana Solar Photo Voltaic Pumps aro Windmillrangkoba bikotna 1984-85 bilsirango donsoenga.

### **XIII. An'tangni obostao pangchake banggija dedrang ba'aniko ra'gatani :**

Bang'gija dedrangko ba'aniko ja'rikaniara, mande sakantini mikkangchiko niksamsae kam ka'anisa ong'a. Sorkarini kamde mande sakantiko dingtang cholrangchi skie ma'siatanisan ong'a. Da'odipet pilak Staterangon ua kamko uigimin aro changgimin sappimin manderangko donate, pilak dolni manderangan skie on'aniko dakenga, maina skie ma'siatani gride ia programmeko mamung dakeba namekae chu'sokatna man'jawachim.

An'chingni Stateara Indiani gipin gipin Staterangoni namen dingtanga, mande jelani an'chingo komia aro a'ani apalani kri mande bang'e dongani komia. Uni gimin chongipa nokdang ba dedrang bang'gija ba'aniko didiani an'chingna indakpile ong'ja. Indiani Sorkariba uni Policyo a'brini jatrangna chongipa nokdang ba dedrang bang'gija ba'aniko indakpile didijachina tik ka'manaha.

### **XIV. Primary Health Centrerangko bang'batate namgnirangko apalbatatani aro konchi man'aniko, T.B. aro kana ong'aniko ba mikron saaniko sanne-banne naljokatani :**

Stateni manderangna, mongsongbate songrango donggiparangna sagni-ding'gnioniko champengsona aro sagipa ding'giparangna pilak dakchakanirangko on'na dingtangmancha programmerangko donmanaha jekai:

*Captain Williamson A. Sangma*

namgipa rongtalgipa ringani chirangko suale on'ani be'eni an'senganiko rakina dintang dintang cholrangchi dakchakanirangko on'ani, namkala kamrangko bikote on'ani aro an'tangtango be'en an'senge rakina skie on'ani aro indakgipa kamrang. 1983-84 bilsirango an'chingni Stateo Primary Health Centrerang gimik dam 29-san dongachim. 1984-85 bilsimitingo gipin dam 3 Primary Health Centreko kulidapaha. Dam 125 Sub-Centrerangkoba 1984 bilsini March jao donaha. 1985 bilsini March jani bon'achibara Sub-Centrerang gimik 217 ong'aha. Ia kamrangko Minimum Needs Programmeni ning'o kam ka'aha. 6-gipa Planni ning'o dam 5 Primary Health Centrerangko tuchakani palang ge 30-gipaona tang'doatna kam ka'aha.

State Sorkari ganggu chike saaniko pangnajolnan gimaatsrangna rake kam ka'ani programmerangkoba jako ra'aha. Da'o dipet State gimiko dam 27 Malaria Clinic-rangko rikaha.

Konchi saaniko rim'na aro uarangko champengsona gita dam 16 SET Centrerangko, dam 3 Leprosy Control Unit-rangko aro damsa Leprosy Colony Hospitalko donaha. Unbaksana Meghalaya Sorkarini bak nangpagipa, jenan tangka-paisarangko on'pae dakchakenga Mother Theresani rikgimin Voluntary agencykoba nirokpaenga. T.B. saanirangko champengsona man'a gita BCG tikka su'ani bidingo Multipurpose Health worker-rangna trainingrangko on'enga aro Shillongni Chest Clinic D.T.C. Outdoor Serviceko on'enga. Una agreba an'chingni Stateo dambonga Hospitalrang gnang, jerangon ia saanirangko sanenga aro ma'eke dongimin kutturirangko man'enga.

Mikron kana ong'aoniko ba saaoniko naljokatna ba sannabanna gita State Sorkari dintang dintang Programmerangko done chu'sokataha. Ru'utgija salrangmangmangosan an'chingni State kana ong'aoniko naljoke rakkianina damsa Ophthalmic Complexko kuliaha. Indake Trachoma Control Programmerangkoba pilak Districtrangon Mobile Eye Camprangni ning'o chu'sokataha. An'chingni Stateo damsa Eye Hospitalko donchina gitaba namnike donaha aro ge 5 Districtrangon Eye Specialistrangko sakprak donchinaba chanchiman'aha.

**XV. Me'chik bi'sarangna, dingtangmancha a'brini jatrangna namgni rangko dake on'ani aro an'o gnunggipa aro ma'giparangna namgipa cha'anirangko aro sanna bannanirangko on'ani Programmeko bilakbatatani :**

Be'enni bilakanina namgipa cha'anirangni komianirangko songadamni an'o gnunggipa me'chikmarango, ma'giparango aro dedrango nikna man'a. Indake uamangni songsal aro an'tangtangni obostarango nambata gadangona ra'dona man'a gita dingtangmancha kangalrangna galchipa ba aldugipa grigipa me'chikrangna, bi'sarangna aro be'eno gisiko ong'siako man'gipa pilaknan Social Welfare Programmeo donsoaha. Ia apalgipa daksoanio institutional aro non-institutional servicerango dingchike kam ka'e on'china didianirang gnan, jechin galchipa man'gipa, be'en bimango ong'siako man'gipa manderango aro integrated child development serviceko aro galchipgimin me'chikrangna nokrangko rike on'aniko uamangni janggi tangani gadangko nambatatna, songsalni obostako de'dona dakchakgen. Sorkarini on'gipa grant-in-aidrangko namekae chu'sokatna man'agita, Voluntary organisationni kamrangko apalen jakkalenga.

*Me'chikrangna namgnirangko on'nani :-* Galchipako man'gimin ba kangal me'chikrangna simsakanirangko on'ani aro uamangko namkala janggi tangani gadangona ra'bapilani programmeo, janggi tanganina kamrangko skiani ba training aro dingtang dingtang pale bote cha'ani kamrangko a'bachengatatani aro hostelrangko rikani, Voluntary organisationrangni ning'o grant-in-aidrangko on'anirang gnan. Dal'gimin me'chikrangna sea jotaniko skina gita dambonga ICDS Blockrangni ning'o kamrangko a'bachengataha.

*Bi'sarangna namgnirangko on'anirang :-* Dingtangmancha Voluntary organisationrangna, orphanagerango, day care Centrerango skie on'ani Centrerango, Park-cum recreation Centrerango, Bal Bhavan remand home (ba pattokona watatna bilsi sokkugijagipa dosi gnunggipa bi'sarangko donram biap, jean uamangko nama ramaona

*Captain Williamson A. Sangma*

rimbana skie on'a) Permanent holiday home Camprangko nirokani aro Pre-Primary skulrangna teaching aidrangko sualani aro ugita gipin kamrangkoba ka'enga.

*Be'en bimango ong'siako man'giparangna dakchakani :-*  
Be'en bimango ong'siako man'gipa manderangna Scholarshipprangko, aidrangko, Vocational trainingrangko aro dingtang dingtang dakchakanirangko on'enga.

**Be'enna gisikna dal'roroaniko on'gipa cha'anirang :**

An'chingni Stateo Nutrition programmeko minggni cholrangchi chu'sokatenga, jekai (a) Songadamrang Community Development Blockrangchi chu'sokatenggipa Special Nutrition Programme (SNP) aro songjinmarango ICDS arearango Social Welfare Departmentchi. (b) Stateni basegimin badiaba skulna Education Departmentni dakchakenggipa Mid-day-meal Programme, ia pilak kamrangkon Minimum Needs Programmeni ning'o chu'sokatenga. SNP-ni ning'o songadamni bi'sarangko bils 0-6ona, an'o gnanngipa me'chikmarangko aro degnanggipa ma'giparangko man'gopa. 1983-84 bilsirango sak 10,000 mang manderang bang'a namgnirangko man'aha. 1984-85 bilsirango sak 12,000-mang manderangna namgnirangko on'na gita tangka lak 10/-ko jakkalenga. Ian Departmentni non-plan programmeo sak 30,000 manderangko man'gope kam ka'ani baksa ong'a.

Songjinmani SNP arearang dam 69 ong'a aro Districtprako cha'aniko on'ani salranga sal 3000 ong'a. Uko ka'mao mesokatenga :-

District	Centrerang	Namgnirangko	man'gipa	Gimik
		Bi'sarang	Ma'giparang	
East Khasi Hills	31	4,650	1,550	6,200
West Khasi Hills	5	750	250	1,000
East Garo Hills	5	750	250	1,000
West Garo Hills	16	2,400	800	3,200
Jaintia Hills	12	1,800	600	2,400
Chu'gimik	69	10,350	3,450	13,800

***Integrated Child Development Servicensi Projectrang :-***  
An'chingni Stateo ia programmeko dam 11 ICDS Blockrango chu'sokatenga. ICDS projectni ning'o bi'sarangko nirokani aro maiba a'sel ong'ode uamangna ku'patiani, supplementary nutrition, rongtale an'tale dongna skiani, aro non-formal educationo indin skie on'ani bilsu 0-6 ona brigipa bi'sarangna aro degnanggipa ma'giparangna ia schemeni ning'o dakchakanirang gnang. 1983-84 bilsu gimiko sak 31,465 bi'sarang aro sak 7,215 ma'giparangna namgnirangko on'aha. 1984-85 bilsirango sak 16,000 bi'sa aro ma'giparangko man'gopate kam ka'na gita tangka lak 25'85/- ko donsoahachim indiba 33'065 bi'sarangko aro sak 6,011 me'chikrangko gimik sak 39'067 bi'sa aro mechikrangko ICDS ni ning'o man'gopate chu'sokataha.

***Mid-day-meal Programme :-*** Bilsiprakon ia Programmene ning'o bi'sarang sak 21,000-ko man'gopatenga.

**XVI. A'bachenge lekka skianiko mongsongbate bilsu 6-14 ona sokgimin me'chikrangna on'a aro dal'gimin manderangna sena aro poraina skianiko namekai chu'sokatna :**

A'bachenge lekka skianiko, Minimum Needs Programmeo, uni nangchongmotgipa bak dake man'chapataha. Uandake bilsu 6 aro 14 ni gisepogipa bi'sarangna lekka skianiko mongsongbatgipa kam dake ra'enga. 6-gipa plano General Educationna donsogimin tangka ritchaprakoniko 50/- kode Elementary Educationna ma'ekate donaha. Je bi'sarangan maiba a'selni gimin uamangni poraianiko dontongna draatako man'aha aro jemangan poraina chol ong'jae noktangtango jotton ka'enga, Primary aro Middle skulrangkode matchote poraipana man'a gita pilak cholrangko non-formal part time education Centrerangchi cholrangko on'enga. Bi'sarangko skulrango bangbate poraiatna man'na gita uamangna dingtang dingtang dakchakanirangko jekae Text Bookrang, bohirang aro pencilrangko indin on'ani. Skul uniformrangko, scholarshiprangko aro stipendrangko kangal bi'sarangna aro uko man'na kragipa bi'sarangna on'ani, indakgipa kamrangchi dakchakenga. Un baksana kraa gita

*Captain Williamson A. Sangma*

dakchakanirangko District Councilrang, State Sorkarini dakchakanirangchi diltugipa biaprango skulrangko kulienga, dingtang dingtang skie ra'ani cholrangkoba on'enga.

6-gipa daksamsoani bilsio 6 aro 14-ni gisepogipa sak 28,500 bi'sarangko Non-Formal Educationo chipdapna donsoaoni 1983-84 bilsini bon'angachibara sak 23,000-ko bimung sedapna man'aha. 1984-85 bilsio sak 6,000 chatro chatrirangko man'dapna donsoenga indiba 1984 bilsini December jaona kingking gimik 5,000-ko man'aha. Indake 6-gipa daksoaniko nipilatode Formal Primary aro Middle skulko an'chingni Stateo chalaiani chu'sokgipa ong'aha ine nikgen.

Non-Formal Educationko 1984-85 bilsio chu'sokataniko niatskaode, bilsio chatro chatrirangko sak 12,000 man'gopatna donsoaniko 1984 bilsini bon'angachibara December jaona kingking gimik sak 14,372- ko man'gopatskaaha.

Dal'gimin manderangni sena jotna aro poraina changgijaniko bon'atna kam ka'ani :- Bilsio 15 oni 35-ona, dal'gimin manderangna sena aro poraina Adult Education Programmeni ning'o skie on'aniko Minimum Needs Programmeni ning'o bak dake ra'aha. Ia programmeko National Adult Education Programmeni ning'o done tarakbatatna aro District dam 5-rangonan ra'angaha. Uarangoni dambride Rural Functional Literacy Programme aro damsade State Planningni ning'o ong'a. Da'o bilsio 15-oni 35 ona sokgipa dal'gimin manderangna skie on'ani kamrangko Stateni pilak biaprangonan sokatange on'na ingipa National Policyni bidingo 7-gipa bilsibongaprako daksoanio uko napatgen ine donsoaha.

1984-85 bilsirango MNP aro Ma'mong Sorkarini kam ka'ani ning'o dam 1,200 Adult Education centrerangko aro dam 450 Continuing Education centrerangko kulie sak 37,000 chatro chatrirangko skie ma'siatna donsoenga. 1984 bilsini December jaona kingkingde sak 26,311 chatro chatrirangko skie on'na man'aha.

**XVII. Fair price doka<sup>n</sup>rangchi salantina nangchongmotgipa cha'anirangko suale on'ani cholrangko bang'batatna. Re'rroe palgipa doka<sup>n</sup>rangko karkanao kam ka'gipa biaprangona sokatange on'na, chatro chatrirangna hostel, text bookrang aro bohirangko man'e on'na aro consumer protection movementko bilakdapatna :**

Da'odipet Public Distribution Systemrangko an'chingni Stateo, Plan Schemeni a'palosa dakaiengkua. 1983-84 bilsipet Civil Supplies Schemerangna planko dakna cholko on'chengaha. Salantina nangchongmotgipa cha'ani bosturangko ka'mao me'sokgipa dolrang sualenga. (1) MECOFED, dam 11 biaprangko diltugipa song ba biaprangko kuliaha., bosturangko kraa damo palenga, sualenga aro bregopeba donenga. (2) Recognise ka'gimin Pimary agricultural Credit Societyrang songadamrang aro Primary Consumers Societyrang songjinmarang, cha'ani bosturangko dingtang dingtang biaprangko sualenga. (3) Fair Price doka<sup>n</sup>rang cha'ani bosturangko sualenga jekae : mi, ata, gom-mi, moida, chini, cha'ani to aro karirang. Da'o dipet an'chingni stateo gimik dam 2,147 doka<sup>n</sup>rang dongaha. Districtprako badita doka<sup>n</sup>rang ghang uko ka'mao mesokenga.

Districtrang.	Fair Price doka <sup>n</sup> rang .
East Khasi Hills district.	689
West Khasi Hills district.	355
East Garo Hills district.	191
West Garo Hills district.	761
Jaintia Hills district.	151
Gimik	2,147

1983-84 bilsirang an'chingni Stateo gimik dam 300 Fair Price doka<sup>n</sup>rangko kulina donsoahachim, indiba dam 160-kosan kulina man'aiaha. 1984-85 bilsinade mamung donsoani dongkuja, maina an'chingni State Sorkari niamo sak 1000-prako Fair Price doka<sup>n</sup>rang ge'prak ingipako ga'batangaha.

Indimangba badiaba biapo uko nangchongmotenga ine nikode dokanrangko kulina cholrangkoba on'kuenga. 1984-85 bilsirango gimik dam 129 Fair Price dokan rangko kulidapaha. Dingtangmancha gipin a'song baksa sima-arirango donggipa biaprangonaba bosturangko sokangatna aro District skotongrango je damon man'a, ua apsan damon uamangnaba palna uarangko sokatangna gitaba garirango watrongenga.

Songni Padotko skotong done Vigilance Committeerangkoba songrango donaha jemangan dokanrangko, uoniko bree cha'gipa aro dokan dakgiparangni kamrangkoba nirokenga.

Re'togijagipa diltugipa biaprangona re'ange pala botani cholrangkoba a'bachengate ninaba Sorkari chanchiaha. Book Bank Scheme, Text bookrang aro Subsidyrangko chatro chatrirangna on'naniko bilsigimikon ka'dongkuenga. 1981-82 bilsirango gimik sak 29,000 mang chatro chatrirang dam 300 skulrango aro Collegeni Book Bankrangko jakkalna aro indake bang'bea dakchakanirango man'aha.

**XVIII. Investment Procedurerangko olgrokatani aro daka-rikani Policyrangko bilakbatatani, kamrangko donsoa somoio matchotna man'na gita chonchongipa daka rikani, sika koani wata chengani aro indakgiparangko somoini kri namdapatani :**

State Sector-o Sorkarini chonchongipa daka rikani kamrangko dingtang dingtang a'barango, vocational training-rangko on'e nambatatna training biaprang gnan. Uarang baksana grant-in-aidrangko tangka paisarangchi dakchakna gita nationalised Bankrangni ning'o tangkarangko srona on'aniko an'tangtangni namnika daka-rikani kamrangko an' tangtangna rikanirango dakchakaniko, somoi aro chasongni kri bosturangko namdapatna kam ka'anio pilak dakchakanirango on'enga

A'brini jatrangni daka-rikani kamrango bosturangko bikote bariatniko ra'bachina aro nitogipa gamchatgipa bostu-rangko uarango on' chape dakchinaba Sorkari didienga. Da'o dongenggipa handloom production Centerang baksana, uarangko namdapatana gipin damdok Handloom



Demonstration Cum Production Centerangko dondapaha. Jemangan Handloom Weaving Industryo bakko ra'enga, indakgipa nokdang ge 4,500-rangna Sorkari tangkarangko on'dapaniko aro kildingrangko on'e dakchakenga. Ba'rarangko bang'e dake palna man'na gita Sorkari, ka'sne ka'sne ge 200 loomrangko donan baksana ge 500 loomrangkoba Garo Hillso ra'dape changgipa sappipa ba'ra dakgiparangko seokaha, aro uamangna Intensive Handloom Development Projectni ning'o dingtang dingtang dakchakanirangko on'enga. 6-gipa Planni ning'o lak 12 square metre ba'rarangkosan dakna donsoahachim, indiba lak 12.95 square metre ba'rarangko 1984 bilsini December jaona kingking dakaha.

An'chingni Stateo chonchonggipa daka-rikanirango a'bachengatanio chu'sokgipa ong'enga ine nikgen. 1982-83 bilsirango unit ge 100- ko kuliaha aro 1983-84 bilsirango dam 70 unitrangko kulina donsoaoni dam 103 unitrangko kuliskaaha. Ritchaprako 147'1-ko kuliaha ine nikgen. 1984-85 bilsirango gimik dam 100 unitrangko kulina donsoengaoniko 1985 bilsini March jaona kingkingde dam 79 unitrangko kuliman'aha,

**XIX. Gipin a'songrangoniko bosturangko cha'ue rabagiparangko an'tangtangni namgija man'dapanina bosturangko rakkirike palgipa dokandalrangko, kajina gamna nangaoni togie jokgipa aro hisap grigipa tangkarangko jakkalgiparangni kamrangko dontongatna kam ka'ani aro uamangni kosako raka sastirangko on'ani :**

State Levelni dintang dingtang Departmentrang pilak obostarangko namekae nie dongenga Kajina gamna nangaoni togia aro pa'sike jokgiparangko rim'na man'na gita, Shillongni Superintendent of Taxes Office gital Unitko donaha.

**XX. Public Enterprises-ni kamrangko nambata gadangona ba changgipa sappipa ong'atna, uarangko jakkalna aro an'tangtangni gisepo kamrangko bikote ka'aniko bariatna :**

An'chingni Stateo ma'jangchigipa Public Sectorni dakarikani Cement Factorysan dongaia. Uko dal'batatna

skanggipa kamko ka'ani matchotaha aro gnigipa gadangkoba ka'chakatengaha. Unbaksana Public Sector ni ma'jangchigipa pale bote man'ani State Electricity Board aro State Transport Corporation, iarangan ong'a. Uarango nambate chalaina man'a gita dingtang dingtang skie on'ani kamrangkoba jako ra'enga.

## **MING 20 MANCHISAMSOANIRANGKO NAMEKAE CHU' SOKATNA MAN'NAGITA AGANANIRANG :**

Da'o dipet a'songni ming 20 manchisamsoaniko namekae chu'sokatna man'nagita, ku'patianirango Planning Department dakenga. Dingtang dingtang Sectorrangni ia programmeko chu'sokatani kamko nirokchina Review Committeeko donaha.

State Levelo Administrative machinerya jringjring ku'patianiko aro chu'sokatgnigipa kamrangko mesoke on'china gita Chief Ministerko Cabinet Sub Committeeni Chairman dake donaha.

Chief Secretary ni dilgipa, Secretaryrangni Committeeba ia kamrangko namekae chu'sokatna uko nirokjringenga aro nipile kamrangko chu'sokatenga. District Leveloha Districtrangni dingtang dingtang Coordination Committeerang, jekon District Magistrate dilenga, jaantion Districtrango ia kamrangko chu'sokatani gimin nipile kamrangko ka'enga.

Uarango namekae somoi gita chu'sokatna man'enga ine ka'dongna man'na gita Sub-Divisionprakon Ministerrangko nirokchina bilko on'aha. Uamang District/Sub-Divisionrangni dilgiparang baksa, development departmentni skotongrangko rimchape tom'anirango ong'atenga aro chu'sokatna kamrangko nipile ka'enga.

## **NIPILGIMIN MEGHALAYAO MING 20 MANCHISAMSO ANIRANG :**

1. Gama-ge'ani bidingo, donggerangko kaani, gital ge'a gamani cholrangko bikote mesokani, uarango namdapatani aro a'gako game cha'anina gisiko on'ani.
2. Nakap aro uaranggita samjakrangni bitchiloniko bikotgipa torangko bariatna dingtangmancha gisiko on'e kam ka'ani.

*Captain Williamson A. Sangma*

3. Integrated Rural Development aro National Rural Employment Programmeko apalbatatani aro namdapatani.
4. A'arangko baditana kingking apale ba dal'e ra'na ba kangna man'a uko tik ka'ani, agitchagipa a'arangko kangalangna suale on'nani aro iarangko sekame pangnajolna rakkiani.
5. Game cha,giparango kam ka,nape cha,giparangni hajirako nipilani aro uarangko namekae nigrike tik ka'ani.
6. Nokkol ita man'gipa kam ka'giparango naljoke nama kamo donpilani.
7. Scheduled Castes aro Tribesrangko namdapatna daksogimin programmeko ta'rakbatatani.
8. Ringani chiko man'gijagipa songrangona uarangko ra'ange on'ani.
9. Songadamni nanderangna nok dongchakna a'arangko on'ani aro nok rikanio dakchakaniko on'paani.
10. (a) Songjinmao kangalangni dongram biaprangko namdapatani.
10. (b) A'songni ja'manchakbatenggipa dolrangna nokrangko rike on'ani aro dakchakani.
11. Bijolini bilrangko bikote bariatna, Electricity authority-ni kamrangko namdapatna aro songadamrangona bijolirangko ra,angna.
12. (a) Bolrangko bang'e ge'e porongronggipa biaprangko buing bolgrim pilattaina kam ka'aniko aro Farm Forestryko ta'rage chu'sokatani.
12. (b) Biogas aro gipin wa'alni bilrangko bikotani.
13. An'tangtangni obostao pangchake de bang'gija ba'aniko ra'gatani.
14. Primary Health Centrerangko bang'batate namgnirangko apalbatatna aro konchi man'aniko, TB aro kana ong'aniko ba mikron saaniko sanne-banne naljokatani.
15. Me'chik aro bi'sarangna dingtangmancha a'brini jatrangna namgnirangko dake on'ani aro an'o

*Captain Williamson A. Sangma*

gnanggipa aro ma'giparagna namgipa cha'anirangko aro sanna-bannanirangko on'ani programmeko bilakbatatani.

16. A, bachenge lekka skianiko mongsongbate bilsa 6 oni 14 ona sokgimin me'chikrangna on'na aro dal'gimin manderangna aro poraina skianiko namekae chu'sokatna.
17. Fair price dikanrangchi salantina nangchongmotgipa cha'anirangko suale on'na cholrangko bang'batatna. Re'rroe palgipa dikanrangko karkanao kam ka'gipa biaprangona sokatangna on'na aro Consumer protection movementko bilakdapatna.
18. Investment procedure-rangko olgrokatani aro daka rikani policyrangko bilakbatatani, kamrangko donsoa somoio matchotna man'na gita chonchongipa daka rikani, sika koani, wata- chengani aro indakgiparangko somoini kri namdapatani.
19. Gipin a'songrangoniko bosturangko cha'ue ra'bagiparangko, an'tangtangni namgija man'dapani bosturango rakkirike palgipa dokandalrangko, kajina gamna nangaoni togie jokgipa aro hisap grigipa tangkarangko jakkalgiparangni kamrangko dontongatna kam ka'ani aro uamangni kosako raka sastirangko on'ani.
20. Public enterprise-ni kamrangko nambata gadangona ba changgipa sapgipa ong'atna, uarangko jakkalna aro an'tangtangni gisepo kamrangko bikote ka'aniko bariatna.

## **BONKAMGIPA SALRANG**

Captain Williamson A. Sangma ka'sopo saaniko namatna aro nambata sananiko man'a gita New Yorkni Sloane Kettering Cancer Institute- ona re'angaha Indiba saani name namsrangna man'jaha aro uko Delhini All India Institute of Medical Science-ona 1990 bilsini September jani 26 tariko rimbapilaha. Uko namatsrangna gita joton ka'beoba uni saanirang bilongrooangaha. Indake 1990 bilsini October jani 25 tarikni Bristibar sal, pringni 4 bajio Delhini All India Institute of Medical Science-o jringjrotna neng'takna re'angaha. Ua salon uni manggisiko Delhini Meghalaya Houseona ra'baaha.

Siani koborko man'arion Prime Minister giticham, Rajiv Gandhi aro bang'a Congress-ni dilgiparang re'batokaha. Dongrikenggipa duk ong'enggipa uni nokdangni manderang baksa duk ong'rimpaaha aro bang'a dakchakanirangko nokdangni manderangna on'aha. India Sorkarini dal'dalgipa dilgipa-rangoniba re'bapaaha, aro duk ong'ani tom'anirangko dake kattarangko nokdangni manderangna watatokaha.

*(1) Indiani President R. Venkataraman :*

Captain Williamson A. Sangmani siani kattako knana ka'bea aro namen duk ong'a. Ua an'tangko on'kange A'songtangna ru'uta bilsirangna kamko ka'aha. Uni sianganichi A'song uagita A'songtangna ka'sagipa mandeko gimaataha. Angni duk ong'paani kattarangko duk man'enggipa uni nokdang aro Meghalaya A'dokni manderangna iachi watatenga.

*(2) Indiani Vice President Dr. Shankar Dayal Sharma:*

Captain Williamson A. Sangmani siani kattako knae namen ka'bea aro duk man'bea ine aganaha. Ua indake agananguaha, Captain Sangma saksa namgipa aro bil amgipa sason ka'gipa ong'achim, Uni jatna ka,sae jatgimikni chugnina kam ka'ani a'bao an'tangko on'kange kam ka'anirangko pangnan gisik ra'kamgen.

*Captain Williamson A. Sangma*

**(3) *Meghalaya A'dokni Governor, Mr. Madhukar Dighe :***

Duk aro kalimani kattarangko janape Meghalaya A'dokni Governor, Mr. Madhukar Dighe indake janapaha. Captain Sangmani sianina duk ong'bean baksa an'tangni ka'beani kattarangko kalimenggipa nokdangni manderangna watataha. Meghalaya A'dokni ru'uta bilsirangna Chief Minister ong'e uni namgipa sason ka'ani aro niamrangko name uibegipa ong'an baksa uni mikkim gnange re'dilrongani gamchatbeachim. Uni gimaania bang'anan ong'a. Uni Salgro Saliram a'pakna aro a'songgimikna ru'utbee kam ka'anirangko gisik ra'angkugen ine Governor aganaha

Captain Williamson A. Sangmani siani koborko man'soarini Meghalaya A'dokni Chief Minister Mr. B.B. Lyngdoh, uni gipin Ministerang aro Officerang duk ong'ani tom'aniko Meghalaya Secretariat-ni dringo ong'ataha. Ia tom'anio Meghalaya A'dokni Chief Minister Mr. B.B. Lyngdoh Capt. Sangmani kamrangni gimin jinmana indake aganaha.

**(1) *Meghalayani Chief Minister, Mr. B.B. Lyngdoh :***

Captain Williamson A. Sangma-ra Meghalaya A'dokko ong'atna kam ka'anio dakdilchenggipa aro dilgiparangoni mongsongbatgipa saksa ong'aha. Capt. Sangma, uko Mizoram A'dokni Governor dake watatako man'kujanakingking Sorkarina aro Meghalaya A'dokna 1970 oni 1988 bilsirangona kam ka'angaha. Mr. B.B. Lyngdoh, gipin Ministerang aroba Officerangni pal uni gimaanina dongrikenggipa nokdangna aro bakdilrang baksa kalimpaaniko janapaha.

Sianggimin A'songni dilgipa, Capt. Sangmako mande ra'ani chin gita Meghalaya A'dokni pilak Sorkarini Officerangko ua salo chuti on'aniko Chief Minister parakataha aro salgittamna joljol kalimani salrang dake manina gitaba janapjola.

**(2) *MPCC (I) dol kalimani tom'aniko ong'ataha:***

MPCC (I) dol Capt. Sangmani sianina State-ni President, Mr. D.D. Lapang dilgipa ong'e tanggitik kalimani tom'aniko ong'ataha. Ia tom'anio A'songni dilgipa Captain Sangmako mande ra'anirang baksa uni A'songni manderangna aro Salgro-Salaram a'pakgimikna kam ka'anio chusokgipa

*Captain Williamson A. Sangma*

kamrangko janapjolaha. Ia kalimani tom'ani somoio bangan aganaha.

*Agangiparangoni* : Mr. D.D. Lapang, Mr. S.C. Marak, Mr. B.K. Roy, Mr. R.T. Rymbai, Mr.B.B. Dutta, Mr. O.L. Nongtdu, Mr. Manniar, Mr. S. Lyngdoh, Mr. P.G. Marbaniang, Mr. T.N. Joshi aro Maya Rani Kyndiah ong'achim.

**Dingtang dingtang Union-ni dolrangni tom'anirang:**

Dingtang dingtang, jekae, Garo Students Union, North East India United Garo Students Union, A'chik Students Union, All Assam Garo Students Union dolrangba Captain Williamson A. Sangmani sianina 1990 bilsini October jani 25 tarikni attamo duk ong,beani tom'aniko daktokaha. Ia tom'anirango dingtang dingtang agananirang baksana Captain Sangma-ra mukut stikatako mangiparanggita ong'gija, indiba A'chikrangni Raja aro Meghalaya A'dokni dilgipa onga ine janapaha.

**Captain Williamson A. Sangmani siani somoi, 1990 bilsini October jani 25 gipa tariko Turao ong'a obostarang:**

1990 bilsini October jani 25 gipa tarik Bristibar pringo Captain Williamson A.Sangmani siani katta Turao rangsanangipangaha. Ua pringo radio-o agananirangko knaan baksa ong'a obostarangko T.V- oba niksona man'aha. Ia katta bakan A'chik songgimikonaba sokangaha. Tura songjinmao salantio ong'rongenggipa janggi tangani obostarang rang'sanan dimelaha aro ia dukni katta sakantikon jadipchangataha. Schoolrang, College aroba Officerangko chiptokaha. Pilak dokanrangko ant'tangtanganin chiptokaha. Darangchin gripchijang ong'tokaha. Da'o maiko dakgen aro uni manggisiko bano aro maikae ra'bagen, sakantini gisikon uina skani gape saksa sakgipino sing'griktokaha. Jatgimikni padot ong'anio uni wate re'angania nokdangnasan ma'drang maharinasan gimaani aro kalimani ong'aajaha. Indiba uni pilak kamrangko chanchiate A'songo songdonggipa sakantinan gimabeani aro duknirang ong'chongmotaha. Uni nokdangni manderng baksa duk ong'rimpana bang'a manderangan uni nokona tom'batokaha.

### *Captain Williamson A. Sangma*

Captain Williamson A. Sangmani manggisiko Delhi Meghalaya Houseoniko Gauhati Borjhar Airportona IAF planeo ra'baaha. Uano Assamni aro gipin dilgiparang mande ra'e rimchaksoaha. Gauhati Borjhar Airportona Capt. Sangmani bimangko ra'bana gita Indiani Prime Minister gitcham aro da'o Indiani Congress (I) ni President, Mr. Rajiv Gandhi dakchakbeaha. Uni dakchakanichisa Turaona Planeo aro helicoptero uni bimangko ra'bana chol ong'aha. Pilak ra'baani korosrangna Raymonds dolni Mr. V. Singhanian dakchakaha. Iana sakantian mitelbena kraa. Capt. Sangmani nokdangni manderang somoigita bilrongenggipa Indian Airlineso Gauhati Airportona bilbaskaaha.

Capt. Sangmani bimangko Gauhati Borjhar airporto Indian Air Force (AF) helicopteron a ra'sremitingo Meghalaya Policeni dolrangchi mande ra'e rimchaksoaha. Bang'a Congress dolni dilgiparang aro gipinrangba Capt. Sangmani bimangko mande ra'e rimchaksona Gauhati Borjhar Airportona sokangaha.

#### **Uamangoni :**

Mr. D.D. Lapang, President, Meghalaya Pradesh Congress Committee (I), MPCC (I) Mr. H.Suchiang, MLA and MPCC (I) General Secretary, Mr. P.G. Marbaniang, (MP), Shillong City Congress (I) ni president, Mr. S.C.Marak, East Garo Hills Distrctni Congress (I) ni-President, Mr.B.B. Dutta, North Eastern Congress Coordination Committee(I) ni General Secretary. Mr. Hiteswar Saikia, Assam Pradesh Congress Committee (I), Mr. Dharinidhar Basumatari (Ex-MP) aro APCC (I) ni Vice President, Mr. Shambhu Ojha, APCC (I) ni General Secretary aro gipinrangba dongachim.

Assam gimikni pal Mr. Thaneswar Boro, Planningni Ministerr aro Mr. Shamsing Hanse, Hill Areas-Development-ni Minister uano dongpae mande ra'ani bibalrangko Capt. Sangmani bakosni kosako doneaha.

Ia Assam-ni sakgni Ministerang Captain Sangmako gopani somoio Assam-ni Home Minister, Mr. Brigu Kumar Phukan baksa Turaona salgipino bon'chote mande ra'aniko dakna re'bana tik ka'aha.



*Captain Williamson A. Sangma*

Ua somoio Meghalaya-ni Governor, Mr. Madhukar Dighe-ni palo Meghalaya-ni Additional S.P. aro ADC, Mr. B.R.Rana re'bae mande ra'ani bibalko doneaha. Uamangna agreba Meghalaya Police-ni palgita Mr. H.S. Chittaranjan, DGP-ba uano dongpaaha. Indake attam 12:30 bajio dingtangmancha IAF-ni helicoptero songtang Turaona Capt. Sangmani bimangko Gauhati Borjhar Airpontoniko ra'chakatbaaha. 1990 bilsini October jani 26 gipa tarikni 1 (sa) bajio Capt. Sangmani bimang Tura helicopter bilonchakram biapona sokeaha.

Uni bimangko Meghalaya A'dok Sorkarini Social Welfare Minister, Mr. Clifford R. Marak aro Minister of State Mr. Serjee Sangma mande ra'e rimchaksoaha. Meghalaya Police-ni dolba uko mande ra'e rimchaksoaniko dakaha. Ua biaponiko uni nokona dingtangmancha Policerangni tarigimin motor gario uni bimangko ka'sine ka'sine ra'baaha. Banga manderangan uko mande ra'e uni bimangni ki'sang ki'sang chro chro jarikbatokaha.


**1990 bilsini October jani Sonibar sal, 27 gipa tariko Turao ong'a obostarang :**

Captain Sangmani bimangko uni nokni dringo donaha. Bon'chote uko mande ra'e gronganiko dakna bang'bea manderang re'baaha aro mande ra'aniko me'sokna pulni bibalrangko uni bakosni kosako aro samtangtango dandaketokaha. Ua somoio uni nokni sa'raon bon'kamgipa kalimani tom'anikoba ong'ataha. Ua tom'anio Mr. Sandford Marak, MP tom'aniko dakdilaha.

**Mr. Sandford Marak, MP.**

Mr. Sandford Marak, MP tom'anio indake aganaha. Capt. Sangmara A'songtangna kam ka'anio bang'a namgnirangko dakna amgipa dilgipa ong'a. Uan Indiani Salgro-Salaram a'pako saksa mongsongbatgipa dilgipa ong'a. Bini a'selsa an'chi tingtotsaba ong'ani gri Meghalaya A'dokko bimangona ra'bana man'aha. Uni siantal A'chikrang ka'sagipa aro kaketgipa pagipako gimaataha. A'chikrangan ong'ja, indiba A'songgimikba indakgipa namgipa sason ka'gipa mandeko jakwataha.

*Captain Williamson A. Sangma*



Attam 12:30 bajio dingtangmancha IAF-ni helicoptero songtang Turaona Capt. Sangmani bimangko Gauhati Borjhar Airportoniko ra'chakatbaaha. 1990 bilsini October jani 26-gipa tarikni sa bajio Capt. Sangmani bimang Tura helicopter bilonchakram blaona sokeaha.

*Captain Williamson A Sangma*



**Capt. Sangmani bimangko Meghalaya A'dokni Ministerang, bang'bea manderang aro Meghalaya Police dol uko mande ra'e Tura helicopter bilonchakram biapo rimchaksoaha aro Policerangni tarigimin motor gario uni bimangko uni nokona ra'baaha.**

*Captain Williamson A. Sangma*



**Capt. Sangmani bimangko uni nokni dringo donaha. Bonchote uko mande ra'e gronganiko dakna bang'bea manderang re'baha aro mande ra'aniko me'sokna pulni bibalrangko uni bakosni kosako aro samtangtango dandaketokaha.**

**Mr. B.G. Momin : Meghalaya Supply Minister :**

Meghalaya A'dokni Supply Minister, Mr. B.G.Momin indake aganaha :- Captain Sangma an'ching baksa dongjahaoba, uni pilak kamrang aro uni dakmesokanirang an'ching baksa tange donga. Uni bimchipe jatna kam ka'ani, kaket ong'ani aro jatangko chel'chakaniko an'ching sakantian gualna man'ja. Batesa uni gaanggimin ja'kolrangko jarike ja'ku rikgiparang ong'pana krenggiparang ong'na nanga. Amadipet uni dakmesoke donanggimin ja'kuko ga'pana angaba joton ka'pagen ine ua aganangaha.

**Mrs. M.D. Shira, Meghalaya Transport Minister :**

Anga ma'giparangoni saksa ong'pae da'alo Capt. Sangmagita depanteko gimaatna duk ong'bea. Indonga depanteko ba'ania namen rasong chabeaniba ong'a. A'chik ma'a saksa ong'e anga indake chanchimana. A'chik ma'giparang indonga depanteko ba'mantaikugenma? Ma'gipa sakantian depantetangtangko jatna ka'sagipa, jatgimiko re'dilgipa, A'songni dilgipa ong'atpana joton ka'atgiparang ong'china, jedakode A'chik jat namroro silrroanggen. Indake ku'patia gngang ua aganaha.

**Mr. A. Zaman, Ex-MLA :**

Anga Capt. Sangma baksa banga somoirangnan kam ka'rimaha. Uo jat baseani dongja. Pilak A'chik A'songo songdonggipa jatantinan ka'saa. Darang gipin jatnaba dakbadeani gri. Uni gimin ua pilak jatrangnin namgipa dilgipa, ka'sagipa pagipa ong'a.

**1990 bilsini October jani 25 tariko Captain Williamson A. Sangmani siani kattako kinarin bang'a North-eastern Indiani A'dokni manderang du k ong'ani tom'aniko ong'atatokaha.**

1. North-eastern Congress (I) Coordination Committee-ni Chairman-ni Officeoni Capt. Sanginani sianina kalimani kattarang baksa indake janapjolaha. Gital Indiani janggi tangna kam ka'ani kamrango, bang'aon ua bakrangko on'pagipa ong'aha. Indakgipa manderang bang'gija

*Captain Williamson A. Sangma*

manderangsang dongaia aro uamangoniko minggenode Capt. Sangmaba saksa ong'paa. Capt. Sangma North-east India Congress dolko namroraotna kam ka'anio a'bachengdilgipa ong'achim. Uan Meghalaya A'dokko rikdilchenggipa aroba uni bimungan North-eastern India a'pakgimiko skanggipa biapko man'chengaha. Ia kattarangko seanio ka'mao mesokgimin manderang soi ka'tokaha.

Mr. B.B. Dutta, Mr. R. Koijam, Mr. Lianswama, Mr. D.D. Pugh, Mr. H.K. Boro, Mr. R.C. Chiten jamir, aro Mr. G. Myllemngap.

Stateo sason ka'ani bidingo Capt. Sangmara pagipagitachacha ong'a aro bang'a demitelani kattarangko aganan baksa Communist Party of India (CPI) dolba duk ong'ani tom'aniko dakaha.

Capt. Sangmani sianina North-eastern Councilni Secretariat biapo duk ong'ani tom'aniko ong'atanio indake Capt. Sangmani tangmitingo chanchiani aro ka'tongni skanirangko janapaha. Ua A'brini manderangni nangrimgrikani, nambata obostao manderangni janggi tangani aro sason-ni bidingo namroraanina dontonga gri joton ka'gipa ong'aha. Uni kamrangara North-eastern a'pakgimiknan ong'aha. Ia tom'anio Capt. Sangmani NEC-ni member saksa ong'ani gamchatani aro a'pakgimikni namroraanina uni ra'baanirangko gualna man'ja ineba janapjolaha.

Mizoram A'dokni Chief Minister, Mr. Lal Thanhawlaba Capt. Sangmani sianina kalimani tom'aniko dakaha. Ia tom'anio Mizoram A'dokni Chief Minister indake aganaha. Capt. Sangmani siani, North-eastern a'pakgimiko sason-ni bidingo uibegipa mandeko gimaataha. Ua a'pakgimiko kamrangko chusokatna man'gipa aro sason ka'gipa mandeba ong'a.

Mr. Brigu Kumar Phukan, Assamni Home Minister, Capt. Sangmani sianina duk ong'ani tom'aniko ong'atanio indake aganaha. Capt. Sangmara sason-ni bidingo chagitchambatsranggipa, uibegipa saksa mande ong'achim. Indake ua sason-ni bidingo chu'soksrangani kamrangko donangaha.

*Captain Williamson A. Sangma*

Tripura A'dokni Chief Minister, Mr. Sudhir Ranjan Mazumdar, Capt. Sangmani sianio duk ong'ani kattarangko dongrikenggipa jik-dedrangna watataha aro uano indake seaha. Capt. Sangmara a'brini manderangni dal'gipa dilgipa ong'achim. Uni sianichi North-eastern a'dokjolo donggipa manderangna gimabeani ong'aha.

Assam Pradesh Congress (I) Committee-ni tom'anio Assamni Chief Minister gitcham, Mr. Hiteswar Saikia, Capt. Sangmani sianina indake aganaha. Indiani Northeast a'pako Capt. Sangmani sianichi namgipa dilgipa, niksamsogipa aro gisik seng'gipa mandeko gimataha.

Mr. P.R. Kyndiah, Meghalaya Legislative Assembly-ni Speaker, Capt. Sangmani siani bidingo indake aganaha. Jatgimik, a'pakgimiko aro dintangmancha Meghalaya A'doko Capt. Sangmagita dilgipa mandeko gimaatania da'alo bangbang ong'anigita ong'aha aro uako kolgapilatna mantaijawaha. Indakgipa dalgipa mandeko gimaatna an'chingna namen ka'beani ong'chongmota. Una agreba bang'a Legislative Assemblyni manderang aro Officer-rang indake aganangkuaha. Ia rakbegipa sal aro somoirango Capt. Sangmako gimataniera jatgimikni aro an'chingni ka'tong aro gisikrangko bangbang ong'ataha.

Mawkhar Block Congress Committe (I) dolba Capt. Sangmani sianina duk ong'ani tom'aniko dakaha. Duk ong'aniko me'sokna minutegnina jrip jrip dongan baksa bi'aniko ong'ataha.

1990 bilsini October jani 27 gipa tariko Capt. Sangmani bimangko uni nokni dringoniko, gisik ra'nagita uni a'bachenge rikdilanggipa District Council Office nokona pring 11:30 bajio nitoe tarigimin gario ra'ange una kandigipa bi'aniko Garo Hills District Councilni memberang aro officeni pilak manderang dakataha. Ua biaponi joljolan uni bimangko Turani Baptist Gilja nokona ra'angaha. Uni bimangko rabamitingo banga manderang sorok samtangtangan jrip jrip chadenge nichaksoaha. Bang'bea manderang uni bimangko ra'baengmitingo jro jro dake jariktokbaaha. Bang'a manderang Gilja nokni sarao uni bimangna sengsotokaha. Ua somoio tom'dakgipa manderangko changenchim ong'ode haida hajal bongana agrede komijawa. Ua somoio bang'a dal'dalgipa

*Captain Williamson A. Sangma*

manderangba dongachim. Gilja noko uni bimangko donmitingo Meghalaya A'dokni Governor, Mr. Madhukar Dighe aro Assamni Chief Minister, Mr. Prafulla Kumar Mahanta-ni pal watatgipa, Cabinet Minister saksa bon'kame mande ra'aniko me'sokna uni bakosni kosako pulni bibalrangko doneaha. Bon'kame una bi'aniko dakaha.

Gilja nokoniko uni bimangko uni nokonan ra'angpile bon'kame Meghalaya Policerangni dolchi mande ra'e salam ka'aniko dake attamni bri bajimango uni nokni sambao jringjrotna nengtakna gita uko donataha. Uni janggi tangmiting salrango A'chik A'songna, Meghalaya A'dokna, Indiani Salgro-saliram a'pakni manderangna aro India A'songgimikna kam ka'anirangko chanchiode an'ching sakantian una gro nanggiparang ong'chongmota. A'chikrangnisan ong'aija, indiba Capt. Sangma A'chik Asongo songdonggipa pilak jatrangnin pagipa ong'a.



*Captain Williamson A. Sangma*



**Capt. Sangma bimangko Turani Baptist Gilja nokona ra'angaha aro bon'chotgipa bi'chakaniko dakaha aro ua somoion Meghalaya a'dokni Governor, Pa. Madhukar Dighe mande ra'ani pul bibalrangko Capt. Sangma bakosni kosako donataha.**




**Gilja nokoniko Capt. Sangmani bimangko uni nokonan ra'angpile bon'kame Meghalaya Policerangni dolchi mande ra'e salam ka'aniko dake attamni bri bajimango uni nokni sambaon jringjrotna neng'takna gita uko donataha.**

# XXI

## MEGHALAYA

A'bachengao Assam a'dokni ning'on dingtangmancha sason ka'ani bilni ning'o ra'rone, "MEGHALAYA" a'dokko 1970 bilsini April jani 2-gipa tarik intal a'bachengataha. Jamano chu'gimik Assamoniko ma'atsrange 1972 bilsini January jani 21-gipa tariko Meghalaya-ko dingtangatsrangaha. Meghalaya a'dok-chigara, a'bri aro a'kawe bringipa biap dongansenggipa ong'a. Salgrochi Assamni Goalpara, Kamrup, Nowgong aro Karbi Anglong districtrang, Salaramchi Assam a'dokni Cachar aro North Cacharni a'brini districtrang aro Salgipeng are Saliramchi Bangladesh a'dokni biaprang ong'a.



MAP OF MEGHALAYA

Iano Assam a'dokni damgni a'brini a'dokrangko man'gopa. Uarangara : Khasi aro Jaintia aro Garo Hills districtrang ong'a. Meghalaya a'dokara 2501, N aro 2605' N latitude aro 85049, aro 9 2052, E longitude-ni ning'o donga.

**Apalani :**

Chu'gimik a'dokni apala, 22, 429 square kilometre aro mande jela gimik 17,60,626 sak ong'a. Meghalaya a'dok chu'gimikko da'o kam ka'tonagita bakgittam districtrang dakaha aro ja'mano bak bunga dakataha. Uarangara-1. Jaintia Hills district aro uko 1972 bilsini, February jani 22-gipa tarik intal ong'atchengaha. 2. East Garo Hills district aro 3. West Garo Hills district aro uarangko 1976 bilsini, October jani 22-gipa tariko ong'atchengaha. 4. East Khasi Hills district aro 5. West Khasi Hills districtrangko 1976 bilsini October jani 28-gipa tarik intal ong'atchengaha. Mongsongbate Khasi, Jaintia aro Garo, a'brini jatrangni songdongbatgipa a'dok-chiga ong'a. Ia jatrangara dintang dintang a'brini gitcam ma'malrangni derutchu-su'rutchurangan ong'a jemangon ma'atgimin kam aro man'rikrikbagimin bewalrang dongachim.

**A'dok-chigarangni ong'telaigipa bakrang :**

Khasi aro Jaintia Hills districtrangara Meghalaya a'dokni bijangchi aro Saliram a'pakjolrang, a'kimbri aro chibima a'kawejolrang gapachim. Salgipengjolrango a'kimbri aro chugipa a'dare aro a'solsolrang gapachim, chubegipa chidarerang a'brirangni gonggeske a'kawerangona jokonanga aro indake uaranga'songgipin a'simarangko batsote Bangladesh a'dokona jokanga. Salgrochipak a'brirangoni ka'sne ka'sne dakonjolange Assam a'dokni a'kawerang baksa nangdimea. Ia a'brirangara dintang dintang chua onanio mitamrang 170 metreoni 820 metrerangona ong'a. Assam a'dokni Gauhati biaponi Shillongona re'ani bijangchi ramao Nongpohjolo 700 Metre chua.

Khasi Hillsni bijangchi a'chugipa biaprangara 1500 metreoni 2089 metrerangona ong'a. Shillong a'kimbri (Shillong Peak) 1965 metre ong'a aro uanoni chu'gimik Shillong songjinmako nikonata.

Meghalaya a'dokni saliramchibara Garo Hills district ong'a aro a'brirangara Khasi Hillsna bate onbatkala. Garo Hillsni chubatgipa a'bidingara 450 metreoni 600 metrerangona ong'a. Salgrochipak a'brirang dakonange Assam a'dokni Brahmaputra chibimani a'kawerang baksa

nangdimea aro salgipengchi Bangladesh a'dokrangni a'kawerangona sokanga. Garo Hills districtni chubatgipa a'briara Nokrek a'bri aro uan 1417 Metre chua.

Garo Hills districtni a'brirangoni salgrochina jokanggipa, Ildek, Manda, Damring, Didram, Jinari, Jinjiram, Ringgi aro Ganol chibimarang ong'a. Salgipengchi jokanggipa-Bugi, Dareng, Simsang, Rongdi, Kanai, Mahadeo aro Moheskola chibimarang ong'a. Garo Hillso dal'batgipa chibimara Simsang chibimaan ong'a.

Khasi aro Jaintia Hills districtni Salgrochi jokanggipa, Khri, Umtrew, Umium, Umkhlen aro Kupli chibimarang aro salgipengchi jokanggipa Kynshi, Umiam, Mawphalang aro Umngot chibimarang ong'a.

### **Mikka bilsa aro Karirang :**

Meghalaya a'doko mikka waaniko bakgni dake sualna man'a. (1) Salgipeng-Saliramni balwakari (South-West monsoon) aro (2) Salgro-salaramni balkasin (North-east winter winds). Kariranko bakbri dake sualna man'a:- (1) Ritimkari (Spring season) March aro April Jarang. (2) Ding'kari ba Wachikari (Rainy season) May jaoni September Jaona, (3) Mitekari (Autumn Season) October aro November Jarang aro (4) Sin'kari (winter Season) December Jaoni February jaona.

March aro April jarangoni ding'na a'bachenga aro ritimkari somoiba ong'a. June jaon a'doko ding'batgipa ja ba somoi ong'a. Ua somoio ding'aniko toe niani gita Turao 34° aro Shillongo 26° celsius ong'a. October aro November jarangan chaktobatgipa somoirang ong'a. Ua somoirango ding'aniara 2° celsius ong'a.

May jani gittamgipa antirangoni mikkarang tipchanggiya wana a'bachenga aro September jani bon'kamgipa aro basakobara October jani bijangchini mikkarang tipronga. Ua jarangan Khasi Hills districtni salgipeng a'pakjolrango bang'bate mikka waa. Cherapunjee aro Mawsynram biapरणon ua somoirango a'gilsakgimikna bang'bate mikka waa. Bilsigimiko mikka waaniko toe nianio 12000 mm ong'a. Shillong songjinmao bilsigimiko mikka waaniko ra'dimgope toe niani 2150 mm ong'a.

### **Skotong Songjinma :**

Meghalaya a'dokni skotong songjinma, Shillong ong'a. Shillongara India a'dokgimikni gisepo a'brio dongchakna minge dongipa biaprangoniba damsa ong'a. Ding'karini somoio dongtogipa biap ong'a. Bils i ritchasana baten British Sason ka'anio Shillongko skotong dake jakkalbaaha.

Ia chasongoba Shillong songjinmaan Meghalaya a'dokni skotong songjinma ong'a. Nitogipa biaprang jekae: Wards' Lake, Polo ground, Green Golf course, Lady Hydari Park, Shillong Peak aro gipin gipinrang donga. Songre-songgabate nirorogipa, songgipin a'gipini manderangna namnamgipa dongchakanirangkoba rikaha.

Gipin a'dokoni rebagipa manderangna Shillongona namgipa rea-doani ramarang donga. Meghalaya a'dokni ning'o gipin districtrangni skotong songrang, jekae Tura, Jowai biaprangni re'rurana gita re'ani cholrang bang'a. Gipin biaprangoni Shillongona rebana gita Shillongoni kilometre 20 chelgipa, Umroi minggipa biapo airport damsa donga.

Shillongara North-Eastern Council, Eastern Air Command, Assam Rifles, Assam Regimental Centre aro 101 Comm Zonerangni skotong biapba ong'a. North Eastern Hill University, Governorni nok, Bench of the Gauhati High Courtni Officerangni dongchakanirang donga.

### **1991 Census ba mande bang'aniko chanani**

India gimiko mande jelani	chu'gimik	– 8,43,930,861 ba 844 Million
	Me'asa	– 4,37,597,929
	Me'chik	– 4,06,332,932
Mande bariani 1981 oni 1991 bilsiona		– 1,601,764 (23.50%)
Square kilometreprako mande bang'a		– 267 sak.
Me'asa hajalprako me'chik sak 929 ga'aka		
Leka poraiani		– 52.11%
Leka poraianio Me'asa 63.89%		
Me'chik 39.42%		

## **Meghalaya Stateo**

1991 bilsio mande banganiko channe man'aonigita Meghalaya a'dokgimiko mande 17,60,626 ong'aha. Me'asa sak 9,04,308 aro me'chikara 8,56,318 ong'a. Chu'gimik 17,60,626 manderangoni 6,89,419 sak manderang skia man'giparang aro uanoni sak 3,77,281 me'asarang aro 3,12,138 me'chikrang ong'a. 1981 aro 1991 bilsini gisepo a'songo mande baria, 4,24,807 ong'a aro 31'80 percent baridapa. 1971 oni 1981 bilsirangni gisepo 32'04 percent mande bariana bate 1981 oni 1991 bilsirangni gisepo bariani 31'80 per cent ong'e on'tisade komibata. Mande jelania square kilometreprako sak 78 dake ong'a.

## **Meghalaya Stateo aro district damprako mande jelaniko mesokani aro skia man'ani :**

State/Dist.	Me'asa	Me'chik	chu'gimik	skia man'gipa Me'asa	Me'chik	Gimik
Meghalaya	9,04,308	8,56,318	17,60,626	3,77,281	3,12,138	6,89,419
Jaintia Hill	1,10,929	1,08,257	2,19,186	30,322	31,047	61,369
East K/Hills	3,41,216	3,15,944	6,57,160	1,72,659	1,47,219	3,19,878
West K/Hills	1,11,051	1,06,411	2,17,462	45,009	39,929	84,938
East G/Hills	96,439	92,604	1,89,043	40,676	29,354	70,030
West G/Hills	244,673	2,33,102	4,77,775	88,615	64,589	1,53,204
Total	9,04,308	8,56,318	17,60,626	3,77,281	3,12,138	6,89,419

## **Sasonni biding**

Shillong songjinmao, tom'chimonge niamrangko tarichakram nok donga. Ia tom'anio bak ra'giparang biap damantioniko seokgimin manderang sak 60 donga. Khasi Hills districtoniko sak 29, Jaintia Hillsoniko sak 7 aro Garo Hills districtoniko sak 24 dake seokgimin manderang ong'a. Meghalaya ong'chengmitingo district ge'gnisan ong'kuaiengachim. Indiba ruutgijan ge'gittam Sub-divisionarangko ong'ataha. Uni ja'mano Meghalaya Stateko pe'rarone dam 5 districtrang aro dam 10 Sub-divisionrangko ong'ataha, aro da'o chu'gimik Community Development Blockrangko dam 30 ong'ataha, jedakode song-nokrangko

namdapatani kamrangko altuabate jako ra'na man'gen aro kam ka'tobatgen. Indiani sason ka'ani niam ki'tapo dongimin Sixth Scheduleo on'sogiminrangko chu'sokatna kam ka'na gita Meghalaya Stateo damgittam District Councilrang donga. Uarangara Khasi Hills District Council, Jaintia Hills District Council aro Garo Hills District Councilrang ong'a. District Councilantion kamrangko name kam ka'e chu'sokatna gita Executive, Legislative aro Judiciary dake suala. District Councilni memberangko bilsi bongaprakna jinmachi seokanirangko daka.

### **Man'rikrikbagipa jatni bewalrang**

Meghalaya a'dokara Indiani gitcam dolgittam a'brio songdonggipa manderangni dongram ong'a. Dolantini janggi tangani bewalrangon maniani, bebe ra'ani, chrok-mesaani, ring'a aro dokadamani aro gipin kalsusaanirang donga. Khasi aro Jaintia dolrangko Mongolia a'dok chigaoni Indiaona rebachenggipa ma'malrangoni ong'a ine chanchichipa. Ruutbea bilsirangon uamang da'o songdongenggipa biap-a'dokona katbae songdongaha. Biapgipinrangoni dingtangmancha ma'ekataniko man'e British sason ka'giparangchi dokol kaaniko man'ana agrede an'tangtangni jakgitel ong'aniko ripingbaaha.

Aganritingbaanigitade Garorangara Tibet a'dok-chigaosa songdongachim ine bebe ra'a. Ua biaponi re'brangbae, dintang dintang dolni dilgiparang baksa, dintang dintang biapranggita re'bae ruuta bilsirangnan Songdu chibimani a'kawerango songdongrorobaaha. A'kawerango dintang dintang sason kagiparang baksa nangrimgrikna man'jae A'chik a'songona songdong-a'chana rebaaha aro ja'mano jelbra-jelsuaha. Khasi aro Jaintiarangitan Garorangba British sason ka'giparangni dokol ka'ao gaakuanakingkingde jakgitel ong'e songdonggiparang ong'achim.

### **Jatni mongsonggipa manianirang**

Nongkrem Chrokani (Pomblang Nongkrem) : Ian Khasirangni mongsongbatgipa maniani aro chrok-mesaani mingsa ong'a. Bebe ra'e, kusi ong'a gngang nokgipani gama-ge'anio patianina aro tomtoma janggi tangatanina



ka'sroke on'pilskaaniko maniani ong'a. Iano mongsongbate a'dokni Raja aro pilak manianirangko nirok gipa, dilgipa me'chikrang, Rajani jakrimrang, kamalrang bakko ra'a. Ia manianiko bilsiantian doke-dam'e, kusi ong'e October ba November jarangni gisepo Shillongni kilometre chisa chel'gipa biap, Smit minggipa songo manianiko dakronga. Ia manianiko salbonganakingking ong'atranga.

*Shad Sukmysiem* : Iaba minggipin Khasirangni mongsonggipa maniani ong'a. "Shad Sukmysiem"-ni ortoan gisiko katchae ka'sroke chrok-mesaani ong'a. Me'trang an'tangtangni dongatoktokko gane-chinne aro me'asarangba tarie-tilonge chrokanirango bak ra'a. Dama doke, bangsi sike chrok-an'senganirango daka. Ia manianiko bilsiantin Shillong songjinmao April jao ong'attranga.

*Behdingkhlam* : Ian Jaintiarangni mongsongbatgipa maniani aro iako bitchri-bijongrangko ge'man-gomano July jao skotong song, Jowaio bilsiantian manironga. Ia chrokanio name nitoe ganne-chinne me'asarang bako ra'a. Ia manianio me'chikrang chrokaniko dakja. Indiba me'chikrang noktangtango pagitcham-ma'gitchamrangni jamajanggina minge cha'anirangko on'anirango bak ra'a. A'gilsako dongmitingo name salrangko reatna aro sian- pil'sachi nama biapo ong'pana man'agita bi'anirango daka. Me'asarang nokingrangko go'olchi dokroke namgija ong'atgipa gisik, duk aro saknaatgipa miteko rikgalaniko daka. Ian Isolko okame, pilak gamma-ge'anirango patipachina bi'ani manianiba ong'a.

*Wangala* : A'chikrangni bebe ra'anio bang'bea manianirang donga. Uarangoni "Wangala" manianian bilsini bon'kamao dalbatgipa maniani-ong'a. Mandena gamma-ge'ani cha'chri rongjanggirangko patichenggipa Misi A'gilpa Saljong Galapa ong'a. Gammage'anirangko niroke dal'at- silatgipara Minima Kiri Rokimesa ong'achim. Ia manianiko a'baoni gamma-ge'anirangko jakchotmano bilsianti October jao ong'atranga. Song jela ba jelgijao pangchakesan manianirangko bakroata. Song jelgipa biaprango antisanakingking ong'a. Ian Misi Saljong aro Minima Rokimena a'bao patigiminrangko song'e chinne aro chu jakgrako rugale on'pilskaaniko daka. A'baoni gamma-ge'anirangko jakchotman'ahaode Minima Rokime

dongramtangona re'angpila ine chanchia. Uni gimin ia salo bilsio gipin gamtai-rim'taiaona re'bataie patichina aganatanirangko daka. Ia dakanikon "Ku'manchia Wal'du kaa" ine minga.

### **Dingtang dingtang toromrang**

1981 bilsio chane man'anigita ka'mao dingtang dingtang Meghalayao donggipa toromrangko me'sokenga :

<b>Torom</b>	<b>Mande bang'a.</b>
Christians	7,02,854
Hindus	2,04,831
Muslims	41,434
Sikhs	1674
Bhudhists	2,794
Jains	542
Dingtang toromrang	3,44,215
Torom ra'gijagiparang	1,530
<b>Total</b>	<b>13,35,819</b>

### **Janggi tangani bewalrang**

Meghalaya a'doko songdonggiparang bang'batan gamme-ge'e cha'anio janggi tanggiparang ong'a. Chu'gimik songdonggiparangoni 83% manderangde gamma-ge'anion pangchake janggi tanga. Meghalaya a'dok gimiko 22.5 lakh hectare a'arangni, 2.17 lakh hectare a'arangkosan gamma-ge'anina jakkala. Ong'telaigipa a'ani bakrang aro dingtang dingtang obostarango pangchake bang'bata gamma-ge'anirangko dakna aro chi man'gipa biaprango gamma-ge'anirangko dakna gita cholrangko man'gijani a'selrang bang'a.

Janappgimin a'selrang ong'oba, Meghalayao gamma-ge'anirangko namdapatana ka'sine ka'sine bariroroatenga. A'doko mongsongbatgipa gamma-ge'ani bosturangara mongsongbate mi aro misian ong'a. Badiaba biaprango gom mirangko ge'anikoba ra'gatenga. Palskae tangka man'ani

# **THE book he'ang to Gov'**

*Captain Williamson A. Sangma*

bosturangara : Alu, mekatchi, kil, besual, gue, e'ching, holdi, pan, golmorich, cashewnut aro gipin gipin bosturang baksana daororo rubber aro coffee-rangkoba ge'na a'bachengengaha.

Baikamgipa bosturangara-komila, te'matchi, jambura, kakji, chinara, chambil, anaros, te'rik, kompiram, lit-chi, te'brong, te'gatchu, plum, nasbati, pitch aro dingtang dingtang bosturang.

A'songo a'rongga gamme burung-bolgrimrangni aro a'salrangni bon'angenga-cham'kirokangengako champengna gita Sorkari bang'a tangkarangko koros ka'e pangkingipa gamme-cha'ani rokom rokom cholrangko songdonggipa manderangna dake on'anirangko dakenga. Indakgipa gamme-cha'ani cholrangko dake on'an baksana, bitchilrangko aro a'salrangko jakkalna gita indin suale on'anirangkoba dakenga. Pangkingipa gamme cha'ani a'arangko tarie on'an baksa uarangona chirangko ra'bae jakkalna gita chirangko kachange, dongge cho'e on'anirangkoba manderangna dake on'enga.

## **Burung bolgrimrang:**

Meghalaya a'dokara burung-bolgrimrangan gapgipa biap ong'a. Burung-bolgrimarigipa biaprangko toe nianio Meghalaya a'dok gimiko 85,1000 hectare biaprang donga. Sorkarini a'kanggimin burungrang (Reserved Forests) 71000 hectare biaprang, dingtangmancha rakigipa burungrang (Protected areas) 1000 hectare aro gipin burungrang (Un-classed Forests) 77,9000 hectare biaprang donga. Ia burung bolgrimrango gamchatgipa bolrangara- Bolsal, Segun, Chram, Boldak, Kimde, Gamari, Champe, Sisoo, Poma, Gonsori, Sangdan, Kilwe, Ajhar, Agor, Tezpata, Lali, aro dingtang dingtang kamrangna jakkalna man'gipa bolrang bang'bea. Samra- sampilanina jakkalgipa sam aro bidilrangba bang'a.

Gamchatgipa wa'arang-Wa'ge, wa'tre, wa'nok, burua, wa'sim, wa'tebok, teksra, wa'kanta, wa'sut, wa'da aro wal'e wa'arang bang'a. Namnamgipa rerang: Redok, regitchak, rechuet, regisin, repin, sokmil aro rema rerang donga. Rokomanti mandeni jakkalani bosturang jedake-Ampang, pangsu, smu, chen'chak, re'jak, bengraru,kilkra, omak,

pakram aro indakgiparang. Gamchatgipa balgitorangba bang'bea. Meghalaya a'dokara a'ningni gamrangan gapgipa a'dok-chiga ong'a.

### **Matburungrang:**

Meghalaya a'dok jekae burung-bolgrimrang apala, indaken matburungrangba bang'a jedake-Mongma, matcha, mapil, matchok, balgitchak, mati, marong, wakburing, matgonggil, waksel, se'el, peru, matchapeng, mapu, aringga, sapau, chipu, matpra, okgipu, wakwek, kawati, gilwe aro rokom rokom chonchongipa janggi gnangipa matburungrang. Bolo rogipa matburungrangara : Huro, ranggol, makre, mat, matwan aro gipinrang aro mongsongbatgipa do'orangara-Do'grik, do'mesal, do'bekrot, do'olwak, do'rerap, do'oldu, do'uwang, do'reng, do'po, do'kua, do'pa, moina, do'sik, do'jinma, do'patchi, do'ting, do'randing' do'bak, do'ka, do'budok, do'chelu, salchame, do'kru, do'krua'sim, do'rimit, renggok, ringgek, do'ma, alabok, dotleng, hargila, do'maski, do'sru, do'amik aro bang'bea gipinrang.

### **Daka-rikani aro wata-chengani kamrang:**

Jatantini pagitcham-ma'gitchamrangoniko man'rikrik-bagipa sol'a-repani, wata-chengani bosturang bang'a. Indiba da'ororo uarang ka'sine ka'sine bon'angroraengaha gita nika. Daka-rikani bidingoba Meghalaya a'doko namen ka'sinbea ine nikna man'a. Indiba Meghalaya Stateko man'antal ka'sine ka'sine daka-rikani bidingoba bilsianti bariroroatani kamrangko jako ra'enga.

1. Cherapunji biapo cementko tariani aro da'o salprako 930 ton cementko bikotna man'gipa karkanako bariataha.

2. Barapanio Tantalum Capacitorko Meghalaya Electronics Development Corporation, France-ni M/s. FIRADEX baksa nangrime a'bachengataha. Uarangna agre Meghalaya a'doko daka-rikaniko a'bachengatgiminranga-Meghalaya Plywood Ltd., Associated Beverages, Komora Limestones Mining Company, Umiam Calcinates, The Meghalaya Watches Company aro Match splint Factory ong'a. Meghalaya Corporation salprako-1500 ton man'gipa Cement plantko Garo Hillso aro Paper Grade Lime Plantko Jaintia Hillso a'bachengatna tik ka'soaha.

**Leka poraiani gadang :**

Da'odipet Meghalaya a'doko 100% Primary schoolrang aro 90% Middle aro High schoolrang aro Collegerangan dingtang dingtang dolrangchisa niroke chalaianirangko dakenga. Meghalaya Sorkari namdapatnagitasan mangmang deficit aro Ad-hoc dake dakchakanirangko on'enga. Ia somoirangonakingking 4120 Primary schoolrangko songrango ong'ataha. Dam 700 Middle Schoolrang aro 275 High Schoolrangna nanganirangko on'e dakchakaniko dakenga. Skigiparangko ranta kaanina da'odipet dam 8 Junior Training Institute, damgni Normal School aroba damgni B.Ed. Collegerang donga. Schoolrangko namekae chalaina man'agita, Turako skotong dake Board of School Education-koba donaha. Da'odipet damgni Government collegerang aro dam 18 Governmentni jako ong'gijagipa Collegerangko North Eastern Hill Universityni ning'o chapataha. Post Graduateni classrang aro dingtang dingtang sandirikite uianirangko dakanina Ph.D degreeko on'anikoba daka. Universityo chapatgimin Governmentni ning'o ong'gijagipa Law College aro Governmentni chalaienggipa Technical Education jedake-Civil, Electrical aro Mechanical Engineeringrango diploma courseni Polytechnicba Sillongo donga. Bilsa 1971 aro 81 ni gisepo leka poraiani gadang 29% oni 34% ona tangdoahaoba, Indiagimikniko ra'gope hisapgin 36% kon sokuja.

**An'sengbaljokani aro sanna-bannani kamrang :**

Da'odipet Meghalaya a'doko dambonga Government Hospitalrang, gegittam Community Health Centre-rang, ge sotbri chonchongipa Primary Health Centre-rang, dam kolgrikdok Dispensaryrang aro dam ritchasa sotchet chonchonbatgipa Health centre-rang donga. Government Hospitalrang aro Community Health Centre-rang aro Primary Health Centre-rangko ra'gope sagiparangko 1528 biaprango done sanna-bannaniko dakna man'a.

**A'ningo donggipa gamrang :**

Khasi Hills, Jaintia Hills aro Garo Hills districtrango koila, Cement tariani ro'ong, rong'chun, dolomite, fire clay, felsper, quartz aro glass tariani rong'an'chengrang donga.

*Captain Williamson A. Sangma*

Indiagimiko cementko man'ani 95% kode West Khasi Hills districtoniko man'a. Garo Hills districto da'odipet koila, rong'chun, fire clay aro rong gnaanggipa rong'an'chengrang donga. A'dok gimiko da'odipet 500 million tonnes koila aro 4000 million tonrang rong'chun gnaang.

**Bijolini bilrang :**

Meghalaya a'doko ta'rake joksolgipa chibimarangan bang'ani gimin altuae koros komikalao chioniko bijolini bilrangko bikotna chol ong'a. Ia somoirango a'dokgimiko dambri chioniko bijolini bilrangko bikotgipa biaprang donga aro uoniko 125.2 M.W-ko bikota. Chioniko chongipa bijoliko bikotanio 1.57 M.W-ko man'gipa dieseloniko bikotgipa ge'sa donga.

**Re'a-doani ramarang :**

Meghalaya a'doko damgittam National Highway ramarang napaka aro chu'gimik bakroaniara 461 Kilometre ong'a. 1985-86 bilsimitingo a'dokgimiko repigimin aro repigijagipa chu'gimik sorokrangko man'gope 5139 kilometre bakroe ramarang gnaang.

Aeroplane onchokram a'dokgimiko damsasan, Shillongoni sambao Umroi minggipa biapo dongaia. Helicoptero manderangko Shillongoni Turaona Gauhatiko napake 1988 bilsini March jaoni a'bachengataha. Indiba naljokgijagipa a'selrangni gimin da'o uko dontongataha.

**Radio aro Television :**

Shillongo 100 K.W. Radio transmitterko aro 10 K.W. transmitterko Turao donaha. Televisionara 100 K.W. T.V. Relay centrerangko Shillong, Turao, Jowaio donaha.

## XXII

### BON'KAME AGAN-JANAPANI KATTARANG

Baditanakingking an'chingni a'dok-chigarango namrrooanirang ong'ahachim, uarangni gimin chasong gital chadamberang dingtanganirangko uibrejanaba donga. Indiba chagitcham brikgipa manderango sing'anirangko dakgenode uamangni agananirangara mai ong'skagenchim? A'songu namrrooani kamrang ta'rake ong'jaoba bang'a dingtanganirang, namrroo-silrrooanirang ong'aha ine nikna man'gen. Re'a-doani bidingo namen ja'manchakachim. Bilsi sotbrimangna skangsan Turaoni Shillongona re'na nangode salgittam nangachim. District ge'saon songreani ong'engon biap damsaoni biap damsaona adita salrangko nangachim. Leka poraiani bidingoba neng'nikbeesa poraina nangachim. Songtangni Lower Primary Schoolko matchotani ja'mano ritak ritaksan Middle Schoolrang dongaiani gimin chel'bea songrangoni re'bae, mitamrang Hostel aro cholgripagipa bi'sarang songpanggipa nokdangrango gamnap-rim'napesa poraipana chol ong'aiachim. A'chik a'songgimiko gitchebatgipa High School Turao ge'sasan dongaiani gimin bang'an poraidapna cholrangko man'pajachim. High Schoolko matchotani ja'mano Collegeo poraipanade Gauhati ba Shillongonasa re'ange poraina nangachim. Chol ong'kalgipa nokdangni dedrangsan Collegeo poraina man'paiachim. Chasong gitcheamni skia man'gipa sakantian duk aro tikelani baksasa ka'nile poraianirangko dakaha. Darangba altuae poraianio chusokgiparangde ong'ja. Salgittam salbri dake burung a'changrangko an'tangtangni ba'ra boksarangko an'tangtangan itchile kengni rama bijangchirango tuchangesa poraianina tikelna nangaha. Chutimiting somoirango kam ka'stape, tangka paisarangko leka ki'taprangna chimongskana nangachim.

Capt. Williamson Sangma an'tangba ua somoirango chagrongbagiparangoni saksa ong'paa. Uni gimin ia pilak neng'nikanirangko uibagipa mande ong'paa. Chasonggitcheam

*Captain Williamson A. Sangma*

sal aro somoirangko nipilate nie da'ororoni somoirango baditanakingking dingtangaha aro namrorobataha, uarangko tosusana altuae man'a. Ia pilak apnikgijani gadangrangoniko tang'doatna Capt. Williamson Sangmaan rakbate kam ka'gipa ong'aha ine aganoba mamungba gualani dongja.

Capt. Williamson Sangma an'tangan Meghalaya a'dokko ong'atna rakbee kam ka'e aro ua a'dokni an'tangan bilsu 15 na Chief Minister ong'e nambata gadangrangona tang'doataha aro manderangni mikselbatani baditanakingking ong'ahachim, uarangko mingrikiti gimin che'em che'em nipilataiade uina man'gen. Uni Meghalaya a'dokko ra'baanio, districtrangko ra'rontaianio, Sub-divisionrangko bariatania, Administrative unitrangko aro Development Blockrangko ong'atanichi a'songni bang'a manderangnan namgipa janggi tangani cholrangko on'aha. Da'alo a'doktang chigatangni dedrangrangan, saobara Engineer, mitamrangara Magistrate, sanna-bannanio Doctorang, gamma-ge'anio districtni Officerang aro uandake minganti Departmenton kam ka'giparang ong'tokaha. Universityoni a'bachenge Primary skulrangni skigiparangba ong'tokaha.

Capt. Williamson Sangma an'tangnasan chanchiari nokdangtangko namdapatna kam ka'ajaha. Songdonggipa sakantian uni rakbee kam ka'ani rengsiko man'pagiparang ong'aha. Iarangko chanchie nie songdonggipa sakantian una dal'bea gro nanggiparang ong'chongmota. An'chingni dongatoktokko una on'pilskagenoba mamungba ong'jawachim.

Capt. Wiliamson Sangma an'ching sakantina bang'bea namgnirangko dakahanina, an'chingko gro ine dabijawachim. Indiba uni bimchipe jatna, a'songtangna ka'sae an'tangko on'kange kam ka'anirangko gisik ra'e songdonggipa sakantian mikkangchi kam ka'e namroro-silroraanirangko a'songtangna ra'baanirangko,ua nikangpakuna-sa sikbepagenchim.

Chasongni gisepo, ritchaprako sakpraksan indakgipa mandede atchiaia. Capt. Williamson Sangmara A'chikrangni saksakamkam ba'kadanggipa depantean ong'jachimma? A'chikrangnisan ong'ja, Meghalaya A'dokgimikni, Indiani Salgro-saliram a'pakgimik aro India a'songoba saksagamchatbegipa Ripok Do'katchjan ong'chongmota. Darangan indonga depanteko,gimaatna ka'beani ong'a.



*Captain Williamson A. Sangma*

**SEANIO JAKKALGIPA KITAPRANG ARO  
GIPIN SANDIANIRANG.**

- |                                                                                                     |      |                                                              |
|-----------------------------------------------------------------------------------------------------|------|--------------------------------------------------------------|
| 1. SINHA KAMALESHWAR                                                                                | .... | MEGHALAYA (Triumph of the Tribal genius)                     |
| 2. SINGH K.S.                                                                                       | .... | TRIBAL MOVEMENTS IN INDIA..Vol-1.                            |
| 3. GASSAH L.S.                                                                                      | ...  | GARO HILLS LAND AND THE PEOPLE                               |
| 4. DIRECTORATE OF INFORMATION AND PUBLIC RELATIONS, MEGHALAYA<br>(Issued during October, 1985)      | .... | A'SONGO MING 20 MANCHISAMSOANI KAMRANGKO CHU'SOKATGIMINRANG  |
| 5 — Do —                                                                                            |      | BASIC FACTS-MEGHALAYA (1975—1988)                            |
| 6 — Do —                                                                                            |      | MEGHALAYA ECONOMIC CENSUS 1980 AND STATISTICAL SAMPLE SURVEY |
| 7. DIRECTORATE OF ADVERTISING & VISUAL PUBLICITY OF I & B , GOVERNMENT OF INDIA                     |      | 20-POINT ECONOMIC PROGRAMME                                  |
| 8 CAPT WILLIAMSON A.SANGMAKO GRONGE ANGNI SING'E RA'RIKANIRANG.                                     |      |                                                              |
| 9. PA. DEBENDRA BARUAH, REV. JONAH CH.SANGMA ARO MA. BISADINI SANGMA ARO UAMANGNI AGANE ON'ANIRANG. |      |                                                              |













*Rs. 150*